

IACOBI RAEVARDI
Brugensis I. C.

COMMEN-
TARIITRES VE-
RAM PRISCI IVRIS.
ANTIQUITATVMQVE AD
hunc vsq; diem incognitarum expli-
cationem continentes, quo-
rum sunt:


- I. De veris vsucapionum differentijs ad-
uersus Tribonianum, liber singularis.
- II. Ad legem Scriboniam liber singularis.
- III. Ad leges duodecim tabularum liber sin-
gularis.



15 86.
IENAE, Excudebat Tobias Steinman.



IACOBVS
CRVQVIVS
MESSINIVS LECTO-
RICANDO.



N HVMANIS rebus candi-
de Lector ea pri-
mam laudem me-
rentur quæ rempublicam potif-
simum iuvant & constituunt.
Alia studia quæ privatim qui-
dem ad voluptatē, publicè ve-
rò ad ostentationē exercentur,
profectò non tam utilia com-
munitati censenda sunt quàm
grata suis amatorib. & plau-
sibilia. Quemadmodum perpe-

tuarum rerum contemplatio
præclara res est, quòd illa nec
alterationi, nec mutationi cui-
cunq₃ sint obnoxia, quales sunt
decem primi fontes rerum quæ
vel esse vel inesse dicuntur. Uc-
rum multò præclarior est ani-
maduersio singulariũ, quæ nunc
oriuntur, nunc occidunt naturæ
quadam dicißitudine, quæ cau-
sa prima est & postrema rerũ
omnium, quas res per causas
nosse scire est. Quam ego consi-
derationem (quando homo na-
tus sit homini) ad res gerendas
magis appositam dixerim atq₃
adeo necessariam: Alteri tamen
non

DEDICATORIA.

non parum concesserim, si vel
tandem Reipublica accommo-
detur. Sed quòd sint ingenia
quedam mutabilitatis rerum,
& imperfectionis ita impatiē-
tia, ut nihil præter formas illas
eternas à rebus abstractas cō-
trouertant, paucioribus sanè id
persuasum velim, ut in his no-
tionibus parum utiliter conse-
nescant. Hic contra mihi non
minus toto (ut aiunt) errare
cælo videtur, qui acervare qui-
dem leges, & in numerato ha-
bere vehementer contendunt,
verum eas ad vinum resecare,
et iniquitas, excutere, & causis sin-

gulis singulas exactè applica-
 re, ut laboriosius (ne quid gra-
 vius dicam) ita vulgò minus
 arbitrantur honorificum, qua-
 si id unum agant ut admira-
 tioni sint omnibus vel omnium
 periculo. Profectò his perinde
 accidit, atque quibus de equi-
 tate, iustitia, liberalitate dicere
 magnum videtur, at æquum,
 esse iustum & liberalem vel mi-
 nus ex re sua vel esse abiectio-
 ris animi, quando ad applau-
 sum & dicant & faciant o-
 mnia. Quare non obscurum
 est hos anteferendos multis no-
 minibus, qui quas leges diu
 mul-

DEDICATORIA.

multumq³ olim legerunt, didicerunt, notauerunt, easdem aliquando à se magna cura reposcunt, nec minori studio interpretantur, ne cuius facto, mira scilicet arte, quasuis leges adsuant. Quæ res quàm sit legitimo iudicio perniciosa, quântumque aliquando percellat æquos alioquin animos iudicum, vel ex hoc unico Reuardi nostri Triboniano est in confesso. Qui error Triboniani, viri commitate simul & doctrina singulari, de antiquis usucapionum differentiis, quantum obscuritatis difficultatisque ipsis

Iureconsultis offuderit, quàm
 multos suo iuri cedere, alios in
 possessionem non suam intro-
 duci fecerit, verius quis ex hac
 disputatione sedula Reuardi
 cognoscat quàm dijudicet,
 quando adhuc omnes pro Tri-
 boniano ea in re tanquam pro
 aris & focis viri docti depu-
 gnauerint. Ubi non animum
 Tribonia. quantum verba
 & auctoritatem secuti viden-
 tur. Nam Suidas non male
 fidei scriptor & Procopius pri-
 mo de bello Persico in hoc con-
 sentiunt, nimirum Τριβωνιάδων seu
 Τριβων dixeris, nomen enim hîc
 non

D E D I C A T O R I A.

*non agitur per se ne an per
 scribatur, doctrina & vita
 suauitate insignem obscuras-
 se auaritiam. At Suidas
 præter pecunia studium & ne-
 fanda alia, etiam leges scri-
 bit habuisse venales, cuius hæc
 sunt verba: ἔς δὲ φιλοχρηματίας δαιμω-
 νίως ἐσπεδακώς, οἷος τ' τῷ κέρδους αἰὶ τὸ δίκαιον
 ἀποδίδωσιν, τῶν τε νόμων ἡμέρας ἐκ' τοῦ ἐπιπλεί-
 στος ἐκάστης, τοὺς μὲν ἀρήρει, τὰς δὲ ἔγραψιν, ἀπιμ-
 πολῶν τοῖς δεομένοις κατὰ πῶς χρεῖας ἰκατέρεα.*
*Quod quum ita sit, fato quodā
 hic scopulus à D. Reuardo iu-
 ris studiosis detectus est, ut pru-
 dentius per hoc immensum le-
 gum mare posthac nauigent,
 est enim vero consentaneum*
)(5 latere


latere plures alios adhuc inco-
gnitos idq³ auctore Tribonian.
Quid enim non mortalia pe-
tora cogis auri sacra fames?
Quare hoc iam nunc velim
propositum omnibus iuris can-
didatis ut huiusmodi evanida
legum recitatione, ne dicam
intelligentia, valere iussa, in
hoc unanimiter incumbant o-
mnes, ut singula leges singulos
aliquando nanciscantur Re-
uardos, hoc enim pacto fieri
tandem poterit ut de alijs (ut
fertur) rogati patroni desi-
nant respondere de cæ-
pis. Vale.

GENE-

GENEROSO ET
ERUDITO VIRO D.

GVIDONI LAVRINO I.C.

clarissimo Jac. Ravardus, S.

 VI de vsucapionibus
scripserunt Laurine non
de sunt interpretes; Qui
autem differentias earū
tradiderunt, ex tot præclaris foeli-
cissimi huius seculi iurisconsultis
nulli non desiderantur. Certè quo-
minus de antiquis vsucapionū dif-
ferentijs, disputatum sit, Triboniani
error in causa fuit; quem hoc com-
mentariolo si non extirpare, at sal-
tem studiosis indicare visum est o-
peræ precium. Et quia de absoluto
vsucapionis tractatu, doctissimorū
aliquot virorum extant commenta-
rij, quibus parum aut nihil addi po-
test, in euoluendis omnibus de vsu-
capionibus prudentum sententijs,
operam mihi inanem collocaturus
videbar.

videbar. Ideoq; de veris earum dun-
taxat differentijs contra Tribonia-
num differere institui, nō vt opinio-
ni quam de Triboniano viri docti
imbiberunt aliquid omnino detra-
ham, sed vt veritati, quæ in discipli-
nis omnibus principem tenet locū,
fideliter inseruiam. Et quamuis non
ignorem meum pudorem existima-
tionemq; in discrimen adduci, haf-
ce tamē lucubrationes exire in ma-
nus hominum passus sum, vt earum
exemplo quæ præ manibus sunt, de
nonnullis antiqui iuris apicibus e-
lementa, eruditiorum censura tem-
perentur. Atq; huius quidē, doctis-
sime Laurine, commentarij fructus,
pro ea qua me non vt amicum, sed
vt germanum fratrem amplexus es
humanitate, sic tuæ fidei committo,
vt te illis si mihi fatorum vi subita
lucis eripiatur vsura extrema cera
tutorem patronumque constituam.
Vale.

IACO-

NOBILI ET
ERVDITO MARCOLAVRINO, DN. DE VVA-
teruliet, S. D.

SEMPER amaui, ut scis, vir
 generosissime, fratrem tuum
 Guidonem Laurinum, pro-
 pter eius summum ingenium, suauissi-
 mos mores, singularem probitatem, at-
 que constantiam. Is, quum me omnem
 industriam, operam, & cogitationem
 ad studium iuris prisci, antiquitatum-
 que Romanarum contulisse, annis ab-
 hinc aliquot intelligeret, me vicissim
 hac de caussa singulari quodam animo
 etiam est prosequutus. Is mecum eo
 nunc animo est, ut si in hoc studio vi-
 ta nobis ponenda foret, praeclare a-
 ctum nobiscum putaremus. Illud etiam
 erat amoris nostri, quem ab annis ali-
 quot susceptum, non seruauimus nos
 solum inter nos, sed nunc etiam con-
 suetudine tua auximus, orare te, ut in
 idem

idem antiquitatum studium, cui perpe-
tuo te totum tradidisti, omni cogita-
tione, curaq; sic incumberes, ut virtu-
ti tuae, & gloria nascenti, cuius sese iam
foras semina proijcere gestiunt, libera-
liter indulgeas. Nihil est mihi crede,
virtute formosius, nihil pulchrius, ni-
hil amabilius. Moriar, si prater te quē-
quam reliquū habemus, per quem ali-
quant antiquae Romanorum Reipublicae
imaginem possimus agnoscere. Contin-
get tibi, quod haud scio an nemini, ut
tua in conquirendis per omnem terra-
rum orbem numismatibus industria,
non grata modo eruditis hominibus,
sed etiam popularis futura sit, & quum
praecipuis omnibus, tum etiam infimo
cuiq; gratissima. Hoc si tibi fortuna
quadam contigisset, gratularer felici-
tati tuae: sed contigit magnitudine tum
animi, tum etiā ingenij longē prestan-
tissimi. Virum quoq; nactus es, in ima-
ginibus Caesarum, & instrumentis sa-
cerdo-

D E D I C A T O R I A.

*cerdotalibus, magistratuumq; insigni-
 bus exprimendis ita exercitatum, ut
 eo exercitatio inueniri nemo possit:
 Hubertum Goltzium dico, quem quum
 per se video lubentissimè, tum hoc lu-
 bentius, quòd illum audiens te audire
 videor. Is singularem in explicandis
 marmoribus scientiam, & in exprimèn-
 dis imaginibus antiquis industriam, &
 in omni genere prudentiam mihi tuam
 iamdudum exposuit: præterea sum-
 mam erga se liberalitatem tuam ad-
 iunxit: quæ omnia mihi iucunda, hoc
 extremum etiã gratum fuit. Et id-
 circo quantum tibi docti omnes C. Iu-
 lio Cesare, Fastisque tui Goltzii Con-
 sularibus editis iure debebunt, quomi-
 nus tantundem ego unus debeam non
 recusò. Ut igitur in eam curam & cogi-
 tationem, quæ tibi commendationem
 aliquam adferre possent, nunc incum-
 berem, tua id fecit, mira cum eruditio-
 ne humanitateq; coniuncta, virtus sin-
 gularis.*

gularis. Scripsi ad eas, quas exstare cognoui, legum Decemviralium reliquias, exiguos commentarios. Quos non ut commemoratio posteritatis me ad spem aliquam immortalitatis raperet, verum ut opinioni, quam de me concepisti, responderem, sub firmissimo tui nominis clarissimi patrocinio, in medium adferri passus sum. Et quia Romanae historiae esse peritissimum te, nemini omnino dubium est, ideo de legum Decemviralium causa & origine nihil hic praefabimur: quae omnia ex eruditorum aliquot harum legum interpretum commentarijs sine labore ab imperitis percipi possunt. Accipe igitur munusculum istud, clarissime Domine, ab eo qui tuis laudibus ita fauet, ut omne suum studium, officium, operam & diligentiam, ad virtutem tuam amplificandam, publicè priuatimque perpetuo sit collaturus.

Vale.

I
S V M M A H V I V S

COMMENTARII CAPITA.

1. De duplici possessionis causa.
2. De iuris civilis consideratione duplici, & illi quomodo derogatum vel abrogatum fuerit.
3. De tempore in usucapionibus lege decemuirali constituto.
4. In usucapionibus biennij tantum & anni unius spacium cur à decemuiris sit constitutum.
5. Edicto pratoris derogatum fuisse legi de usucapionibus decemuirali.
6. In locum biennij longum tempus eodem edicto surrogatum fuisse.
7. Quod usucapi poterat, id longa possessione capi potuisse.
8. Iuris autoritate quomodo ab antiqua differat usucapio noua.
9. Quomodo item tempore discernantur usucapio vetus & noua.
10. Et an loco differant.
11. Falsum esse quod à nonnullis traditum est, loco usucapionis longa possessione captionem repositam esse in nostris pandectis.
12. Et cur id fieri non potuerit vera ratio tradita.

NOVI QV ARVNDAM
LEGVM INTELLECTVS
expandectis.

- II. Epist. de confir. pandect. §. tanta.
- 10. l. viij. de iust. & iur.
- 12. l. x. si seruit. vind.
- 12. l. xij. §. Iulianus. de iureiur.
- 9. l. i. circa finem. de aq. & aq. pl. arē.
- 9. l. si. Eod. tit.
- 10. l. iij. de acq. pōss.
- 1. l. iij. §. si viam habeam, de vsurp.
- 8. l. i. in fine de superfic.
- 9. l. iij. de aq. quot. & æst.
- 7. l. ix. de diuers. temp. præscrip.

EX CODICE.

- 11. Epist. de no. Cod. fac. §. quibus specialiter.
- 7. l. i. de ser. fugit.
- 7. l. ij. in quib. cau. cess. long. temp. præsc.

EX INSTITVTIONIBUS:

- 10. §. i. de vsucap. in quo totius dissertationis
cardo vertitur.



2
T R I B O N I A N V S,

sive

DE VERIS VSV-
CAPIONVM DIFFE-

RENTIIS ADVERSVS

Tribonianum Liber sin-
gularis

J A C. R A E V A R D I
Iurisconsult.



S V C A P I O I N I I S
prudentum responsis ex
quibus pandectarum libri
compositi sunt, sic acci-
pienda est, vt eam inter-
dum ad solius referamus iuris, nulla fa-
cti habita ratione, intellectum, quo mo-
do res sacras, sanctas, publicas, & libe-
ros homines vsucapionem non recipe-
re Caius interpretari visus est, capit. 9.
de vsurpat. Non enim de eo apud Ca-
ium controuertitur, an vnus, duorum,
decem, vel viginti annorum possessione
res sacræ, sanctæ, publicæ, & liber homo
capi possint, sed an omnino vsu non

A 2 pos-

possint acquiri. Antequam igitur de temporis distinctione agi poterat, necessum erat rerum, de quarum usu tractabatur, conditionem qualitatemque inspicere; siq; eius esse conditionis viderentur, ut usu possent acquiri, tunc demum ad temporis distinctionem veniendum erat, videndumque an vnius duorumue, an verò longioris temporis requirerent interuallum. & ita quæ nudis inhærebat iuris limitibus usufructio, in facti transibat necessitatem. Nam sic quoque nonnunquam accipiebant usufructum prudentes, ut in ea cum factio ius vellent confundi; veluti, cum dicimus res siue immobiles siue mobiles usufructui posse, sic iuri factum cohæret, ut alterum ab altero diuelli nequeat, aut segregari. Duplicem enim causam talis habet possessio, qualem in usufructu requirunt prudentes, qui sine possessione usufructum contingere posse negant. Vna facti est, de qua sic Papinianus scribit, Possessio autem plurimum facti habet; causa verò facti non continetur postliminio. cap. 19. Ex quib. caus. maior. Altera verò iuris est. Quæ quidem
facti

facti iurisque causæ, ni simul coniunctæ æquali gradu parique, vt ita loquar, passu ambulant, ad vsucapionem prodesse non poterant. cap. 2. §. separata, Pro empt. Nec sine vsurpatione iusta alteri per alteram præiudicabatur. Proinde si cum viam per tuum fundum haberem, tu me ab ea vi expelleres; hæc quasi possessionis interruptio naturalis nullum iuris causæ præiudicium adferebat: quia, vt indicat Paulus cap. 4. §. penult. de vsurp. etiam si vna meæ possessionis causa, quæ facti est, mihi ablata sit non tamen de mero, quod in via mihi superest, iure, id est, de iuris, quæ sola superest causa detrusus videor: factum siquidem facto tolli potest, ius verò iure quidem partim, partim verò tum nostro, tum prætoris facto, quod legis vigorem habet, solet immutari. Ergo si me vi expuleris à via, vnā mihi meæ possessionis causam, quæ facti est, interrupisti. cap. 5. de vsurp. mera interim iuris causa salua manente, quam ius idcirco merum Paulus vocat, quòd sine facto via, quæ causas iuris & facti coniunctas habuerat ex solo meroque iure,

re, id est, ex nuda iuris causa constabat.
 Et nisi per interdictum ad facti causam
 cum aduersario meo experiar, mero iure
 sine facto, vt non acquirere. sic nec
 viam potero retinere; quia, inquit Paulus,
 ius incorporale non intelligitur
 possideri, nimirum eo modo quo res
 corporales possideri intelliguntur, hoc
 est, sine facto, cum alioqui seruitutes
 quasi possideri passim dicantur, cap. 10.
 Si seruit. vind. Si enim rem corporalem,
 puta vestem, possideam, quanuis veste
 non vtar; mihi tamen ea auferri non debet,
 quia etiam sine vfu à me possideri
 intelligitur: verum si per tuum fundum
 habeam viæ seruitutem, & via
 non vtar, non intelligor viam possidere
 sine vfu, & proinde longo tempore amitti,
 fundoque seruitus excludi potest. Itaque si negligentia per longum
 tempus, qua proprio non possum, saltem
 prætoris auxilio via non vtar, quæ
 admodum mero iure, hoc est sine facto,
 ea non acquiritur, sic acquisita mero
 iure non retinetur. Et hoc illud est,
 quod Paulus obscure satis hunc in modum
 scribit, Si viam habeam per tuum
 fun-

fundum, & tu me ab ea vi expuleris, per longum tempus non vtendo amittam viam : quia nec possideri intelligitur ius incorporale, nec de via quis, id est, mero iure detruditur. d. cap. 4. Quo in loco non desunt qui per merum ius iuris ciuilis subtilitatem intellexerunt : quod ab intentione iurisconsulti, quam sit alienum, ex hoc nostro intellectu nouo facile æquus arbiter æstimabit. Omnis itaque vsucapio duplicem requirit possessionis causam, vnā facti, alteram iuris. Factum ipsam possessionem siue detentionem in rebus corporalibus natura conficit, in incorporalibus vsum requirit, ius dominum ei attribuit, ratamque authoritatem, qui rem aliquam possedit vel quasi possedit tempore lege definito.

2. ATQVE huius porrò temporis distinctionem fuisse duplicem satis probabile est, vnā ex lege 12. tab. & ex quadam iuris noui prærogatiua legi derogante alteram promanantem. In scripto nāque ciuili Romanorum iure duplicem excogitarunt distinctionis considerationem prudentes ; vna qui-

dem ius vetus siue antiquum, altera verò ius nouum illud volebant appellari; antiquum solis 12. tabularum legibus; nouum verò legibus tam tribunitijs quàm consularibus, principumque rescriptis concludentes. Hinc vt antiqua, sic etiam lege noua deferri hæreditatem Vlpianus, Caius, & Pomponius scripserunt. Vetus sola hæreditas, inquit Vlpianus, quæ lege 12. tabularum deferretur, capitis minutione perimitur: nouæ vel ex lege vel ex senatuscòsultis delatæ, non perimuntur capitis diminutione, c. 1. §. 7. ad senatusc. Tertull. Caius quoque, Hæreditas, inquit, ad nos pertinet aut vetere iure, aut nouo. vetere, è lege 12. tabularum: nouo fiunt hæredes omnes qui ex senatusconsultis aut ex còstitutionibus ad hæreditatem vocantur, cap. 1. & 3. de petit. hæred. Denique legitimas hæreditates alias 12. tabul. legibus, alias item ex legibus venire nouis apertè testatus est Pomponius cap. 11. De suis & legit. Vnde satis est perspicuum, iuri olim antiquo nouo iure sæpiùs derogatum fuisse, non vt lex æneis insculpta tabulis desuetudine aliqua

qua expungenda foret, verum ut quæ humaniorem temporis necessitate interpretationē aut vsum requirere videbatur, vel cum exceptione proferretur, vel omnem amitteret iuris auctoritatem nouo placito abrogata. Cū enim lege cautum erat, ut auctor ad Herennium refert, in ius vocatus ut iret, prætor edicto legem hanc non sustulit, sed ita est interpretatus, in ius vocatus ut eat, aut satis vel cautum det. Lex in ius vocatum sequi iubet; prætor viua legis vox non cogendum venire in ius aduersarium edicto statuit, si satis vel cautum daret. Ius enim honorarium adiuvandi, supplendi, corrigendique iuris civilis gratia esse introductum Papinianus auctor est, cap. 7. de iust. & iure, nulla iuris antiqui aut noui habita distinctione; adeo quidem ut interdum contra senatusconsulta non principem solum, sed etiam prætorem decreuisse hinc possit probari, quod cum Orphyciano senatusconsulto rei capitalis damnatus nec restitutus ad matris successionem non admittebatur, tandem exorta fori de hac senatusconsulti parte

disputatione, communi prudentum calculo placuerit ac definitum sit, contra senatusconsultum ad matris hæreditatem humana quadam interpretatione huiusmodi filium admitti oportere. c. l. §. v. ad senatusc. Tertull. Planè ex antiquo iure per prætores & per ipsos imperatores plurima fuisse immutata argumentis innumeris defendi potest. Cum enim, vt alia quæ passim obuia sunt, vno contentus, exempla omittam, antiquo iure sui hæredes & necessarij intestatorum hæreditates amplecti cogebantur inuiti, volentibus, contra Ius antiquum, permittebat prætor se ab hæreditate abstinere. §. necessarij, Inst. de hæred. qual. & diff. Nec tam prætorio iure, quàm noua Imperiali quadam constitutione, hæc suis hæredibus & necessarijs competebat iuris prærogatiua; adeò vt sine aliqua prætoris authoritate ipso constitutionis iure satis esset hæredibus se hæreditati nō misuisse. Nam ita rescriptum fuisse refert Vlpianus, cap. 12. de acq. hæred. Accedit, quòd lege Acbutia leges 12. tabularum in plurimis locis correctas atque emendatas fuisse

fuisse testatus sit Gell. lib. 16. c. 10. Quòd igitur eius sunt conditionis leges, vt pro temporis qualitate, rerumque statu publicarum, sæpius immutari debeant, (quemadmodum differit eleganter Sextus Cæcilius cū Phauorino philosopho apud Gellium noct. attic. lib. 20. cap. 1.) non inirum iuri Romanorum antiquo nouo iure, quemadmodum scripto iuri iure non scripto, derogatum, imò nonnunquam abrogatum fuisse. Quæ enim in certa perpetuâque ratione non consistunt, sed ex arbitrio pendent, arbitrio tolli eodem possunt, quoties publica requirit vtilitas, quoties suadet quæ legem non habet necessitas.

3 HINC deinde vfucapionem, vt eò vnde digressi sumus reuertamur, antiqua constitutam lege, non tam vtilitatis securitatîsque Romani populi, quàm necessitatis quadam authoritate, sustulit in immobilibus, edictis partim, partimque nouis constitutionibus, non in prouinciali tantum, vt existimat Tribonianus, sed etiam in Italico solo, contra ius antiquum introducta longa possessione capio. Iure enim antiquo res fide bona

bona possessæ vsu non longo, videlicet anni vnus mobiles, & immobiles biennij spacio, acquirebantur. Cicero in Topic. Quoniam vsus authoritas fundi biennium est, sit etiam ædium; at in lege ædes non appellantur, & sunt cæterarum rerum quarum annuus est vsus. valeat æquitas quæ paribus in causis paria iura desiderat. Quo in loco, plurimarum ait Boëtius rerum vsucapionem annuam esse, vt quibus anno continuo aliquis vsus est, illas firma iuris autoritate possideat, vt sunt res mobiles. Immobiliū autem vsucapionem biennij spatio contineri, non in topicis solum, sed etiam pro Cæcinnia testatus est Cicero: lex, inquit, vsū & autoritatem fundi iubet esse biennium.

4 ITA QV E anno, ni fallor, tricentesimo quinto ab vrbe condita, quo leges decemvirales, communi suffragio populi centuriatis comitijs perlatae, & in æs, vt tradit Liuius, incisæ proponebantur in publico, non iisdem quibus Italia finibus, sed angustioribus multo Romanum imperium terminabatur: suisq; ita limitibus Romani continebantur, vt

ut nisi soluendi voti, legationis, vel exilij causa Italiæ fines rarius egrederentur. Inq; suis possessionibus erant perpetui, nec ab ijs sic bello deterrebantur, quin statim pulsus hostibus fugatisque, ferro posito manu rastrum fumerent, ad intermissos agrorum cultus redeunt. Quamobrem inter illas quibus de rerum dominio tractabatur leges, usu rei capiendæ tempus certum decemuiui constituerunt, nec quidem pro temporis qualitate longius, nec pro dominorum negligentia rigorosius quam quod statui æquitas ipsa postulabat. Quod enim ciuitate continui, & agris perpetui ciues detinebantur, rariusque relicto natali solo Italiam egredi consueuerant, rebus mobilibus anni, immobilibus biennij spatium usu acquirendis, habita inter præsentis & absentes nulla distinctione, sufficere existimabant.

5 Nec verò statim propagatis orbis Romani in exteras usque nationes finibus, legi huic decemuiuali scripta lege aliqua, vel nō scripta, imò nec ante imperatorum tempora derogatum fuisse verifi-

verisimilibus vti credam coniecturis
 adducor. Perpetua quidem inter edi-
 cta quæ Saluium Iulianum sub Impera-
 tore Aelio Adriano composuisse refert
 Eutropius, de vsucapionibus vnum ex-
 titisse hinc potest probari, quòd Paulus
 qui ad edictum libros octoginta scri-
 psit, integrum de vsucapionibus com-
 mentarium libro quinquagesimo quar-
 to ad edictum olim ediderat, cuius pars
 extat non exigua, cap. 4. de vsurpat. c. 2.
 pro empt. c. 4. pro legat. c. 2. pro suo. Vt
 sic prudentum autoritate Imperato-
 rum temporibus nonnihil ex antiqua
 de vsucapionibus decemuirali lege e-
 dictis suis immutasse prætores videri
 possint. Proinde rebus immobilibus vsu
 acquirendis prætores longius quàm
 quòd antequam lege præscribi poterat,
 tempus constituisse existimaui. Edictum
 enim de vsucapionibus Paulus libro
 quinquagesimo quinto ad edictum in-
 terpretans, longi temporis meminit, c.
 4. §. si tu me, de vsurpat. ad quod edictum
 Ulpianus quoque libro sextodecimo
 ad edictum scribens, seruitutes cum æ-
 dificijs longo tempore capi posse testa-
 tus

tus est, cap. 10. eod. tit. Et quoties de rebus immobilibus vsu acquirendis agebant prudentes, semper longi temporis, longæ possessionis, vsus longi, possessionis diutinæ meminerant.

6 Vnde satis probari potest, in eius quod lege antiqua rebus immobilibus vsu acquirendis datum fuit, temporis locum, interuallum temporis longius edictis partim, partimque nouis constitutionibus, surrogatum fuisse, c. 76. de contrah. empt. Cum enim innumeras temporibus Imperatorum prouincias Romani subiugauerant, amplius sic Italia non continebantur, vt eam rarius egrederentur; quin contra sæpius accidebat vt qui Romæ agebant, in prouincijs prædia possiderent, & qui in prouincijs erant, in Italico solo possessionibus abundarent. Quamobrem absentes dominos & imprudentes suis biennij spatio priuari possessionibus, nec durum, nec iniquum, quo lex edita fuit tempore, existimari potuit: sed tandem propagatis in immensum orbis Romani finibus, quod æquum fuerat antea, iniquum, iniustumque quod olim
iustum

iustum erat, prætori videbatur. Proinde constitutum fuisse reor. expressa partim partimque tacita ciuium conuentione, vti res immobiles non biennio amplius, sed longo tempore vsu acquirentur. Longum autem tempus idem ille Paulus qui prætoris edictum de vsucapionibus libro ad edictum quinquagesimo quarto est interpretatus, continuo decennij, inter præsentis, & inter absentes vicennij spatio comprehendendi ad filium scribebat libro quinto sententiarum, titulo secundo. Vt quis non existimet hæc verba, *Longa possessio-
ne capere*, & alia his similia, à Tribonian-
no responsis prudentum inserta fuisse, facit hæc Pauli longæ possessionis inter-
pretatio, de qua hic fusiùs suo loco tra-
ctabitur. Ergo iure antiquo biennij, no-
uo iure inter præsentis decem, inter
absentes annorum viginti spatio vsures
immobiles acquirebantur. Quæ qui-
dem acquisitio vetus decemviris vsu-
capio dicebatur; nouam verò longa
possessione capionem appellat Iabolen-
nus, cap. 4. in fine, pro empt. Et quem-
admodum vsucapere per vsum acquire-
re si-

re significat; sic capere longa possessione, per longam possessionem capere interpretari visus est Scauola cap. fin. eodem tit. Quasitum est, inquit Scauola, cum scierit partem fundi absentis esse, an totum fundum longa possessione ceperit? Respondi, si credidisset mandatu fratris venisse, per longum tempus cepisse. Vlpianus autem nouam acquisitionem hanc, longæ possessionis prærogatiuam vocat cap. 3. de itiner. aduque priuat. & quod prærogatiuam iustum integrumque beneficium definit Asconius, verè per prærogatiuam Vlpianum huiusmodi beneficium intellexisse non dubito, præsertim quo iuris antiqui rigor, in biennij locum decem & viginti annorum surrogato spatio, sic mitigabatur, vt in posterum nullo ampliore temporis intervallo rebus immobilibus vsu acquirendis opus esse videretur.

7 ERAT igitur olim vsucapio, erat etiam longa possessione capio: hac iure nouo, illa antiquo iure res tam mobiles quam immobiles acquirebantur. Et quanuis res vt immobiles, sic etiam

B mobi-

mobiles longa possessione acquiri poterant, nihilominus tamen solenni legis antiquæ spacio mobiles per vsum acquirerebantur. cap. 1. pro dot. Nec quidem diuo Magno Antonino longæ possessionis in rebus mobilibus bonæ fidei possessorem, qui solenni præscriptione tutus erat, vti prærogatiua absurdum aut iniquum videbatur. c. 9. de diuers. temp. præscript. quanuis alioqui decem vel annorum viginti quam vnus anni possessionem improbare auctori esset difficilius. Qui igitur vsucapere, id est anni spacio vsum rem acquirere potest, potest eandem longa possessione capere, vt ex diui Antonini constitutione apparet. Verum an quæ vsucapione acquiri non possunt, possint longa possessione capi, in dubium merito vocaretur, nisi expressè Imperatores Diocletianus & Maximianus, in quibus rebus mobilibus vsucapio, id est anni spacium, locum non habet, nec in ijs longi temporis præscriptionem, siue longa possessione capionem locum habere, rescripissent, c. 1. C. de ser. fugit. Sic enim distinguendam esse vsucapio-

nem

nem, quæ tunc temporis in solis rebus
 mobilibus locum habebat, a longæ pos-
 sessionis prærogatiua, satis idem rescri-
 ptum indicat. Porro si quis vsucapione
 siue annali præscriptione se tutum sa-
 tis consideret, superfluo longæ possef-
 sionis prærogatiua defendi postulabat.
 Idem enim Imperatores, cum vsuca-
 pio locum habet, ad longi temporis
 præscriptionem superfluo perueniri re-
 scripserunt, cap. 2. C. in quibus caus.
 cessat.

8 CAETERVM ab vsucapione qui-
 bus modis longa possessione capio di-
 scernatur, videamus. Cum itaque o-
 mnis olim vsucapio ciuilis erat, nimi-
 rum lege decemuirali constituta, longæ
 deinde possessione capio partim ciui-
 lis, partim fuit honoraria, & quatenus
 ex principum constitutionibus, vel alia
 iuris parte constabat, ciuilis erat, legi-
 timam ciuilemque causam habebat; qua-
 tenus in facto versabatur prætoris iu-
 risdictioni relinquebatur. Hinc cum
 Modestinus emptorem prædij ex bonis
 vacantibus nondum nunciatis, quan-
 vis aduersus fiscum vsucapio non proce-

deret, nihilominus tamen rectè diutina possessione capturum respondisset, ne quis prætoris auctoritate fulturum illud existimaret, hæc verba subiecit, *Idq; constitutum est*, cap. 18. de usurpat. quibus non omnes longæ possessionis prærogativas honorarias, sed quasdam legitimas esse satis indicare vilis est. Nec aliter sanè vlucapionem à defuncto cœptam, ante aditam hæreditatem posse impleri constitutum esse scripsit Neratius cap. 40. de usurpat. Prærogatiuæ autem longæ possessionis de quibus nihil lege noua specialiter siue nominatim trahebatur, quòd essent prætoriæ, omnem ex prætoris iurisdictione substantiam capiebant. Proinde seruitutes diuturno vfu & longa quasi possessione iurè prætorio acquisitæ vtilibus actionibus, non directis, hoc est prætorijs, non ciuilibus, & interdictis quoque vtilibus vindicari respondit Vlpianus, cap. 10. si seruit vind. cap. 1. in fine, de aqua & aquæ plu. arcend. Quæ verò ipso ciuili iure longo vfu vel sine vfu alio quouis modo erant acquisitæ, directis, hoc est ciuilibus actionibus, non vtilibus,

bus, petebantur. Sic enim accipienda sunt hæc verba, *ad exemplum earum quæ ipso iure constitutæ sunt*, c. 1. in fine, de superfic. Quasi dixerit Vlpianus, seruitutes iure prætorio constitutas vtilibus actionibus peti ad exemplum earum quæ ipso iure constitutæ sunt : hoc est, quemadmodum ipso iure seruitutes constitutæ directis petuntur actionibus, ad earum exemplum actionibus vtilibus peti seruitutes iure prætorio constitutas. Non enim ipso iure, hoc est iure civili, vtilis competunt actiones, sed directæ. Solas namque actiones prætorias vtilis, civilesque item omnes vocari directas, suo loco probabimus. Et ita quidem iuris authoritate differunt longa possessione capio & usucapio.

9 TEMPORE verò sic discernuntur, ut hæc certo & exiguo, illa longo, eoque partim certo, partim incerto constaret. Tempus autem certum decem inter præsentēs, & inter absentes viginti annorum spacio terminari probauimus; incertum verò, ex vetustate cuius origo memoriam excesserat constabat. Nec quis in eum errorem incidat, ut

existimet vetustatem cuius diuersis responsis meminerunt prudentes, semper excedere memoriam oportere, tempusque exigere incertum, quin contra tempus diuturnum, & longum illud certum decem vel viginti annorum vetustatis interdum nomine contineri hinc defendi potest, quòd cùm vetustatem legis vicem tenere dixisset Vlpianus, addidit, velut interpretans vetustatem, eum qui diu vsus est seruitute neque vi, neque precario, neque clam, habuisse longa consuetudine velut ex iure impostam seruitutem videri, c. i. circa finem, de aqua & aquæ plu. arcend. Quo in loco vsus diuturnum longamque consuetudinem, quam decem vel viginti annorum spacio compræhendi ex Paulo probauimus, vetustatem appellare visus est Vlpianus. Ergo duplex vetustatis in quæstionibus rerum longo vsu acquirendarum erat consideratio. vñq enim modo per vetustatem longum certumque tempus intelligebant prudentes; altero ad naturæ legem, tempusque incertum quod memoriam excedebat, vetustatem trahebant. Vt autē

id

Id iure possideam cuius acquisitio memoriam excedit, non tam lex efficit constituta, quam humanis mentibus velut tabellis æneis insculpta naturalis constitutio. Quod satis intellexit Domitianus Imperator apud Suetonium, qui subsidia, diuisis per veteranos agris, quæ carptim superfuerant, veteribus possessoribus vt vsucapta relinquebat. Proinde rectè respondisse Scæuola mihi visus est, ductus aquæ quibus auctoritatem vetustas dederat, ab his qui iuri dicundo præerant, tueri solere tametsi ius nõ probaretur. c. finali, de aqua & aquæ plu. arcendæ: duplici, quam nos constituimus, vetustatis considerationi plane subscribens. Voluit enim vetustati locum esse siue poterat, siue non poterat probari ius, vt intelligo, auctoritatis, hoc est siue certum, siue incertum vetustatis tempus erat. vt si quidem certum erat, ius probaretur: sin incertum, vtique probari quanuis non posset, nihilominus tamen propter vetustatem, quæ originis memoriam aboleuerat, rectè aquæ ductum possessione acquisitum esse, quamuis alioqui nulla

quasi possessione longa sine titulo seruitutes acquiri poterant, vt suo loco disputabimus. Hæc cum non considerarent interpretes, conciliare plurima prudentium responsa voluerunt, quæ nulla opus conciliatione habebant. Nam quod cap. 10. Si seruit. vind. Vlpianus longum tempus aquæductui vsu acquirendo requirere visus erat; & Pomponius cap. 3. de ag. cot. & æst. tempus cuius origo memoriam excesserat, hæc duo vt conciliaret responsa Accursius, Pomponium de aqua quæ ex flumine publico, & Vlpianum de ea quæ ex priuato loco ducebatur, est interpretatus: cui nouissimè, omnium longè excellentissimus Cónanus subscripsit. Sed velim mihi respondeant Accursius & Connanus, si Pomponium, qui haud dubiè de huiusmodi distinctione ne somniauit quidem, de aqua ex priuato loco duccenda essent interpretati, an quid impediret quo minus aquæductus, si eius origo memoriam excessisset, iure constituti loco censi posset? Si enim vsu diuturno eum possis acquirere: quare, si tempore tam longo aquam duxisses, vt

ut eius origo omnem excessisset memoriam, iure aquæductum etiam sine titulo non acquisiuiſſes? Ergo non rectè vetuſtatem ſemper, hoc eſt ſiue certa ſiue incerta ſit, pro lege eſſe habendam dixiſſet Vlpianus eod. cap. 1. in fine. R. oinde ſic Pomponium eſſe intelligendum puto, quaſi non de aqua quæ ex flumine, ſed de ea quæ ex priuato loco ducitur, ſentiat. Nam reſponſi eius paragraphi ſic ſunt diſtincti, ut vnus alteri non cohæreat. Ergo, quominus ad priuatum locum, illum, de quo tractat Pomponius, aquæductum referamus, nihil impedit. Nec enim uero ad ductum aquæ longo uſu acquirendum, tempus cuius origo memoriam excedit, reſponſo ſuo requirit Pomponius: verum cum paſſim aquæductus longo & certo tempore, loco aquæductuum iure conſtitutorum habebantur, an ductus aquæ cuius origo memoriam exceſſerat, quanuis de certo uſus tempore, decem nimirum vel viginti annorum, non conſtaret, nihilominus tamen aquæductus iure conſtituti loco haberi poterat, in quæſtionem trahebatur. Certum illud

tempus quod edicto seruitutibus usu
 acquirendis statutum erat, propter au-
 thoritatis titulum, dubitationi causam
 dabat. Quasi in effectu apud Pomponiū
 in quæstionē venerit, an vt certo, sic et-
 iam incerto tempore seruitus aquæ du-
 cendæ usu posset acquiri, & Pomponius
 respōderit, ita demum sine titulo acqui-
 ri tempore incerto posse, si eius tempo-
 ris origo memoriā excefferat. Fortē
 prudentum autoritatē sic primū, mi-
 nuendarum litium causa erat constitu-
 tum antē Pomponij, ni fallor, tempora,
 quibus non ita dudum in locum vsuca-
 pionis longa possessione capio succeffe-
 rat. Secuti deinde Pomponium Vlpia-
 nus, Paulus, & Cernidius Scauola, quod
 Pomponij temporibus loco iuris regu-
 læ, sic enim loquitur Pomponius quasi
 regulam proferat, in usu erat, id com-
 mentarijs illustrius reddidere. Vlpianus
 sanē, c. 1. circa finem, de aqua & aquæ
 plu. arcend. his verbis: *Sanē enim & in ser-
 uitutibus hoc idem sequamur*, ius nouum au-
 thoritate prudentum introductum de-
 notare visus est. Omnis ergo longæ pos-
 sessionis prærogatiua certo aut incerto
 tem-

tempore terminabatur; certo, decem vel viginti annorum, interueniente titulo; incerto verò tempore, cùm eius origo omnem excederet memoriam, etiam sine titulo. & quæ longa possessione certa poterant acquiri, incerta quoque, si modo originis nulla extaret memoria, acquirebantur. Et hæc hæctenus de temporum differentijs.

IO N V N C porrò differentiarum, quas describere in animo habui, postrema pars longè difficilima restat, quæ longa possessione capio & vsucapio an loco differant, differendum est. Certè quidem si Iustiniano credimus, vel potius Triboniano, cuius industria institutiones, omnesque Iustiniani constitutiones editæ sunt, nulla erit dubitatio quin ita ab vsucapione discerni debeat longa possessione capio, vt in loco non conueniant. Tribonianus enim, Theophilus, & Dorotheus institutionum compilatores, anno vbique vno res mobiles, & immobiles biennio in Italico duntaxat solo vsucapi existimabant. §. 1. instit. de vsucap. Hinc principi Iustiniano Constitutionis nouæ
nou

noui fuerunt authores. principi enim
 optimo, qui faciles insipidis eorum con-
 silijs aures accommodabat, longæ pos-
 sessionis prærogatiuam locum in pro-
 uincijs duntaxat habuisse facile persua-
 dentes, constitutionis de vsucapione
 transformanda authoritatem defugere
 non potuerunt. Quid autem illis in
 mentem venerit, vt huius erroris au-
 thores se primos constituerent, ne di-
 uinatione quidem assequi me posse in-
 genuè agnosco. Nam quod vt in pro-
 uinciali, ita etiam in solo Italico longa
 possessione capioni locus fuerit antè
 Iustiniani tempora, manifestius est
 quàm vt disputationem sedulam requi-
 rat. Quis enim provincialibus indul-
 tum amplius beneficium credat, quàm
 ipsis Romanis ciuibus? Quòd autem
 beneficium sit longa possessione capio,
 satis indicat Vlpianus. quam enim lon-
 ga possessione capionem vocasse Iabo-
 lenum probauimus, illam longæ posses-
 sionis prærogatiuam Vlpianus appella-
 uit, cap. 5. de itiner. act. priuat. Ergo si,
 vt Asconius author est, iustū integrum-
 que beneficium prærogatiua significet:

longa.

longa possessione capionem beneficium esse inficiari nemo poterit. Ad hæc, eodem iure quo ciues Romani utebantur, vsos esse prouinciales hinc constat, quòd hi ius legesque suas ab illis accipiebant. Qui enim nouæ præfectus prouinciæ senatusconsulto erat declaratus, is leges à prætore Romano, quibus in reddendo iure utebatur, accipiebat. Eodem anno, inquit Liuius, primùm præfecti Capuæ creari coepti; legibus ab L. Furio prætore datis. dec. i. Libr. 9. Et certè nullam præsidibus, proconsulibus, reliquisque prouinciarum rectoribus, sine principis senatusue placitis in prouincijs noui iuris constituendi fuisse potestatem hinc probari potest, quòd rebus nouis sine rescriptis principum senatusue consultis auctoritatem nullam præstabant. cap. 6. de offic. procons. cap. 13. cum seq. de offic. præsid. Vt inde satis perspicuum sit, eodem ferè quo ciues Romani utebantur, vsos esse prouinciales iure, hoc est plebiscitis, senatusconsultis, & iisdem principum constitutionibus. Sed an edictis iisdem? Quantum ex Caij ad edictum

etum prouinciale commentariorum
 fragmentis, quæ in pandectis sunt, col-
 ligere possunt, parum edicta procon-
 sulum a prætorum edictis differebant.
 Edictum autem de usucapionibus in
 prouincijs extitisse indicat idem Caius,
 qui libro vigesimo primo ad edictum
 prouinciale, de usucapionibus com-
 mentarium scripsit, cuius pars extat, c.
 1. & c. 5. de usurpat. Et Romæ quoque
 prætorum inter edicta vnum de usuca-
 pionibus numerari, argumento est de
 usucapionibus Pauli commentarius,
 quem libro ad prætoris edictum quin-
 quagesimo quinto olim ediderat. Ergo
 proconsules in prouincijs, & Romæ
 prætores de usucapionibus edixerunt.
 Proconsules quidem, quod de ijs ex-
 pressa lege aliqua in prouincijs nihil erat
 constitutum. Sed cum Romæ antiqua
 lege de usucapionibus satis erat expres-
 se cautum: quò prætoris edictum refer-
 ri poterit, si ad legis emendationem nō
 referatur? Papinianus certè prætoris
 officium in adiuvando, supplendo, &
 corrigendo ciuili iure versari testatur
 c. 8. de iust. & iur. Quamobrem de his
 quæ

quæ lege sancita fuerant , nihil edixisse prætores , ni supplerent , vel ius ciuile edictis corrigerent , satis vt hinc probabile est , sic à nobis . satis hoc eodem commentario est disputatum . Et quod de adiuuando per prætorem ciuili iure Papinianus scribit , id non tam ad edictum , quàm ad nudum prætoris factum pertinet . ius enim sine facto , prætorisque , quod in viua voce constituit Martianus . auxilio subsistere nullo modo poterat , Lex ei ex stipulatu actionem dabat , qui stipulatus erat . ecquis autem agere ex stipulatu poterat prætore actionem eandem non decernente ? Cum itaque prætor edictum de vsucapionibus Romæ proposuerat , & lex decemuiralis æque de vsucapionibus expressè cauerat , eadem quæ lege continebantur , edicto contineri verisimile non est . Proinde quod in lege durum satis , & pro temporis qualitate iniustum prætori videbatur , id mitigatum edicto fuisse omnino mihi persuasum habeo . Tempus autem rebus immobilibus vsu acquirendis lege antiqua constitutum , prætoris
edicto

edicto subrogatum, subfectumque in e-
 ius locum tempus longum fuisse, diuer-
 sa responsorum exempla, quæ inter e-
 xiguas antiquitatum reliquias adhuc
 supersunt, satis demonstrant. Paulus e-
 nim eodem illo libro ad prætoris edi-
 ctum quinquagesimo quarto, quo de
 usucapionibus absolutum scripsit com-
 mentarium, Romæ & in solo Italico
 longæ possessionis prærogatiuæ locum
 fuisse expresse testatus est: Quintum
 Mutium Scauolam reprehendens, quod
 possessiones auctore magistratu rei
 seruandæ causa ventris nomine, quia
 damni infecti non caueatur decretas,
 inter possessionum genera referat, quas
 non possessiones, sed custodias potius
 rerum, & obseruationes dicendas exi-
 stimat; & ideo, inquit, cum damni infe-
 cti non cauente vicino in possessionem
 missi sumus, si id longo tempore fiat et-
 iam possidere nobis, & per longam pos-
 sessionem capere, prætor causa cognita
 permittit, cap. 3. in fine, de acq. possess.
 Quo quidem responso quid potest esse
 clarius? Paulus ita demum possessio-
 nem, damni infecti non cauente vici-
 no,

no,acquiri ex edicto scribit , si per longum tempus vicinus non cauerit. Paulus expresse longum tempus requirit: requirit etiam longum tempus Iulianus in specie non multum ab simili, cap. 15. §. Iulianus scribit, de dam. infect. Et tu Triboniane in solo Italico nullum existimas longæ possessionis prærogatiuæ locum fuisse? Possessionem ait acquiri longo tempore Paulus. Sed quomodo? An lege decemuirali, reliquarum vscapionum lege introductarum exemplo? Id Paulus negat; per longam inquit, possessionem capere prætor causa cognita permittit, Si igitur in Italico solo longæ possessionis prærogatiuæ locum non dederis, quomodo prætor permissurus est rem aliquam longa possessione capi? Si rem mobilem bona fide anno possederis, utique ut eam acquiras, prætor non est factururus, sed lex quæ solenne tempus rebus mobilibus vscu acquirendis præscripsit; verum sublata lege, ni prætor succurrat, quanuis annis pluribus possederis, nullā acquires tuæ possessioni ratam authoritatem, sine qua procedere nulla per vscum

C acqui-

acquisitio potest. Quod igitur Prætor
 edicto suo in longis possessionibus, o-
 mnibus bonæ fidei possessoribus suc-
 currebat, ex eo satis constat edicto sub-
 latum iuris antiqui remedium fuisse.
 Quoties enim ciuile aliquod supererat
 auxilium, proprium non præstabat præ-
 tor, quemadmodum ciuili competente,
 vtilem siue honorariam actionem non
 dabat. c. 9. in princ. de edend. c. 1. de dol.
 c. 1. de Publ. in rem act. Frustra igitur
 succurreret prætor, si possessio apud
 Paulum tempore aliquo legitimo po-
 tuisset acquiri. Et certè libro ad præto-
 ris edictum quinquagesimo tertio, lon-
 ga possessione capionem non directam,
 sed vtilem: hoc est, non ciuilem, sed præ-
 toriam actionem producere Vlpianus
 annotasse visus est, capite decimo, si
 feruit. vind. Proinde si directa compe-
 tente utilis actio dari non potuerat, vt
 probatum est; quâdoquidem Vlpianus
 vtilem dandam, non directam actio-
 nem scribit: omnem ex prætoris iuris-
 dictione substantiam capere, legis au-
 xilio destitutam, longæ possessionis
 prærogatiuam rectè concludes. Hinc
 fer-

seruitutes quæ prætorio iure constitutæ sunt, vtilibus tantum actionibus, & interdictis quoq; vtilibus non directis peti auctor est Vlpianus cap. 1. in fine, de superficieb. Hinc etiam qui longo tempore præscripsit. hoc est, qui probauit se tot annis quot ex edicto ad acquisitionem requirebantur fundum possedisse, nō directam, sed vtilem actionem habere dicebatur. c. 13. §. Iulianus, de iureiurand. Quibus quidem ex locis omnibus quanuis satis appareat prætoris edicto legem de vsucapionibus decemviraalem in rebus immobilibus in Italico solo subrogatam, inq; eius locum suffectam esse longa possessione capionem, omitti tamen non potuisse existimaui, Imperatores Diocletianum & Maximianum Numidio rectori Italiae rescripsisse, Id temporis quod in minore ætate transmissum erat, longi temporis præscriptioni non cōputari, eamque tunc currere incipere, quando ad maiorem ætatem dominus rei peruenit. c. 3. C. Quibus non obijcit. long. temp. præscrip. Siquidem in solo Italico nullus longi temporis præscriptioni

fuiſſet locus, rectori Italiae Imperatores reſcripſiſſent, frustra conſuli an quod in minore aetate tranſmiſſum eſt tempus praſcriptioni longi temporis poſſit computari, quod poſſeſſionis longae praerogatiua nullum in Italia locum habeat. Quandoquidem igitur non ita reſcripſerunt, ſed tempus illud tunc demum currere, quando ad maiorem aetatem minor peruenerit, tacite in Italia longae poſſeſſionis praerogatiuam locum habuiſſe indicare viſi ſunt. Denique innumeris prudentum reſponſis, quae frequenter in pandectis longi temporis, uſus diuturni, & longae poſſeſſionis mentionem continent, noſtra mirum in modum confirmatur opinio.

II Nec porro inficior iuris interpretes, eruditos ſane, nonnullos annoſaſſe in omnibus prudentum reſponſis quibus longae poſſeſſionis mentio fit, uſucapionem ſubrogatam, inq; eius locum longae poſſeſſione capionem a Triboniano ſuſſectam eſſe; duarum Iuſtiniiani epistoſularum argumento, quas de compoſitione digeſtorum & de nouo codice faciendo ſcripſit. Ego quidem,
ſaluo

salno faniore iudicio , semper existima-
 ui eandem compileribus authorita-
 tem dedisse Iustinianum in pandectis
 componendis , quam in codice facien-
 do dederat. Et quanuis permiserit illis
 Imperator, rescatis prælationibus , si-
 milibus, & contrarijs, ex tribus antiquis
 codicibus, Gregoriano , Hermogenia-
 no, & Theodosiano, suisque constitutio-
 nibus nouellis sic leges componere , sic
 congruis titulis subdere , vt in ijs com-
 ponendis adijcere, detrahere , imò et-
 iam verba, vbi hoc rei commoditas exi-
 gebat , mutare possent ; non tamen sic
 adijcere, diminuere , vel mutare verba
 potuerunt , vt vbi affirmatio erat, ibi
 negatio, vbi longum, ibi breue, vbi vsu-
 capio, ibi reponeretur longa possessio-
 ne capio: sed ea quæ de adiectione , di-
 minutione, & verborum mutatione Im-
 perator scripsit sic potius esse accipien-
 da, vt adiectione, diminutione , verbo-
 rumque mutatione , quæ varijs consti-
 tutionibus varijsq; responsis dispersa e-
 rant , in vnam sanctionem , vel legem
 colligi possent, ipsemet Iustinianus de-
 clarat in epistola quam de nouo codice

faciendo Constantinopolin ad senatum
 misit his verbis, *Adijcientes, & detrahentes*
imò & mutantes verba eorum, ubi hoc rei com-
moditas exigeret ; Sed quomodo ? Colli-
gentes verò in vnam sanctionem quæ varijs con-
stitutionibus dispersa sunt. Quod igitur di-
uersæ constitutiones sine detractiōe,
adiectiōe, & verborum mutatione in
vnam sanctionem redigi non potue-
rant, suis idcirco compilatoribus libe-
ram addendi, detrahendi, & verba mu-
tandi dedit Imperator potestatem. Ce-
terum in digestis componendis non
absimilem compilatoribus potestatem
tribuens idem Imperator, similem
quoque adiecit interpretationem. De-
dedit enim illis adijciendi vel diminuen-
di potestatem, sed quomodo ? An vt v-
sucapionem in longa possessione ca-
pionem transmutent ? Nequaquam, so-
la enim ea adijci vel diminui voluit quæ
superuacua, imperfecta, & minus ido-
nea videbantur. Tanta, inquit in epi-
stola de confirmatione pandectarum, à
nobis antiquitati habita est reuerentia
vt nomina prudentum taciturnitati
tradere nullo patiamur modo, sed vnus-
quis-

quisque eorum qui auctor legis est, nostris digestis inscriptus est: hoc tantummodo a nobis effecto, ut si quid in legibus eorum superuacuum, vel imperfectum, vel minus idoneum visum est, vel diminutionem, vel adiectionem necessariam accipiat, & rectissime tradatur regulis, & in multis similibus vel contrarijs, quod rectius habere apparebat, hoc pro alijs omnibus positum est. Iustinianus quid per adiectionem, & per diminutionem intelligi velit, declarat; eorum videlicet quæ ex similibus & contrarijs multis meliora sunt liberam quandam electionem, quæ concedi sine diminutione & adiectione non poterat. Ergo huiusmodi permissa eligendi potestate, permissa quoque videtur adiiciendi diminuendique auctoritas; sic quidem ut ex multis prudentum responsis, resecatis superfluis, imperfectis, & minus idoneis, additisque necessarijs, vnum caput vel lex vna componeretur per Tribonianum tamen multa esse in nostris pandectis immutata veterum iurisconsultorum responsa suo loco demonstrabimus.

12 Et quanuis etiam non veras semper, sed falsas, imo contrarias interdum sententias authoribus adscripsisse convinci possent compilatores, idcirco in locum vsucapionis longa possessione capionem eos surrogasse non rectè cōcludes. Quod enim Vlpianus eum qui vsu diuturno, & longa quasi possessione ius aquæ ducendæ nactus erat, vtilem habere actionem scribit, c. 10. si seruit. vind. ex eo satis constat, vera esse Vlpiani verba, quibus longæ possessionis mentio fit, non Triboniani supposititia. Si enim pro vsucapere, supposuisset longa possessione capere, eo capite Tribonianum contendas, vt totum caput eidem acceptum feras necessum est; tum quòd de vtili actione illo capite integro tractetur, quæ locum non habuisset, si vsucapionis Vlpianus meminisset; (erat enim vsucapio ciuilis, & ob id ciuilis dari debebat actio, qua competente vtilis decerni non poterat, c. 1. de Publ. in rem act. §. nanque si cui, instit. de actionibus, c. 21. de præscr. verb.) tum etiā quòd iure ciuili, nimirum per legem Scriboniam, vsucapio seruitutum sub-

sublata fuerat, c. 4. §. fi. de vsurpat. Simi-
 li modo si apud eundem Vlpianum, c.
 13. §. Iulianus, de iureiurand. Hæc ver-
 ba, *Post longi temporis præscriptionem*, sup-
 posititia dixeris, cur utilis in illa Iuliani
 sententia actionis mentio fit? An quòd
 longi temporis præscriptio omnem ex
 edicto originem trahebat? Id si conces-
 seris, Tribonianum: sin negaueris, Iulia-
 num repræhendas necessum est. Sed
 profectò tanti apud me nunquam Tri-
 boniani valuit authoritas, vt cum Iulia-
 no præferendum putarem. Proinde sic
 accipiendum hoc Iuliani apud Vlpia-
 num responsum puto, quasi tacitè dixe-
 rit, eum qui iuravit fundum suum esse,
 si longo tempore probauerit se fun-
 dum possedisse, utilem debere actio-
 nem habere idcirco, quod longæ pos-
 sessionis prærogatiua ex edicto consta-
 bat, ex quo utiles actiones compete-
 bant: cum contrà vsucapio quod ex le-
 ge descenderat, directas actiones pro-
 ducebat. d. c. 1. Ergo prætorum partim
 edictis, partimque principum constitu-
 tionibus nouis, vsucapionem, hoc est,
 tempus duorum annorum antiqua de-

æmuali lege rebus immobilibus vsu
 acquirendis constitutum, subrogatum
 fuisse, inq; eius locum longum tempus
 suffectum, tam Romæ & in Italico solo,
 quàm in prouincijs, iustè concludimus;
 potiùsque in historia lapsum cum suis
 Tribonianum, qui auctoritatem de v-
 sucapione transformanda Iustiniani
 Cæsaris constitutioni præstabat, quàm
 Vlpianum, Paulum, Iulianum, vel alios,
 edictorum iurisque antiqui interpre-
 tes, qui in suis ad edictum tam vr-
 bicum quàm prouinciale com-
 mentarijs longæ possessio-
 nis prærogatiuæ me-
 minerunt.



AD LEG. SCRIBON. 22
SUMMA HVIVS COM-
MENTARII CAPITA.

1. De lege Scribonia, & quare vsucapi seruitutes non potuerint.
2. Quo iure introducta primùm fuerit seruitutum vsucapio.
3. Ante Scriboniam legem iure civili seruitutes vsucapi potuisse.
4. An ipso iure ante Scriboniam legem vsucapi potuerint seruitutes.
5. Quid sustulerit lex Scribonia, & vsucapio seruitutum honoraria quomodo sit introducta.
6. In seruitutibus rusticorum prædiorum an lex Scribonia locum habuerit.
7. An titulus in vsucapione seruitutum fuerit necessarius.
8. Et an bona fides etiam necessaria fuerit.

NOVI QVAVNDAM
LEGVM INTELLECTVS
ex Pandectis.

- | | | | |
|----|-----|---------------------|--------------|
| L. | 14. | de seruitut. | cap. 1. |
| L. | 2. | Comm. prædior. | cap. 2. |
| L. | 10. | si seruit. vind. | cap. 7. |
| L. | 12. | Quemad. ser. amitt. | cap. 7. |
| L. | 4. | §. si. de vsurpat. | cap. 5. & 6. |

Ex

L. 1. de seruit. & aqua.

cap. 5.

L. 2. Eod. tit.

cap. 8.

A D L E G E M S C R I B O -
N I A M L I B E R S I N -
gularis.

I A C. R A E V A R D I, I. C.

S T A T V E N T I mihi legem
Scriboniam de sublati serui-
tutum vsucapionibus enarra-
re, curiosius inquirendum non
est quis hic Scribonius, & an lex eius
consularis, an verò tribunitia fuerit. Ni-
hil enim certi habemus: quamobrem
coniecturæ locus dabitur. Existimo
fuisse Lucium Scribonium Libonem, L.
Scribonij Libonis illius filium qui sub
Augusto consulatu functus est. Hic sub
Tiberio cum Sefenna Statilio Tauro
consul fuit: cuius etiam Dion Cassius
meminit, lib. 57. Ait enim Tiberium Im-
peratorem hunc Lucium Scribonium
Libonem patricium adolescentem, plu-
rimarum nouarum rerum insimulatum,
quandiu firma fuerat valetudine non
voca-

vocasse in ius, sed lethali morbo correptum in lectica operta; cuiusmodi senatorum vxoribus in vsu erant, in senatum inferri iussisse: illatúmque Scribonium dilato iudicio sibi ipsi conscita morte damnationem præuertisse. Proinde consularem hanc legem fuisse, & temporibus Tiberij primum latam existimo: quibus non ita dudum in locum vsucapionis longa possessione capio successerat. Illud certè constat, ante legem Scriboniam vt seruitutis libertatem, sic seruitutem libertatis vsucapi iure civili potuisse: ciuilémque deinde seruitutum vsucapionem salua libertatis vsucapione sustulit lex Scribonia, c. 4. in fi. De vsurpat. Et quandoquidem in vsucapionibus duplici opus erat possessionis causa, vna iuris, & altera facti, quemadmodum in Triboniano est expositum: eueniebat sæpenumero, vt res quædam iure, quædam facto vsucapionem non reciperent. Cùm enim de rebus sacris, publicis, & liberis hominibus erat cōtrouersia, de iure duntaxat quæstionem fuisse certum est. In facti enim causa cum alijs rebus quæ vsucapi poterant,

terant, satis conueniebant : sed quia lege earum rerum prohibita erat alienatio, ideo iure vsucapi non poterant. Seruitutes verò quominus per vsum acquirerentur nulla iuris impediēbat ratio, sed quia possessionē requirebat vsucapio (c. 25. de vsurp.) quæ in seruitutibus desiderabatur, quod erant incorporales : c. 32. in fi. de seruit. vrb. præd. c. 43. de acq. rer. dom. sola facti causa impedisse videtur quominus per vsum seruitutes acquirerentur. seruitutes prædiorum rusticorum etiam si corporibus accedunt, quia tamen incorporales sunt, idcirco vsucapi potuisse negabat Paulus, cap. 14. de seruit. Et quia eius sunt conditionis huiusmodi seruitutes, vt possideri non intelligantur, cap. 4. §. pen. de vsurpat. nimirum eo modo quo res corporales intelliguntur possideri, hoc est, sine vsu, vt in Triboniano scripsi: Paulus huiusmodi ratione non contentus addidit vel ideo non vsucapi rusticorum prædiorum seruitutes, quia tales sunt vt non habeant certam continuamque possessionem : videlicet qualis in vsucapionibus desiderabatur, c. 3. de vsurpat. Eiusque conditionis esse urbano-

banorum prædiorum seruitutes, vt etiam ex sui natura vsucapionem non admittant, addidit Paulus quia nimirum ex sui natura non magis verè possidebantur seruitutes vrbanae, quàm aliæ rusticorum prædiorum seruitutes, cap. 32. de seruit. vrb. præd. hæc si considerasset Eguinarius Baro, non eam Paulo fecisset iniuriam, vt contenderet huius rei rationem non satis virum prudentissimum compertam habuisse. Non enim negauit Paulus quin vsu seruitutes possent acquiri: sed eius esse conditionis seruitutes indicat, vt vsucapionem admittere ex sui natura non videantur. Quod enim in vsucapionibus opus erat possessione, quæ in seruitutibus tam vrbano- rum quàm rusticorum prædiorum, reliquarum rerum incorporalium exemplo, desiderabatur, ex sui natura, vsu seruitutes acquiri nullæ poterant.

2 C V M itaque de vsucapionibus legem edidissent decemviri, qua rebus mobilibus anni & immobilibus bien- nij spacium præscribebatur, nihil de seruitutum vsucapionibus constitue- runt: quod tales essent seruitutes, vt possi-

possideri non possent, nec per consequens vsucapi. Sed tandem quia intererat reipublicæ seruitutum vsucapionem possessionis quadam fîctione, aliqua iuris auctoritate ratam haberi: quòd à decemviris de vsucapiendis seruitutibus erat omissum, id ab ijs prudentibus suppletum fuisse puto, qui ius ciuile non scriptum constituebant. Legibus enim 12. tabularum perlatis, ius à prudentibus constitutum fuisse, quod communi quodam nomine appellabatur ius ciuile author est Pomponius, c. 2. de orig. iur. A quibus quod in legibus prætermisum erat aut fuisse imperfectum, suppletum perfectumque fuisse omnino mihi persuadeo. Et certè parum constare ius potuisset, vt idem Pomponius scribit, nisi fuissent huiusmodi iuris periti per quos ius constitutum quotidie in melius produci posset. d. c. 2. §. post originē. hinc quòd vere seruitutes vsucapi non poterant, de ijs vsucapiendis nihil constituerunt decemviri: prudentes verò, pro ea qua præditi erant iuris constituendi & interpretandi potestate, plurima quæ accidere natura non

non poterant accidere fingeant : ut
 seruitus , quia corporalis erat , fieri non
 poterant ut ea possideretur : pruden-
 tes tamen fingeant possideri seruitu-
 tem , eamque quasi possideri dicebant ,
 c. 23. §. item ei qui , Ex quib. caus. maior ,
 c. 10. Si seruit. vind. Et quanuis natura
 non possideretur , nihilominus natura-
 liter possideri seruitus videbatur . c. 12.
 de acq. possess. nimirum sola , quam pru-
 dentes utilitatis gratia excogitaue-
 rant , fictione : quæ eius erant efficaciæ ,
 ut illis quæ non erant , cum ijs quæ e-
 rant æqualem semper auctoritatem tri-
 bueret , d. §. item ei qui . Esse autem ea
 dico , quæ (ut scribit in topicis Cicero)
 cerni tangiue possunt : & non esse , quæ
 quanuis tangi non possunt cerni tamen
 animo atque intelligi possunt , cuius ge-
 neris est seruitus , usufructus hæreditas , &
 si quæ sunt alia quæ in sola mentis ima-
 ginatione ambulant . Ergo seruitutes
 non usufructuebantur ex sui natura : usu-
 fructuebantur prudentum auctoritate :
 rursus , non usufructuebantur verè , usufruc-
 tuebantur quadam fictione , seu potius
 (ut utar Senecæ verbis) imagine & qua-
 dam

dam translatione. Et proinde quemadmodum quasi possideri, ita passim quasi usufructuarii servitutes dicuntur. Quod tamen sic accipere conuenit, non ut semper usufructuariis aut possessionibus servitutum addenda fuerit particula *Quasi*, aut alia similis. eam enim à prudentibus sæpius omissam fuisse nec dubium est nec absurdum, ut in c. 2. Cōm. præd. Cum enim legimus servitutes possideri: quia scimus fieri non posse ut res incorporales possideantur, facile animo cōprehendimus ad verbum *Possidere* demonstrandæ rei causa duntaxat prudentes descendisse, illudque ad naturam subiecti sic referri, ut quid possideri intelligatur eo modo quo possideri potest. Proinde si res corporalis sit quæ possidetur, verè eam possideri: si incorporalis, quadam fictione, hoc est, quasi possideri illam interpretabimur. Quomodo beneficium creditum appellatur apud Senecam, cum tamen creditum res non sit per se expetenda. Sed cum creditum dicimus inquit Seneca, imagine & translatione utimur. sic enim & legem scimus iusti iniusti; regulam esse.

esse, & regula non est res per se expetenda: adhuc verba demonstranda rei causa descendimus. cum dico creditum, intelligitur tanquam creditum, hac Seneca lib. 4. de beneficijs, c. 12. Simili modo cum dicimus vsucapi vel possideri servitutes, quia tales sunt ut nec possideri nec vsucapi ex sui natura possint, intelligimus eas quasi possideri & tanquam vsucapi. Sic hereditatem vsucapi dixit Cicero ad Atticum lib. 1. pro quasi vsucapi de Tadiana re, inquit, mecum Tadius locutus est te ita scripsisse, nihil esse iam quod laboraret, quoniam hereditas vsucapta esset: id mirabamur te ignorare de tutela legitima, in qua dicitur esse puella, nihil vsucapi potuisse. hereditas enim quod eandem cum servitutibus naturam haberet, nimirum quod esset incorporalis, vsu reliquatam rerum incorporalium exemplo non acquirebatur, sed quasi vsucapi poterat.

3 CETERVM ante Scriboniam legem moribus siue prudentum auctoritate siue lege olim introductam fuisse servitutem vsucapionem, probare est opera precium. Iurisconsultorum, inquit Se-

D 4 neca,

neca, istæ acutæ ineptiæ sunt, qui hæreditatem negant vsucapi posse, sed ea quæ in hæreditate sunt, tanquam quicquam aliud sit hæreditas quàm ea quæ in hæreditate sunt, lib. 6. de benefic. c. 5. Ex quo loco satis perspicuum est, seruitutum, quemadmodum & hæreditatis reliquarumque rerum incorporalium nõ vsucapionem, sed aliquam quasi vsucapionis speciem sine lege sola prudentum interpretatione vsu fuisse receptã. A quo non omnino dissentire visus est Marcus Cicero, qui vsucapionem fundi legibus, & seruitutum vsucapionem non legibus, sed ciuili iure introductam fuisse, diu ante Scriboniam legem expressè testatus est pro Cæcinnâ. Fundus, inquit, à patre relinqui potest; at vsucapio fundi, hoc est finis sollicitudinis & periculi litium, non à patre relinquitur, sed à legibus: aquæductus, haustus, iter, actus, à patre: sed rata auctoritas harum rerum omnium à iure ciuili sumitur. Ecce, fundi vsucapionem legitimam esse contendit Cicero: ratam verò auctoritatẽ seruitutum non legitimam, sed ciuilem: quasi non legibus, sed ciuili
 pru-

prudentum interpretatione (quæ prælati legibus decemviralibus communi quodam iuris ciuilis non scripti nomine continebatur) seruitutum vsucapio fuerit introducta: vt ita quidem vsucapio rerum corporalium ex scripto, incorporalium verò ex non scripto iure constitisse videri possit. Nam sic ex scripto & non scripto ius ciuile constabat, vt quod ciuile erat, non statim legitimum foret: sed contrà, quod erat legitimum, id statim ciuile fuisse suo loco probabimus. Accedit quod in eadem oratione pro Cæcinnâ, à legibus ius ciuile expressè distinxit Cicero, de vsucapionibus rerum corporalium & incorporalium promiscuè differens hunc in modum. Quid enim refert ædes aut fundum relictum à patre, aut aliqua ratione habere bene partum, si incertum sit quæ cum omnia tua iure mancipij sint, ea possis ne retinere? Quid, inquam, prodest fundum habere, si quæ decentissimè descripta à maioribus iura finium, possessionum, aquarum itinerumque sunt, hæc perturbari aliqua ratione commutarique possunt? Mihi crede,

dite, maior hæreditas venit vnicuiq; ve-
 strum in iisdem bonis à iure & à legibus,
 quam ab ijs à quibus illa relicta sunt.
 Nam vt perueniat ad me fundus testa-
 mento alicuius fieri potest, vt retineam
 quod meum factum sit, sine iure civili
 non potest. Hæc Cicero. Ecce, de iure fi-
 nium possessionum, aquarum, itinerum-
 que promiscue differens Cicero, iuris &
 legum meminit. Vnde satis probabile
 est, non eodem iure quo de vsucapioni-
 bus seruitutum, de possessionum, hoc
 est prædiorum vsucapionibus veteres
 egisse: vt sic lege quidem de vsucapien-
 dis possessionibus, iure verò sine lege
 de seruitutibus per vsum acquirendis
 contendisse videri possint. Rerum igitur
 corporalium vsucapio legitima &
 civilis erat: seruitutum verò civilis tan-
 tum, quod ea sine lege ex sola pruden-
 tum auctoritate constabat.

4 PORRO ante Scriboniam legem
 non tantum in vsu fuisse seruitutum vsu-
 captionem moribus constitutam, vt pro-
 batum est: sed etiam ipso iure vsucapi
 potuisse & iterum non potuisse ipso iu-
 re vsucapi seruitutes, eleganter defendi

potest. Nam si per ipsum ius iuris ciuillis quod ex prudentum interpretatione veniebat auctoritatem intellexeris, non dubium est quin vsu ipso iure acquiri seruitutes potuerint. Verum si ad leges decemuirales, aut aliam iuris constitutionem scriptam ipsum ius retuleris, magis erit; vt vsu seruitutes acquiri ipso iure non potuerint. Ipsum siquidem ius sic prudentes interpretati sunt, vt illud interdum ad leges duodecim tabularum omnino retulisse videantur. c. 26. C. de pact. cap. 6. C. Famil. hertisc. Et ad mores siue ius illud ciuile quod sine scripto ex sola prudentum interpretatione constabat, ipsum ius etiam pertinuisse hinc potest probari, quod quum moribus Romæ prohibitam esse inter virum & vxorem donationem Ulpianus ad Sabinum scripsisset, cap. 1. de donat. int. vir. & vxor. idem ad eundem Sabinum ipso iure quæ inter virum & vxorem donationis causa tractabantur, nullius fuisse momenti expresse testatus est, cap. 3. §. 6. eod. tit. Quibus adde quæ cap. 1. ad senatusconsult. Velle. ex Paulo annotata sunt. Deniq; ad ea quæ

nullum omnino factum, quæq; nullum prætoris auxilium requirebant, etiam ipsum ius referebatur. c. 28. Mand. c. 17. Pro socio. c. 10. & 21. de compens. quomodo per stipulationem stipulatio ipso iure tolli dicebatur, c. 27. de pact. & hæc quidem sic olim erant in usu ante Scriboniam legem.

§ LATA deinde lege Scribonia civilis hæc servitutum usufructus penitus exolevit: & quæ antea civili iure duorum annorum spacio acquirebantur servitutes, statim post Scriboniam legem ex edicto prætoris acquiri longo tempore cœperunt. Scribit enim Aggenus Urbicus in Frontinum, biennio iter quod in usu erat usufructui potuisse. Iter, inquit, non qua ad culturas peruenitur, capitur usu, sed id quod in usu biennio fuit. Quinque enim aut sex pedum latitudinem in agrorum finibus constituit lex Mamilia: eamque iter ad culturas accedens sic occupabat, ut usufructui non posset. Iter igitur quæ ad culturas peruenitur, hoc est commune illud iter quod ex lege Mamilia aliquam itineris publici naturam induerat, usu reliquarum

rum rerum publicarum exemplo non
 acquirebatur : sed quod in usu biennio
 fuit, hoc est, sed illud iter rectè capieba-
 tur usu, quo quis priuato quodam &
 proprio seruitutis iure usus erat bien-
 nio. Vt ita quidem seruitutes ante Scri-
 boniam legem biennio usu captas fuisse
 non sit dubium. Fuisse autem latam
 hanc legem Tiberij temporibus hinc
 conijcimus, quod ea in usu non fuerit
 Ciceronis temporibus quibus nostri
 Scribonij pater Lucius Scribonius Libo
 consulatu alijsq; muneribus publicis
 probè perfunctus est. Scribit enim pro
 Cæcinna Cicero, suis temporibus usu-
 captionem seruitutum fuisse ciuilem, ci-
 uilique iure earum auctoritatem ratam
 fuisse habitam : quam deinde sub Tibe-
 rio lege lata sustulisse visus est L. Scribo-
 nius Libo L. Scribonij Libonis illius, vt
 suspicamur, filius, qui Ciceroni vt po-
 pularis, sic quasi coætaneus fuit. Quo
 quidem tempore quia Romæ in locum
 ciuilis vfucapionis in rebus immobili-
 bus longa possessione capio honoraria
 successerat, vt in Triboniano diximus,
 quam sustulit Scribonius seruitutum v-

ſucapionem, eam noua quādam longa poſſeſſionis prærogatiua defendebat prætor. Quod enim c. 10. ſi ſeruit. vind. de ſeruitutibus vſu diuturno & longa quaſi poſſeſſione acquirendis diſſeritur, quodq; illius capituli inſcriptio Domitiū Vlpianum ad edictum lib. 53. auctorem continet, ſatis hinc eſt probabile, in locum vſucapionis ſeruitutum ciuiliſ. lege Scribonia ſublataꝝ edicto ſuo nouam aliquam longa quaſi poſſeſſione capionem ſeruitutum prætorem ſurrogaffe: eamque deinde Imperator Antoninus reſcripto quodam expreſſo etiam confirmaffe viſus eſt hiſ verbis: *Is qui iudex erit, longi temporis conſuetudinem vicem ſeruitutis obtinere ſciet.* cap. 1. C. de ſeruit. & aqua. Vt ita quidem antiquo iure duorum annorum ſpacio, nouo vero longiore tempore, hoc eſt, decem inter præſentes, & inter abſentes viginti annorum quaſi poſſeſſione omnes olim ſeruitutes acquiſitas fuiſſe, nec dubium nec obſcurum cuiquam videri debeat.

6 HÆC quia non conſiderauerant viri docti nonnulli, exiſtimabant legem Scriboniam ad ruſticorum prædiorum

ſer-

seruitutes non pertinuisse, quod veris-
 simile mihi nunquam videri potuit. Si e-
 nim autē Scriboniam legem nunquam
 in vſu fuiſſe huiusmodi ſeruitutum vſu-
 cationem exiſtimant, falluntur. Cicero-
 nis enim temporibus ciuili iure earum
 auctoritatem ratam fuiſſe habitam ſatis
 probatum eſt. Sin verò idcirco conten-
 derint ruſticas ſeruitutes ad Scriboniā
 legem non pertinuiſſe, quia de liberta-
 tis vſucapione eo loco tractatur quo le-
 gis Scriboniæ mentio fit, non ſatis pro-
 babile argumentum huiusmodi poteſt
 videri: quaſi verò idcirco ſeruitutū ru-
 ſticarum vſucap. Scribonius non ſuſtu-
 lerit, quòd in eo loco in quo de lege
 Scribonia tractatur, libertatis vſucapio-
 nis mentio fit, quæ in vrbaniſ duntaxat
 ſeruitutibus locum obtinebat, c. 4. §. ſi.
 de vſurp. Quin contrā, quòd ante Scri-
 boniam legem ciuiliſ ſeruitutum tam
 ruſticorum quàm vrbanoꝝ prædio-
 rum in vſu erat vſucapio, quæ poſt ean-
 dem legē non ciuiliſ amplius, ſed hono-
 raria longa quaſi poſſeſſione termina-
 batur, ſatis hinc poteſt intelligi, vt vrba-
 noꝝ, ſic etiam ruſticorum prædiorū
 ſer-

seruitutum vsucapionem civilem lege Scribonia sublatam, inq; eius locum longa quasi possessione capionem à prætore surrogatam fuisse. Civilem enim vrbicularum seruitutum vsucapionem ante Legem Scriboniam in vsu fuisse non est obscurum, si consideremus eam sustulisse lege lata expressè Scribonium; quæ deinde post Scriboniam legem in honorariam longa quasi possessione capionem transibat. c. 10. de vsurpat. Rusticarum autem seruitutum vsucapionem civilem etiam ante Scriboniam legem in vsu fuisse ex Cicerone probatum est: quæ similiter post eandem legem longæ quasi possessionis quadam prærogatiua per prætorem sustinebatur. c. 10. si ser. vind. Quum igitur eadem semper fuerit rusticarum & vrbicularum seruitutum in vsucapionibus conditio: quid impediuiſſet quæſo quominus vtramque lege sua sustulisset Scribonius? Ergo omnes omnino seruitutes ex sui natura vsucapionem non recipiunt: quia licet corporibus accedunt, incorporales tamen sunt, & idcirco vsu non capiuntur. c. 14. de seruit. cap. 32. de ser-

feruit. vrb. præd. Vſucapiebantur tamen iure ciuili ante legem Scriboniã, c. 4. §. ſi. de vſurpat. Cic. pro Cæcinnâ. Quam ciuilem vſucapionem ſuſtulit deinde lex Scribonia, d. §. ſi. Prætor deniq; longæ poſſeſſionis quadam prærogatiua ratas haberi voluit earum ſeruitutum auctoritates, quarum Scribonius vſucapionem ciuilem ſuſtulerat, cap. 10. ſi ſer. vind. cap. 10. de vſurpat. cap. 1. §. ſi. de aqua & aq. plu. arc. cap. 1. & 2. C. de ſer. & aqua. Vt ita quidem iure prætorio ſeruitutes lōgō tempore acquiſitas fuiſſe probabile ſit, quæ ante Scriboniam legem iure ciuili duorum annorum ſpacio acquirebantur.

7 C E T E R V M an titulus in vſucapione ſeruitutum neceſſarius fuerit, hîc commodè diſputari poterit. Et vulgo quidem receptum eſt, eum neceſſarium non fuiſſe, propter hæc Vlpiani verba :
Si quis diuturno vſu & longa quaſi poſſeſſione ius aquæ ducendæ naſtus fuerit, non ei neceſſe eſt docere de iure quo aqua conſtituta eſt, veluti ex legato, vel alio modo, ſed vtilem habet actionem vt oſtendat per annos, forte tot, vſum ſe non vi, non clam, non precario. cap. 10. ſi ſer=

seruit. vind. Verùm huiusmodi sententia subscribere nunquam potui. Quid enim aliud est, docere de iure quo aqua constituta est, quàm probare an iuste aqua sit constituta? Quid item est aliud ostendere vsum se non vi, non clam, non precario; quàm aliquem auctoritatis titulum proferre? Quomodo enim docere poteris, te non vi possedisse, nisi auctorem tuum à quo possessionem nactus es, nominaueris? Et qua ratione ostendes te non clam possedisse, nisi te sine aliquo celandi animo prædij seruientis domino tuam possessionem denunciassse probaueris? cap. 3. in fi. Quod vi aut clam. Quì deniq; probabis te non precario possedisse, nisi manifestum feceris qua auctoritate ius aquæ ducendæ nactus fueris? Ergo utilis quandoquidē tibi competat actio ad ostendendum, docendū probandumve tot annis quot ad acquisitionem iure prætorio requirebantur, non vi, sed iure, non clam, sed sciente per tuam denūciationem domino, non precario, sed titulo acquisitionis iusto te aquam duxisse, quis obsecro in vsucapione seruitutum titulum fuisse
 necessa-

necessarium amplius inficiari poterit?
 Nónne is qui docet se non vi possedisse,
 se iure possedisse probat? Rursus, qui o-
 stendit se non precario possedisse, nón-
 ne iustum allegare suæ possessionis titu-
 lum tenetur? Quomodo enim probabo
 me non precario possedisse, nisi doceam
 ex legato vel ex donato vel alio quouis
 iusto titulo possessionem me iustam ac-
 quisivisse? Si igitur ius aquæ ducendæ
 nactus fuisses diuturno usu, tibi non e-
 rat necessum de iure quo aqua constitu-
 ta erat docere: hoc est nō debebas pro-
 bare iure aquam esse constitutā. Veluti
 si bona fide fundum emisses cui servitus
 antequam emerat debebatur, illumq;
 cum servitute longo tempore possedis-
 ses, non fundū duntaxat, sed etiam ser-
 vitudinem per usum acquirere poteras, c.
 12. Quemadmodum servit. amit. Nec
 facta deinde servitutis controuersia tibi
 necessum erat docere de iure quo ser-
 vitus esset constituta, hoc est (vt Celsus
 interpretatur) non debebas probare
 an iustè eam possideres: quia qui fundū
 cum servitute bona fide longo tempo-
 re possederat, etiamsi aut vi, aut clam,
 aut

aut precario seruitus esset constituta, nihilominus usu diuturno ea ab emtore retinebatur. Fundus enim, inquit Celsus, qualiter se habens, ita cum in suo habitu possessus est ius seruitutis non deperit, neque refert iuste nec ne possideat qui talem eum possidet, d. c. 12. De iure tamen auctoritatis docere debebat qui longi temporis uti prerogatiua in seruitutibus postulabat: nimirum ostendebat si seruitus vi constituta diceretur, se sine vi eam possedisse: si clam, se palam sciente domino in possessionem venisse: si precario, se iusta quadam auctoritate siue titulo usum esse seruitute: non autem probare cogebatur eum qui seruitutem constituerat, non vi, non clam, non precario constituisse, d. c. 12. Ius enim aquæ constitutum ad eum spectat qui seruitutem libero alicui fundo imponit, non autem ad eum qui impositam seruitutem longa quasi possessione nactus est. Cic. ad Quintum fratrem, lib. 3. epist. Fundum audio te hunc Bouilianum velle retinere: de eo quid videatur ipse constitues. Calus aiebat aqua dempta; & eius aquæ

quæ iure constituto, & seruitute fundo illi imposita, tamen nos precium seruare posse si vendere vellemus. Ecce, ius constitutum aquæ refert ad originem seruitutis Cicero: quod etiam Vlpianum fecisse non dubito. Vt ita quidem non videatur ei qui ius aquæ ducenda tempore nactus erat, necessum fuisse docere de iusta seruitutis origine apud Vlpianum, qualis est seruitus quæ ex legato, donato, emptione, aut alijs modis legitimis in libero fundo constituitur.

8 AN autem bona fides in vsucapionibus seruitutû requirebatur, scio quæsitum. Equidem eam necessariam fuisse nunquam dubitavi: tum quòd seruitute vsum non videri scribat Paulus nisi cum qui suo iure vti se credidit, c. si. Quemadmodum seruit. amit. tum etiam quòd is qui longa quasi possessione seruitutem acquirere volebat, ostendere (vt modò diximus) & probare debebat, non vi, non clam, non precario eam se possedisse, c. si seruit. vind. Quòd igitur hæc tria probare debebat possessor, miror à viris doctis nonnullis traditum esse mala fide seruitutes acquiri potuisse.

E

Sed

Sed illis fortè obsecrum satis Imperato-
 ris Antonini rescriptum quoddam im-
 posuit. Si aquam, inquit Antoninus, per
 possessionem Martialis eo sciente duxi-
 sti, seruitutem exemplo rerum immo-
 bilium tempore quæsiuisti. c. 2. C. de ser-
 uit. & aqua. Ecce, seruitutes acquiri tem-
 pore rerum immobilium exemplo scri-
 bit Antoninus, hoc est, nō solū sciente,
 vt alij interpretantur, fundi seruiantis
 domino, sed etiā vt cum eius scientia &
 titulus & bona fides concurrant. Quod
 enim non vi, non clam, non precario o-
 mnis acquiri tempore seruitus debebat,
 consultus Antoninus. an quis clam, hoc
 est, insciēte domino sine denunciatione
 ius aquæ ducendæ possit acquirere, re-
 spondit seruitutem eum acquisiuisse qui
 aquam duxit per possessionem Martialis
 eo sciente, hoc est, nō clam. d. c. 2. & c. 4.
 in fi. Quod vi aut clam. Vt ita exemplo
 rerum immobilium tempore seruitutes
 acquirantur, hoc est, bona fide & iusto
 interueniente titulo. Hæc autem eius-
 dem rescripti verba: *Quod si ante id spacium
 eius vsus tibi interdictus est, frustra sumptus in
 ea re factos præstari tibi postulas, ad superio-*

ra non pertinent: proinde sic accipienda puto, quasi diceret Imperator: si cum sciente domino possideres, tamen quia non iure possidebas, usus seruitutis tibi fuerit iudicis pronuntiatione interdictus: si quidem ante tempus usucapionis, frustra sumptus tibi præstari postulabis: si post illud tempus, existimarem præstandos esse. Sunt igitur huius responsi duo capita: vnum, quo consultabatur Antoninus, an clam, hoc est, in scio fundi seruiensis domino sine aliqua possessoris denunciatione acquiri tempore fertilitus poterat: alterum, an is qui in seruitute quam suo prædio deberi contendebat, vindicanda succubuit, poterat sumptus quos fecerat vindicare. ad prius caput respondit Antoninus, clam, hoc est, sine denunciatione, in scio prædij seruiensis domino usu diuturno seruitutem acquiri non potuisse: ad posterius verò respondens, distinctione uti visus est; ut si quidem ante tempus illud quod in usucapionibus seruitutum observabatur, interdictus possessori fuisset usus seruitutis, sumtus restituendi non essent: si vero post illud

tempus, utique restituendi viderentur.
Et ita in usufructuionibus seruitutum non
titulus tantum, sed etiam bona fides re-
quirebatur.

CAPITA HVIVS LI-
BRISINGVLARIS.

Capit.

- I. De legibus populi Romani.
- II. De priuilegijs sublati.
- III. De patria potestate.
- IV. De prisco patronatus iure.
- V. De in ius vocando.
- VI. De prisco iure vindictiarum.
- VII. De litis addictione.
- IIIX. De nexis.
- IX. De vindicibus.
- X. De testibus.
- XI. De eius cui testimonium defuit ob-
uagatione.
- XII. De tutelis.
- XIII. De curatoribus furiosi, vel prodigi.
- XIV. De seruitutibus itineris, actus, &
vie.
- XV. De sumtibus funerum, & iure sepul-
chrorum.
- XVI. De mancipationibus.


XVII. De

- XVII. De usucapionibus.
 XIX. De testamentis.
 XIX. De successione ab intestato.
 XX. De connubio patrum.
 XXI. De diuortijs.
 XXII. De tigno iuncto.
 XXIII. De frugum excantationibus.
 XXIV. De damno dato.
 XXV. De iniurijs, & famosis libellis.
 XXVI. De furtis.
 XXVII. De publicis iudicijs & capitalibus.
 XXIX. Miscellanea quedam.

I A C. R A E V A R D I, I. C
 A D L E G E S X I I. T A B.
 L I B E R S I N G V -
 laris.

C A P. I.

De legibus populi Romani.


 O P V L V S Romanus vt legem
 ferre, sic legem antiquare, &
 abrogare potuit. Antiquabat
 legem, quæ non perfereba-
 tur. Quo sensu antiquatam fuisse Tribu-
 niciam rogationem de Veios commi-
 grando, scripsit libro quinto Liuius.

Postquam enim Tribuni plebem assidu-
 uis concionibus agitassent, ut relictis
 Romanæ ciuitatis ruinis, in urbem pa-
 ratam Veios transmigrarent, tādē an-
 tiquata, inquit Liuius, huiusmodi lege,
 vrbs ædificari cœpta est. Quæ autem se-
 mel perlata iterum tollebatur, lex illa
 abrogari dicebatur. Lex, inquit Vlpia-
 nus, aut rogatur, id est, fertur: aut abro-
 gatur, id est: prior lex tollitur. Et huius
 quidem abrogationis ea fuit auctori-
 tas, ut nouis legibus antiquæ abrogatæ
 cederent, quemadmodum Varro testa-
 tus est lib. 8. de lingua Latina. Annō, in-
 quit, sæpe veteres leges abrogatæ nouis
 cedunt? Cicero quoq; ad Atticum lib. 3.
 auctor est, nunquā esse obseruatas san-
 ctiones earum legū, quæ abrogarentur.
 Nam si id esset, inquit, nulla ferē abro-
 gari posset: neq; enim vlla lex est, quæ
 non se sepiat difficultate abrogationis.
 Ceterū unde ius illud ortum sit, ut ve-
 teres leges abrogatæ nouis cedant, &
 nunquam obseruentur sanctiones earū
 legum, quæ abrogarentur, exposuit Li-
 uius. Legis enim cuiusdā Decemuiralis
 libro septimo meminit, cuius hæc fuisse
 verba

verba videntur: IVSSVS POPVLI, ET
SVFFRAGIA SVNTO. QVODCVN-
QVE POSTREMVM POPVLVS IVS-
SIT, ID IVS RATVMQVE ESTO.
Ad quam legem visus est auctor ad He-
rennium libro secundo respexisse, quum
eam defensionem tenuem esse conten-
deret, qua ostenditur id factum esse,
quod ea lex sanciat, cui legi abroga-
tum, vel derogatum sit: id quod poste-
riori lege sancitum sit, esse neglectum.
Nimirum quia illud demum ius, & ra-
tum erat, vt aiunt Decemviri, quod po-
stremum populus iusserat. Proinde si
nova lege vetus esset abrogata sanctio,
legi nouæ lex vetus omnino cedebat.
Nec quidem in legum abrogationibus
duntaxat locum lex ista Decemviralis
habuit, verum etiam si cui legi derogatū,
subrogatum, aut obrogatū esset. Dero-
gatur legi, auctore in fragmentis Vlpia-
no, cum primæ legis pars tollitur: vel, vt
Festus definit, cum quid ex lege vetere
quominus fiat, sancitur noua lege: De-
rogare ergo detrahere est. Subrogatur,
cum aliquid primæ legi adiicitur: Ob-

rogatur deniq; , quum mutatur aliquid ex prima lege. Ergo quodcunq; populus abrogando, derogando, subrogando, & obrogando postremum iusserat, id ius ratumque erat. Quod autem Paulus contendit, non esse nouum vt priores leges ad posteriores trahantur, cap. 26. de legib. hoc ad legum abrogationes non pertinet, verum tunc locum habebat, si cui legi veteri aliqua sanctione noua derogatum, subrogatum, aut obrogatum esset: tunc enim lex vetus ex noua lege sic dependebat, vt hæc sine illa, & è contra, in vsu esse, aut in iudicijs versari nulla ratione posset: id quod ex auctore ad Herennium demonstrauius.

C A P. I I.

De priuilegijs sublatiis.

AL I O sensu Decemviri, alio item Iurisconfulti priuilegia sunt interpretati, Illi quidem omnes illas leges priuilegiorum nomine complexi sunt, quæ in priuatos homines ferebantur: cum è contrario legis ea vis semper esset,

set, vt ad omnes pertineret. Iurisconsul-
ti verò ius illud singulare priuilegium
appellarunt, quod manifesta & euident
æquitatis ratio, contra vulgares iuris
communis regulas, aliquando cogit in-
dulgeri. Decemviri nulla admittunt
priuilegia: Iurisconsulti ea requiri non
dissimulant. Nec enim comitijs centu-
ratis aliqua irrogari priuilegia passi
sunt Decemviri. Expressè enim pro do-
mo sua testatus est apud Pontifices Ci-
cero, vetare leges sacratas, vetare 12.
tabulas, leges priuatis hominibus irro-
gari, id esse enim priuilegium: neminem
vnquam tulisse: nihil esse crudeliùs, ni-
hil perniciosiùs, nihil quod minùs Ro-
mana ciuitas ferre possit. Idem Cicero
huius legis verba libro tertio de legi-
bus hunc in modum refert: P R I V I-
L E G I A N E I R R O G A N T O. Et quia
in iisdem tabulis huiusmodi caput se-
quitur: *De capite ciuis nisi per maximum co-
mitiatum ne ferunto.* inde quidam statim
ratiocinati sunt, priuilegia per comitia-
tum maximum irrogari potuisse: quo
nihil potest absurdiùs dici, præsertim
cùm eodem in loco Cicero leges hæc

duas præclarissimas de duodecim tabulis tralatas scribat, earumq; alteram priuilegia tollere, alteram de capite ciuis rogari nisi maximo comitiatu, vetare. Nec quem moueat, quòd in eodem de legibus libro tertio dixerit expressè Cicero, ferri de singulis nisi centuriatis comitijs, Decemuiros noluisse. Illud enim non ad priuilegia, sed ad rogationē de capite Romani ciuis omnino pertinet. Vetant, inquit, priuilegia irrogari, hoc est, in priuatos homines leges ferri: vetant, inquit, de capite ciuis nisi per maximum comitiatum ferri, hoc est, de singulis. Igitur priuilegium omne secundum Decemuiros iniustum est, & improbum, & idcirco nec irrogandum: secundum Iuriscòsultos verò probum, iustum, ac sæpe necessarium: qualia sunt, creditorum priuilegia, priuilegium fisci, & id genus alia.

CAP. III.

De patria potestate.

STIPVLATIO quatenus conuentio, est, iuris non ciuili tantum, sed etiam
iam.

iam gentium est: quatenus contractus, iuris ciuilis est, non gentium. Testamentum quatenus suprema voluntas definitur, iuris tam gentium est, quam ciuilis: quatenus verò iusta voluntas, iuris ciuilis est, non gentium. Sic quoq; patria potestas, iuris ciuilis, & gentium est, & est quoq; iuris ciuilis tantum. Est quidem iuris ciuilis, & gentium ratione potestatis, quia omnibus hoc gentibus innatum est, & ab ijs obseruatur, vt filius in sui patris sit potestate, c. 2. de iust. & iur. Est verò iuris ciuilis tantum, quia ex iustis nuptijs, quas soli ciues Romani contrahunt, ea sic constat, vt iure ciuili plurima patri concessa sint, quae gentium iure eidem non conceduntur. Ideoque ius potestatis, quod soli ciues Romani in liberos habent, ius dicitur proprium ciuium Romanorum, cap. 3. de his qui sunt sui. §. 2. institut. de patri potest. Neque enim peregrinus ciuem Romanum, nec ciuis Romanus peregrinum in potestate habere potest. Eo idcirco si patri, vel filio aqua & igni interdictum esset, patria huiusmodi potestas tollebatur: Siquidem is cui aqua

& igni interdictum erat, peregrinus fiebat, auctore in fragmentis Vlpiano, tit. 10. Eoque respexisse omnino visus est libro decimo epistolarum Plinius, ab Imperatore Troiano Chrysippo cuiusdam, eiusque uxori ciuitatem postulans. Rogo ergo, inquit, vt propinquis eius des ciuitatem Chrysippo Mithridatis, uxoriq; Chrysippi Stratonice Epigoni. Item liberis eiusdem Chrysippi, Epigono & Mithridati, ita vt sint in patris potestate, vtq; ijs in libertos seruetur ius patronorum. Illud autem ius potestatis, quod cum reliquis gentibus ciues Romani habent commune, ad ius non solum ciuile, sed etiam gentium referri debet. Idq; inter ceteros aperte testatur est idem Plinius, de hæreditatum vigesima differens in Panegyrico. Tu quidem, inquit, Cæsar illam exceptionem remouisti, si modò filius in patris potestate fuisset: intuitus opinor vim legemque naturæ, quæ semper in ditione parentum esse liberos iussit. Et hoc illud est, quod hunc in modum Cicero scribit libro tertio offic. Maiores aliud ius gentium, aliud ciuile esse voluerunt: quod

quod enim ciuile , non idem continuo gentium: quod autem gentium, id ciuile debet esse. Ius autem potestatis, quod proprium ciuium Romanorum dicitur, inde ab ipso Romanæ ciuitatis exordio trahit originem. Temporibus siquidem Romuli, omnis etiam necis in filium patri iure ciuili auctoritas indulgebatur: maiorque concessa patri in filium potestas fuit, quàm domino in seruum. Seruus enim venditus, deinde libertatem adeptus, sui iuris fiebat. Filius verò à patre venditus, si liber fieret, rursus in patris potestatem redigebatur, & post tertiam demùm venditionem eximebatur è potestate, vt auctor est Dionysius, libro secundo. Proinde si quid commisisset filius, quod castigationem, aut etiàm seueriorem aliquam requireret animaduersionem, castigandi, & in filium animaduertendi, omnem patri permisit Romulus potestatem: adeò vt occidere, vendere, in exilium mittere, alijsq; supplicijs filium pro arbitrato afficere pater sine fraude potuerit. Nec quidem videri potest Romulus tyrannidem, aut carnificinam aliquam parentum

tum iure iniustam tollerasse, vt imperi-
tis quibusdam persuasum esse intelligo,
verum scelera filiorum iustis parentum
decretis vindicari voluisse. Hæc cum ita
sint, videamus quo sensu accipi debeat,
quod cap. ult. C. de patr. potest. hunc in
modum Constantinus scribit: *Libertati
à maioribus tantum impensum est, vt patribus
quibus ius vitæ in liberos, necisq; potestas olim
erat permissa, libertatem eripere non liceret.*
Nónne qui filium vendit, libertatem
eripit? Si pater, qui filium vendit, eri-
peret libertatem filio, vtique filius ma-
numissus non ingenuus, sed vt reliqui
serui libertinus efficeretur Libertatem
autem pro ingenuitate accipi, non est
nouum, cap. 40. de liberal. causa. c. 2. r.
de stat. hom. Permiserunt itaque ma-
iores à patribus filios vendi, & in serui-
tutem redigi, salua tamen libertatis
hoc est, (vt interpretari videtur Iu-
lius Paulus, libr. 5. sentent. titul. 1. in
princip.) ingenuitatis prærogatiua, sic
vt manumissi inter ingenuos censean-
tur, non autem inter libertinos. Sed an
postliminium habeant? Postliminium
habere filium à patre venditum, negat
apertè

apertè Cicero de Orat. libr. i. Memoria enim proditum esse ait, quem pater suus, aut populus vendidisset, aut pater patratus dedidisset, ei nullum esse postliminium. Ceterum an ius istud potestatis scripta lege proditum sit, an verò sine lege, dubitat Dionysius. Nobis aliquando placebat expressa quadam Romuli constitutione illud fuisse introductum: sed in contrarium me vocat Vlpiani sententia, qui ius istud potestatis moribus receptum fuisse arbitratus est, cap. 8. de stat. hom. Scribit etiam Pomponius in initio Romanæ civitatis populum sine certa lege, sine iure certo primum agere instituisse; cap. 2. in princ. de orig. iur. Proinde huiusmodi iure incerto ius patriæ potestatis fuisse receptum, quam per certam aliquam legem Regiam, est verisimilius. An autem ius istud potestatis ante exactos Reges in usu Romæ defuerit esse, videamus. Numa Pompilius omne ius vendendi filios, connubio parentum cōsensu iunctos, parentibus, si Dionysio credimus, expressa lege ademit. Nec quidem ius vendendi huiusmodi filios

filios duntaxat, sed etiam omne ius necis, & seuerioris in filios animaduersionis Numam ademiſſe parentibus, omnino mihi perſuaderem, niſi expreſſe ſcripiſſet Liuius, cum de prouocatione Horatii, qui propriam ſororem interemerat, ad populum certabatur, motos tunc fuiſſe homines in eo iudicio, maxime P. Horatio patre proclamante, ſe filiam iure caſam iudicare ſequenti ita eſſet, patrio iure in filium animaduerſum fuiſſe. Vnde ſtatim conieci, ius in filios animaduertendi necdum Tulli Hoſtilij, qui tunc regnabat, temporibus ademptum parentibus fuiſſe. Porro non multo poſt Hoſtilium Seruius Tullius Tarquinij ſucceſſor, legem tulit, qua filium parentes verberantem Diuis parentum ſacrum eſſe voluit. Et quia huiusmodi facinus iure poteſtatis patriæ a parentibus vindicare Seruius non permisit, ſi non parentibus omne in filios animaduertendi ius eo tempore ademptum fuiſſe videatur, ſaltem patriæ poteſtatis iure ſaluo, tantæ impietatis auctores filios ſic Rex voluit puniri, vt a quouis impunè poſſent occidi. Verba
legis

legis hæc sunt: SI PVER PAREN-
TEM VERBERIT, ASTOLLE
PLORASSIT PARENTES, PVER
DIVIS PARENTVM SACER E-
STO. auctore Festo, lib. 14. Quæ lex et-
iam Virgilio nota fuit: ait enim libro
sexto, apud inferos puniri quibus *Pulsa-
túsue parens, aut fraus innexa clienti.* Scribit i-
dem Festus (vt hanc legem obiter ex-
plicemus) plorassit parentes, idem esse
q̃ clamarit. Sed quia qui proquiritant,
qui iubilant, etiam clamant, videamus
quid inter proquiritare, iubilare, &
parentes plorare intersit. Varro scribit
lib. 5. de lingua Latina, qui fidem Quiri-
tium clamans implorat, cum dici pro-
quiritare: & vt quiritare vrbano-
rum, sic iubilare rusticorum esse. Simili mo-
do qui parens parentum implorabat
auxilium, parentes plorare dicebatur.
Solebat autem is cui vis aliqua fiebat, si
quidem ruri ageret, iubilare: sin verò in
Romana ciuitate, & ciuis esset, proqui-
ritare. Vnde illud Terentij in Adelph.
Obsecro populares ferte misero atq; innocentis
auxilium,

Subuenite inopi.

F

In quem

In quem locum Donatus, & hoc est, inquit, quod veteres quiritare dicebant, Quirites conclamare. Quo spectat etiam Plauti illud in Curcul.

— Ergo ambula in ius. hem tibi.

C N. O ciues, ciues. M I. Quid clamas ?

Si denique parens esset qui a filio vimi pateretur, parens parentes plorabat, hoc est, conclamabat, & Diuis parentum sacer erat filius, hoc est, eius facinus conclamatis parentibus Diuis parentum sic deuouebatur, vt filius a quouis sine fraude posset occidi, & qui eum occidisset, parricidij non damnaretur. Qua quidem lege Regia vsi non sunt Romani perpetuo. Scribit enim Vlpianus, si filius matrem, aut patrem, quos venerari oportet, contumelijs affecisset, aut impias manus eis intulisset, praefectum urbis delictum ad publicam pietatem pertinens, pro modo eius vindicasse. cap. i. de obseq. parent. & patron. praest. Potestatis itaque patriae ius, quo impune filios vendere & occidere parentibus omnino erat liberum, ante exactos Reges, nisi me vehementer coniectura fallit, in usu esse desijt. Quamuis
interim

Interim inficiari non possim, Decemviro-
tos in quartam suarum legum tabulam
eum quoque morem retulisse, quo non
nisi post tertiam venditionem patris
potestate filios liberari erat receptum,
idq; Dionysium scripsisse libro secundo.
Verum eam fuisse Decemviro-
rum intentionem, ut veterem & incertam il-
lam vendendi filios consuetudinem,
quæ Romuli temporibus in usu erat, no-
ua lege confirmare voluerint, mihi ne-
quaquam persuadeo. Dicam itaq; quod
sentio liberè. Romuli temporibus post
tertiam demum venditionem filius po-
testate patria liberabatur, & sui iuris
fiebat. Voluerunt quoque Decemviri,
post tertiam demum venditionem fi-
lios sui iuris fieri. Sed diuersa ratione.
Romulus per venditiones tres veras
tres venditiones intellexit. Decemviri
verò ne ius antiquum penitus immutatū
cum magistratu videretur, aliqua nō le-
gem duntaxat, sed & morum veterū su-
peresse vestigia voluerunt. Ideoq; tres
illas venditiones, sine quibus ē patris
potestate filius more maiorum non e-
timebatur, in suas tabulas retulerunt.

Itaque filius ter mancipatus, ter manu-
 missus, & more maiorum, & lege De-
 cemvirali sui iuris olim fiebat. More
 maiorum quidem, si ter verè mancipa-
 tus, ter verè manumissus fuisset: lege ve-
 rò Decemvirali fiebat sui iuris filius fa-
 milias emancipatione, hoc est, tribus i-
 imaginarijs mancipationibus & manu-
 missionibus. Liberi, inquit Vlpianus in
 fragmentis, tit. 10. parentum potestate
 liberantur emancipatione, id est, si post-
 ea quàm mancipati fuerint, manumissi
 sint. Per emancipationem autem, ima-
 ginariam apud Vlpianum intelligi, non
 aliquam veram venditionem, Caius in
 suis institutionibus demonstrat libr. 1.
 tit. 6. Emancipatio, inquit Caius, hoc est,
 manus traditio, quædam similitudo
 venditionis est. Et ad huiusmodi eman-
 cipationem legem hanc Decemviralem
 pertinuisse, expressè testatus est idem
 Vlpianus eod. tit. 10. Cum enim dixis-
 set, filios patria potestate emancipatio-
 ne liberari, subiecit: *Sed filius quidem ter*
mancipatus, ter manumissus, sui iuris fit. Id enim
lex. 12. tabul. iubet his verbis: SI PATER
FILIUM TER VENVDAVIT, FI-
 LIVS

LIVS A PATRE LIBER ESTO.
Nec verò dubitabit, quin hæc interpretatio nostra verissima sit, qui satis emancipationum solennia apud Caium diligenter excusserit.

CAP. IV.

De prisco patronatus iure.

SCRIBIT lib. II. Dionysius, Romulum patricijs plebeios commendasse, optione cuique è vulgo data quem vellet patronum eligendi, more ab Atheniensibus repetito: & eam pauperum tutelam patronatum appellatam fuisse: iusque patronatus officijs tum inde apud Romanos durantibus huiusmodi constituisse: nimirum ut patroni clientibus de iure responderent, cuius illi rudes erant, & ignari: absentium æque atque præsentium curam gererent: adessent in iudicijs, omnemque accusatoris impetum sustinerent. Iuxta Plauti illud in Menec.

iuris ubi dicitur dies, simul

Patronis dicitur: quippe qui pro illis

Loquantur, male quæ fecerint: aut ad

DE PRISCO PATRON. IVRE.

Populum aut in iure, aut apud iudicem res est.
Sic me hodie nimis sollicitum cliens (quam
Quidam habuit: neq; quod volui agere quic-
Licitum est; ita me attinuit, ita me detinuit.
Apud Aediles pro eius factis plurimis,
Pessimisq; dixi caussam.

Cientes autem patronis, qui tenuioris
erant fortunæ, quam ut filias honestè
commodèque possent elocare, in elo-
candis filiabus opitulabantur, eosque
eorumque filios ab hostibus inter ce-
ptos, sumptu proprio redimebant. Et
fuit certè ius istud patronatus tantæ a-
pud veteres auctoritatis, ut contenderit
expressè M. Cato, patrem primum, dein-
de patronum proximum nomē habuisse:
auctore Gellio lib. 5. c. 13. Proinde
non est dubium, quin seuerè in patro-
nos fraudulentos Romani animaduer-
terint. Sanè Dionysius auctor est, clien-
tem aduersus patronum, aut patronum
aduersus clientem dicere testimonium
non potuisse: nec alterum ab altero ac-
cusari, aut inter inimicos numerari: qui
quid horum fecisset, teneri eum Romu-
li lege de proditoribus, eumque ut Diti
sacrum, interficere cuilibet liberum fuis-
se.

se. Atque huius quidem prisca iuris Decemviri etiam nostri aliquam in suis tabulis memoriam superesse voluerunt. Ideoq; ius istud patronatus à Romulo uti introductum fuit, ita in suas quoque tabulas transtulerunt, his verbis: PATRONVS SI CLIENTI FRAVDEM FAXIT, SACER ESTO: quemadmodum Servius Honoratus, & post eum Julius Sabinus exponentes illud Virgilij, *Et fraus innexa clienti*, adnotarunt. Refert idem Sabinus, per fraudem in hac lege præuaricationes Urbanum intellexisse, quod mihi ad omnem fraudem, dolumque malum potius referendum videtur. Voluerunt itaque Decemviri, patronum qui clientem fraudasset, sacrum esse. Morem Romanis fuisse ait Dionysius, ut quos vellent impunè occidi, eorum corpora deuouerent Deo cuiuspiam, præcipueq; Dijs inferis. Eumq; morem obseruasse Romulum in fraudibus patronorum, clientumq; vindicandis, idem expresse addidit Dionysius. Quo sensu hominem sacrum accepisse in hac lege Decemuiros, dubium non est: quamuis hominem sacrum Festus

eum definierit, quem populus iudicauit ob maleficium, neque fas est eum immolari, sed qui occidit, parricidij non damnatur. Quæ quidem Festi definitio aliò referri debet. Et certè Liuius lib. 3. L. Valerio & M. Horatio Consulib., sancitam, ait, nouam fuisse legem, ne quis vllum magistratum sine prouocatione crearet: qui creasset, eum ius fasq; esse occidi, nec eam cædem capitalis noxæ haberi. Ad quam legem Festi definitio non incommode trahi posse videtur.

C A P. V.

De in ius vocando.

QUI ius suum volebant persequi, in ius aduersarium vocabant: quem sequi nolentem attestationis medio ducebant, & reluctantem omnino trahebant, siq; opus esset, rapiebant. Plautus in Penulo:

*Sed quid ego dubito fugere hinc in malam
crucem,*

Priusquam obtorta collo ad Prætores tra-
hor?

Erat

Erat enim lege, sancitum Decemuirali;
 in ius vocati vt irent. Auctor ad Heren-
 nium, lege ius est, inquit, vt in ius eas
 cum voceris. Cicero libr. 3. de legibus:
 A pueris, Quinte, didicimus, S I I N
 IUS VOCET, ATQVE EAT, & hu-
 iusmodi alias leges nominare. Si autem
 in ius vocatus vitio, morbove, id est, ne-
 que febriculoso, neq; graui nimium, sed
 vitio quodam imbecillitatis, atque in-
 ualentia ire in ius non poterat, ei iu-
 mentum, hoc est, vectabulum (vt Cæci-
 lius apud Gellium libr. 20. interpreta-
 tur) quod iunctis pecoribus traheba-
 tur, dari voluerunt Decemuiro. Eique
 haud aliter in ius sequi, quam strata, qua
 nimis ægri portari solebant, arceram, re-
 cusanti, arceram sterni expressa lege
 prohibuerunt. quam legem hunc in
 modum apud Gellium esse restituen-
 dam existimaui: S I MORBUS AEVI-
 TASVE VITIVM ESIT, QVI I N
 IUS VOCASSIT, IUMENTVM DA-
 TO: S I VOLET ARCERAM, NE
 STERNITO. In libris enim impressis
 mendose legitur: Si nolet, arceram ne ster-
 nito. pro, Si volet arceram, ne sternito. Item,

esset, pro esset. Decemviri itaq; postulanti arceram reo sterni vetuerunt: non quod eam sternere si actor voluisset prohiberetur, verum quod eam reo sine arceram in ius sequi recusanti, inuitus actor sternere non cogeretur. Ea siquidem est (prout illam Sextus Cæcilius interpretatur) Decemvirorum sententia, ut in ius vocato pauperrimo homini, vel inopi, qui aut pedibus fortè æger esset, aut quo alio casu ingredi nequireret, plostrum daretur: ne causatio ægri corporis perpetuam daret fidem detrectantibus, iurisque actiones declinantibus, vacationem. Nec quidem si morbus fonticus, quem vehementiorē vimque grauiter nocendi continentem interpretatur idem Cæcilius, reum inuassisset, arceram sterni permiserunt Decemviri, sed iudicij diem diffusum esse voluerunt, c. 2 §. 2. Si quis cautio. Decemviri eum diem diffindi dicebāt, qui differebatur. Nec dubium est, quin hanc legem de diffindendo die à Numa Rege desumpserint. Nam certa quædam vitia enumerasse visus est Numa, quibus si iudex, vel altervter ex litigatoribus im-

peditus esset, dies iudicii diffinderetur.
 Eiusque legis particulam, quæ apud Fe-
 stum libr. 16. mendosissima exitat, o-
 mnino mihi persuasit Iacobus Cuiacius
 acutissimus interpres, sic esse restituen-
 dam: SI QUID HORVM FVIT VI-
 TIVM IVDICI, ARBITROVE,
 REOVE, DIES DIFFISVS ESTO.
 In exemplaribus impressis pro *Diffisus*,
 legitur *Diffensus*, erroris non admodum
 obscura origine, siquidem veteres ita
 scribere solebāt, *diffesisus*, pro *diffisus*: quod
 cum non perciperent imperiti librarij,
diffesisus loco, *diffensus* posuerunt. Dies au-
 tem ita diffindi solet ex lege duodecim
 tabularum, ut si morbo fontico actor
 vel reus impeditus esset, morbum in iu-
 re allegari per amicum curaret: tunc
 Prætor excusatione cognita, quia De-
 cemviri ob morbum fonticum vole-
 bant diem iudicii diffisum esse, in diffin-
 dendo die hac formula utebatur: HIC
 DIES DIFFISVS ESTO. ut auctor
 est Acron in Horatium. Ergo vocatus in
 ius, nisi morbo esset opus iumento, neve
 morbo fontico dies iudicii diffisus esset,
 statim in ius sequi actorem cogebatur:

cique

eique non sequenti præsentibus antestatis auctor iudicium denunciabat. Antestatos autem inde appellatos putauit Porphyrius, quod ante superstites, siue testes deberent aduocari, & in testimonium adhiberi, quam auctor reum manu posset præhendere. Et id quidem expressa Decemuirali lege fuisse cautum, idem addidit: quam ego sic restituo: **SI VIS VOCATIONI FVAT, TESTAMINI: IGITVR EM CAPITO ANTESTARI.** Veteres autem *fvat* dixisse pro *fiat*, expressè testatur Nonius Marcellus, & in Virgilium Iulius Sabinus. *em* quoque pro *cum* antiquos posuisse, auctor est Festus. Itaque si actor aduersarium vocaret in ius, & is vi resisteret, (vt ita vis fieret vocationi) voluerunt Decemviri actorem testari, hoc est, testes aliquot aduocare. *igitur em capito*, id est, tunc cum capito, siue cum manu præhendito: *antestari*, hoc est, attestando, siue Græcorum more, *μαρτυρεῖν* ad. Sic enim antestari Græcè dici ex ædis Beati Germani Parisiensis Lexico primus observauit Barnabas

Brislo-

Briffonius. Vt ita ne ex lege quidem.
 12. tabularum reus manu præhendi sine
 antestatione potuerit. Nec verò satis e-
 rat Decemuiris manibus antestationis
 medio reos præhendi, verum si calue-
 rentur, si pedem struerent, hoc est, si
 frustrarentur, vix pedem pedi præfer-
 rent, fugerent, ociose irent, remoraren-
 tur (vt Festus in verbo *Struit*, & Caius
 cap. 233. de verb. sign. interpretantur)
 manus in reos iniici, hoc est (vt mihi
 quidem videtur) manibus reos trahi, &
 rapi in ius permiserunt Decemui-ri, his
 verbis: *SI CALVITVR, PEDEMVE*
STRVIT, MANVM ENDOIACITO.
 vt auctor est idem Festus. Antestationes
 autem sic fieri solebant: Auriculā actor
 vnus ex superstitibus attingens, sic eum
 interrogabāt, *Licet antestari?* Si ille re-
 sponderet, *Licet*, manus in aduersarium
 iniiciebantur, perq; manus iniectionem
 ducebatur, trahebatur, siq; opus esset,
 ad Prætorem obtorto collo rapiebatur.
 Horatius libro primo, serm. sat. 9.

Casu venit obuius illi

Aduersarius: & quò tu turpissime? magna

Exclamat voce. & licet antestari? ego verò

Oppo-

*Oppono auriculam : rapit in ius , clamor v-
trinq;*

Vndiq; concursus.

Vnde satis perspicuum est, medio ante-
stationis, in aduersarios manus sic olim
actores iniecisse, vt eos reluctantes, pe-
dēve struentes, vi ad Prætorem rape-
rent. Hic illius facienda mentio antiqui
lapilli est, quem cum tuus Marce gene-
rosissime, germanus frater Guido Lau-
rinus mihi nuper exhibuisset, statim ea
quæ de antestatione coniecturis aliquot
verisimilibus confirmaram, esse verissi-
ma deprehendi. Erat enim insculpta
lapillo manus atterens auriculam, cum
hac inscriptione, MNEMONETE, quod i-
dem est cum memor esto. Eoque refe-
rendum esse illud Virgilij in Bucolic.
Cynthius aurem vellit, & admonuit. Vir claris-
simus, eruditionisque tibi, & affinitatis
nomine charissimus, Iacobus Susius nu-
per dum hæc legeret, rectè animaduer-
tit. Et sic quidem aliud nihil in effectu
significare videtur antestari, quam testi-
bus uti, vel, vt Plautus ait, testes facere,
quando actor in reum manus inijcere
volebat. Plant. in Curcul.

Ne facias testes, neq; equidem tibi debeo quicquam.

Quin & Caius cum de illis ageret, qui neque sequuntur, neque ducuntur, in reum manus iniici solere, reum manibus teneri scribens, indicare visus est: Solutum, inquit, non intelligimus eum, qui licet vinculis liberatus sit, manibus tamen tenetur, cap. 48. de verb. signific. Quod si antestatus non esset actor, & manum inieciisset, iniuriarum, ut existimat Acron, reus constitui poterat. Hinc illud Plauti in Curcul.

Hocine pacto indemnatum, atq; intestatum me arripi?

Nec immerito, qui enim non reluctan-tem trahit, aut rapit, vim inferre videtur. Proinde ne sine iusta causa sic in adversarios sauirent actores, lege constitutum reor Decemvirali, ut qui sine antestatione in reum manus inieciisset, iniuriarum posset conveniri. Nec vero huius antestationis solennitas in tantum ab aliorum testimoniorum iure discedebat, quin ut a testimonijs reliquis, sic ab antestatione servi repellerentur. Plautus in Curcul.

--- Seruon' antestari? P. H. Vide.

C. Hem, vt scias me liberum esse.

Porro vt quis in ius raperetur, non semper opus antestatione fuit: nam si reus improbus esset, & intestabilis, vt sunt leones, fures, & id genus alij, sine antestatione ad Prætorem rapiebatur: id q̄ doctissimus Præceptor meus Hopperus in eruditissimo suo de iuris arte libro tertio adnotauit. Vtilius siquidem erat, plagarios, & fures priuata manu, ciuiumque concursu ad Prætorem sine antestatione rapi, quàm sub prætextu securitatis tranquillitatisque publicæ, tergiuersatione rapinis, plagijs, aut furtis indulgere. Quod cum ita sit, mirum nemini profecto videri debet, in improbos huiusmodi homines manus etiam sine antestatione iniici consueuisse. Sic Lyconidem adolescentem aulæ quadrilibris furem suspicans Euclio, in ius rapere visus est voluisse, apud Plautum in Aulularia:

Nisi reseres. L. Quid tibi ego reseram?

E. Quod surripuisti meum.

Iam equidem ad Prætorem hercle te rapiam,
& tibi scribam dicam.

Nam

Nam quòd nullam hîc superstitem optauerit præsentiâ Euclio, quòd nullum viatoris implorauerit auxilium, hinc potest probabiliter argui, communi iure in eum quem furem esse non dubitabat adolescentem manus iniicere Euclionem potuisse. Similiter in Persa, cùm in Dorpalum lenonem manus iniiceret Saturio parasitus, interrogatus à lenone ân ne antestaretur, respondit :

— Tuâne ego caussa carnifex

Cuiquam mortali libero aures atteram,

Qui hîc commercaris ciues homines liberos ?

Rursus in Rudente, cùm Labrax leno à Pleusidippo in ius vocaretur, sic eum interrogabat Pleusidippus :

Rapier hîc obtorto collo maui, an trahi ?

Vtrumuis optadum licet.

Cùmque se neutrum velle leno respondisset, subiecit statim Pleusidippus :

Abi sanè ad littus curriculo Trachalio,

Iube illos in urbem ire obuiam ad portum mihi,

Quos mecum duxi, qui hunc ad carnificem trahant.

Ego hunc scelestum in ius rapiam exulem.

G

Agé

DE IN IUS VOCANDO.

Agē ambula in ius. L. quid ego deliqui ?

Et paulò pòst :

——Obsecro subueni mi Charmides,
Rapior obtorto collo. C H. quis me nominat ?
L. Viden' me vt rapior ? C H. video, & in-
specto lubens.

L. Non subuenire mihi audes ? C H. quis ho-
mo te rapit ?

L. Adolescens Pleusidippus.

Ceterum si honestior esset persona,
quàm vt eam rapi conueniret, (erant e-
nim qui in ius vocati, duci, aut rapi ne
medio quidem antestationis poterant,
vt ex epigraphic cap. 48. de verb. sign.
colligimus) diem ei dicebat, eamque
promissa pœna, quam multam Plautus
appellat, dativæ, ni prædia possideret,
vadibus, vel pignore, dimittebat. Plaut.
in Capt.

His diem dicam, irrogabo multam:

Nam quod lege cautum fuisse diximus,
in ius vocati vt irent, Prætor illud edi-
cto sic est interpretatus: In ius vocati vt
eant, aut satis, vel cautum dent. Quòd enim
certos Prætor sessionum haberet dies,
quibus postulationibus, quibus etiam
cognitionibus eum vacasse, libro pri-
mo

mo Variorum demonstrabimus: manus in aduersarium iniiciendi oportunitate actores fraudari diutius Prætori iniquum videbatur. Proinde concessit agere volentibus aduersarios suos vadari, hoc est, sic in ius vocare, ut ni pœnā stipulantibus actoribus promitterent, aut satis vel cautum aliquo modo darent, prædiave possiderent, manus iniectionem paterentur, & medio antestationis vel ad prætorem, si is postulationibus operam daret, ducerentur: vel si alijs negocijs occupatus esset Prætor, in carcere proxima postulationum die in iure sistendi causa adseruarentur. Plautus in Persa.

—— Vadatur hic me. P. utinam vades

Desint, in carcere ut sis.

Quod etiam de his qui neque sequuntur, neque ducuntur, Caius adnotasse visus est, cap. 48. de verb. signific. Ac ne eum, inquit, intelligimus solutum, qui in publico sine vinculis seruatur. Per publicum enim carcerem sine custodiam intelligi, illud Plauti in Amphit. liquido demonstrat:

—— Ita

Peregrini adueniens, hospitio publicitus accipiar.

G

2

Vades

Vades autem dicti sunt, qui pro altero vadimonium promittebant: dictosque putat Acron, quod qui eos dederat, vadendi haberet potestatem. Et quamuis putauerit Festus, vades sponsores significare datos in re capitali, nihilominus tamen in ciuilibus, quam in capitalibus causis vades dari, vadimoniumque promitti solere, ex sola quam Cicero pro P. Quintio scripsit oratione, satis probari potest. Promittitur autem vadimonium, cum aliquis formula præscripta certo tempore se spondet præsentibus antestatis in ius venturum. Nec aliter exigi vades potuisse existimo, quam si de reo sibi non satis confideret actor, cum non ignoratis rebus inceptis non satis idoneum. Tunc enim consuetudinem fuisse scribit Varro, ut reus pro se alterum constitueret. Quasi è contrario, si reus inceptis rebus satis esset idoneus, vades peti non debuerint. Hinc factum deinde suspicor, ut apud Marcum possessores rerum immobilium satisfacere non debuerint. cap. penul. Qui satisfd. cog. Et cum Vlpianus duplicem esse in iudicio sistendi cautionem scriberet,

beret, vnam nudam, satisfacto alteram: si domum reuocandi beneficio gauderet reus, nuda cautione promitti vadimonium addidit. Vt sic non solum possessores rerum immobilium, alijq; rebus inceptis satis idonei, à satisfactione liberarentur, verum etiam qui domum reuocandi ius habebant. Si itaque reus non satis locuples actori videretur, nec domum reuocandi, aut aliud aliquod habere priuilegium, sic eum actor vadari solet, vt si nulla idonea interueniret satisfactio, manus ab iniectione non abstineret. Ideoque vades, vel pignus dare vadatus debebat. Vades reum sistere certo die promittebant. De pignore autem addidi, quod vt reis, sic etiam pignoribus idoneè caueri Vlpianus responderit, c. 1. §. 7. de collat. Quo modo satisfacto, aut pignoribus datis idoneè caueri, & si fides sine satisfactione habita fuerit promittendi, idoneè cautum videri, respondit idem Vlpianus, cap. 4. §. 6. de fidei com. liberat. Hanc enim veram esse cautionum, quæ iudicio sistendi causa in usu erant, distinctionem, satis indicat titulus or-

Etanus libri secundi Pandectarum. Et hæc quidem omnia sic olim locum habebant, si Romanum ciuem ciuis Romanus in ius vocasset. Ceterum si cum hoste manus esset conferenda, nec trahi, nec rapi peregrinum in ius passi sunt Decemuiri, sed diem duntaxat condicij. Hostis, inquit Cicero lib. 1. offic. apud maiores nostros is dicebatur, quem nunc peregrinum dicimus: indicant duodecim tabulæ, A V T S T A T V S D I E S C U M H O S T E. Et hæc hæctenus de in ius vocando.

C A P. V I.

De prisco iure vindiciarum.

INITIO ciuitatis Romanæ hæc fuisse priuatorum iudiciorum ratio videtur, vt qui rem suam vellet persequi, manum cum aduersario cōsereret. Nam de qua re disceptabatur, siue ager, siue quid aliud esset, solet eam actor cum aduersario manu præhendere, & in ea re omnibus verbis vindicare: quæ vindicatio, vindicia dicebatur, eaque vindicia correptione manus in re, atque in loco.

loco præfenti, auctore Prætore ex 12, tabulis, fiebat, in quibus ita scriptum est: S I Q V I E X I V R E M A N V M C O N S E R V N T. auctore Gellio, lib. 20. cap. 9. Cum enim angustioribus, quam quibus Italia circumscribitur, Romanum imperium finibus concludebatur, tunc qui iurisdictioni præerant vnà cum litigatoribus ex iure in fundum controuersum, dicendarum vindiciarum causa, proficiscebantur: ibiq; manuum facta consertione, quem suum esse fundum actor contendebat, eundem contra vindicabat reus: eamque vim quæ per huiusmodi manus correptionem fiebat, ciuilem, & festuçariam verbo dictam, non manu factam fuisse, idem Gellius expresse testatus est. Ceterum postea quam Prætores, propagatis Italiæ, orbisq; Romani finibus, datis iurisdictionibus, negotijsq; occupati, ex iure proficisci dicendarum vindiciarum causa, in res longinquas grauabantur, institutum est contra. 12. tabulas, tacito populi consensu, vt litigantes non ex iure apud Prætorem manum conscrerent, hoc est, non vnà cum Prætore manus

conferendæ gratia ex iure, siue loco illo in quo ius redditur, in locum controuersum proficisceretur: sed ex iure manu confertum vocarent, id est, alter alterum ex iure ad conferendam manum in rem de qua ageretur, vocaret: & simul in agrum (si de eo fortè controuersia esset) profecti, terræ aliquid ex eo, vti vnā glebā, in urbem in ius ad Prætorem deferrent, atque in ea glebā tāquam in toto agro vindicarent. Quomodo autem huiusmodi manus confectio fieri soleat, litteræ antiquiores non declarant. Nec quidem perpetuò in fundum profecti sunt litigantes, indeque glebā in ius detulerunt. Fuit enim tandem à Iurisconsultis noua, & solennis quædam manus conferendæ ratio excogitata, quæ certis concepta verbis, & suum actori, & reo item suum, nec non suum quoque Prætori carmen præscribebat. Itaque quemadmodum Prætores negotijs varijs occupati, tandem dicendarum vindiciarum causā proficisci grauabantur, sic litigantes etiam manus conferendæ gratia tandem in agros proficisci, indeque glebas in ius de-

deferre omnino defierunt. Ne tamen
nouis aliquibus institutis omnis prisci
iudiciorum ordinis solennitas abolere-
tur, visum fuit Pontificibus, qui iuri ci-
uili, & legis actionibus præerant, ali-
quam protectionem imaginariam, in
veræ protectionis locum surrogare, qua
litigantes certam inire viam, eamque
redire docerent. Quo tempore hæc iu-
diciorum ratio in usu fuisse videtur,
quantum ex Cicerone pro Murena col-
ligimus, ut actor cum in ius vocasset ad-
uersarium, hac in iure formulavteretur:

FVNDVS QVI EST IN AGRO QVI
SABINVS VOCATVR, EGO EVM
EX IVRE MEVM ESSE AIO: INDE
EGO TE EX IVRE MANV CON-
SERTVM VOCO. Citatus deinde reus
usus est hac formula: VNDE TV ME
EX IVRE MANV CONSERTVM
VOCASTI, INDE EGO TE RE-
VOCO. Tum Prætor: VTRISQVE, SV-
PERSTITIBVS PRAESENTIBVS, I-
STAM VIAM DICO: INITE VIAM.
præstò aderat sapiens qui viam inire

doceret: REDITE VIAM. eodem du-
 ce redibant. Hæc iam tum etiam in usu
 esse desierunt, cum Prætor additis excep-
 tionibus & replicationibus ius in li-
 tis verba componebat. Tunc enim cui-
 libet ita ut sibi videretur, edere actio-
 nem fuit liberum, siue per libellum, si-
 ue per solam denunciationem: satis-
 que erat hac uti formula in fundi vin-
 dicatione: *Fundum Tusculanum ex iure*
Quiritium meum esse aio. Et quamvis hæc
 ita tam variè fuerint in iudicijs olim
 usurpata, una tamen eademque perpe-
 tuò observabatur litis vindiciarum ra-
 tio, qua res tam diu vindicabatur, donec
 alterutrius ex litigatoribus sacramen-
 tum iustum esset pronunciatum. Vete-
 res siquidem & vindicijs, & sacramentis
 olim contendisse, unico Ciceronis testi-
 monio confirmari potest pro Milone.
 Eum, inquit, deniq; cui iam nulla lex e-
 rat, nullum civile ius, nulli possessionum
 termini, qui non calumnia litium, non
 iniustis vindicijs, ac sacramentis alienos
 fundos, sed castris, exercitu, signis infe-
 rendis petebat. Nec id etiam ignorasse
 visus est Arnobius, aduersus gentes li-
 bro

bro quarto, dum ita scribit: Quis quæstor, quis arbiter cernicibus tantis erit, qui inter personas huiusmodi aut vindicias iustas dare, aut sacramenta conetur pronunciare non iusta? Vindicijis quidem res petebatur, quoties incertum erat, vter litigantium lite proprietatis pendente, rei controuersæ futurus esset possessor: sacramentis verò de ipsa re principaliter, hoc est, de rei proprietate contende batur. Et idcirco fieri potuit, vt solo sacramento, nulla vindiciarum mota quæstione, de controuersis rebus disceptaretur. Idq; diligenter adnotasse, ac acutè animaduertisse A. Sconius mihi visus est, litem vindiciarum hunc in modum definiens: Lis vindiciarum est, cum litigatur de ea re apud Prætorem, cuius incertum est quis debeat esse possessor: & ideo, inquit, is qui rem tenet, satisfdat pro præde litis vindiciarum aduersario suo, quo illi satisfaciatur, nihil se deterius in possessione facturum, de qua iurgium est: rursus cautione præstita, sponsione prouocatur ab aduersario certæ pecuniæ, aut æstimationis, quam amittat ni sua sit
hære

hæreditas, de qua contenditur. Ceterum si nulla possessionis fieret controversia, solis sacramentis, nulla vindiciarum quæstione mota, sic cõtendebatur, ut is interim penes quem rei controversæ possessio esset, idonee satisficeret, auctore Paulo, libr. 1. sentent. titul. 11. Quoties hæreditas petitur, inquit Paulus, satisfactio iure desideratur, & si satisfactio non detur, in petito rem hæreditas transfertur: si petitor satisfacere noluerit, penes possessorem possessio remanet: in pari enim causa, potior est possessor. Proinde errare mihi plurimum videntur, qui petitionem hæreditatis litē appellant vindiciarum. Hæreditates enim sacramentis petuntur, id est, legis actionibus: possessiones hæreditatum, si fortè de ijs esset contentio, litē principali pendente, vindicijs, nō sacramentis alterutri ex litigatoribus addici solent. Eoque mihi omnino visus est respexisse Cicero, cum ita scriberet, in Verrina tertia: Si quis testamento se hæredem esse arbitraretur, quod tum nō exstaret, lege ageret in hæreditatem, aut pro præde litis vindiciarum,
cum

cum satis accepisset, sponfionem faceret, & ita de hæreditate certaret. Sensus enim est, cum qui se hæredem esse arbitratur, hæreditatem petere duabus rationibus posse, nimirum sacramento sine vindicijs, aut vindicijs & sacramento simul. Sacramento quidem, si nulla possessionis mota controuersia, lege in hæreditatem agat: quo casu locum habere solet illa, quam modò adnotaui-
mus Pauli sententia: Vindicijs verò, & sacramento simul, in hæreditatis petitione locus erat, si non hæreditas duntaxat peteretur, sed insuper is qui lege in hæreditatem agebat, se pendente legis actione hæreditatis possessorem esse oportere contenderet. Idq; expressè significant huiusmodi quæ in eadem Ciceronis Verrina subsequuntur verba: *Iam quid id ad Prætorem, vter possessor sit? Nónne id queri oportet, vtrum possessorem esse oporteat?* Ergo vindiciarum liti, si Asconio & Ciceroni credimus, tunc demùm apud veteres locus erat, cum incertum esset, vter litigantium rei controuersæ lite principali pendente, futurus esset possessor. Eoque sensu apud Liuium, aliosque

aliósque auctores probatos, vindicias esse accipiendas, ab eruditís quibusdam viris copiosè satis est demonstratum. Sanè quòd Festus scribit, Vindicias res illas esse de quibus controuersia est. illud omnino ad antiquam manus consertionem pertinet. Cùm enim manus conferebantur, tunc si quæ vindiciarum fieret controuersia, res controuersas in iure præsentes alterutri ex litigatoribus vindicanti Prætor tam diu addicebat, quàm diu alter alterum iusto sacramento, & sponsione non superasset. Idq; mirum in modum probat vindiciarum, quam Cincius apud eundem Festum dedit, definitio: Vindicæ, inquit, olim dicebantur glebæ (sic legendum est, non *illæ*, vt passim legitur) quæ ex fundo sumptæ, in ius allatæ erant. Proinde cui glebas ex fundo in ius allatas, aut alias res mobiles, pendente proprietatis controuersia, causa cognita, is qui iurisdictioni præerat, addicebat, eidem vindiciæ addici dicebantur, quantum ex Festo, & Cincio colligimus. Seruius autem Sulpitius vocabulo etiam singulariter formato, vindiciam esse ait,

cùm

cum aliqua de re controuersia est, ab eo quod vindicatur. Illudque huiusmodi Decemuirali lege confirmat: *S I VINDICIAM FALSAM TVLIT, REI SIVE LITIS ARBITROS TRES DATO: EORVM ARBITRIIS FRVCTVS DVPLIONE DAMNV M DECIDITOR.* Sic primus locum hunc, qui mutilus erat, & omnino deprauatus, apud Festum restitui in verbo *Vindiciæ*. Ecquis obsecro dubitauerit, quin hæc emendatio verissima sit, præsertim si non ignoret, in legibus sic scribi solitum: *Rem siue litem.* idq; Seruium Honoratum in Virgilium adnotasse. Quid autem hac in lege sibi voluerint Decemuires, non admodum esse obscurum puto. Voluerunt enim iudicem, qui dolo malo in fraudem legis, vindiciam iniustam tulerat, tres arbitros constituere, quorum arbitrijs fructus duplione damnû decidi posset. Eoque omnino pertinere & inde primum ortum vix dubito, quod in Pandectis de iudicibus passim legimus, qui litem suâ fecerunt. Nec quidē huiusmodi fructus duplione multati perpetuò fuerunt iudices

ces, qui vindiciam sententiámve iniustam tulissent dolo malo, nonnunquam enim veram iustámque litis æstimationem præstabant. cap. 15. de iudic. nonnunquam in quantum de ea re æquum religioni iudicantis visum fuerat, pœnâ sustinebāt c. ult. de var. & extraord. cog. Porro vindicias nisi superstitibus præsentibus, eos inter quos erat cōtrouersia, sumere non potuisse, Festus adnotatum reliquit: vindiciásque secundum libertatem semper ex vetere iure, quod in duodecim tabulas translatum est, dicendas esse, testatur Pomponius, cap. 11. §. 13. de orig. iur. Nec quidem antiquissima ista dicendarum vindiciarum ratio in rebus mobilibus Romæ in usu fuit perpetuò. Fuisse enim tempora, quibus tam diu res mobiles, de quibus controuersia mouebantur, aut in æde, aut apud sequestrem ponebantur, donec alterutrius ex litigatoribus sacramentum iustum esset pronunciatum, ex innumeris prudentum responsis constat. Sanè homines quoque apud sequestres deponi potuisse, testatur Vlpianus cap. 7. de poss. Quin & iudicibus olim
homines

Homines sequestro datos fuisse, Plautus refert in Mercat.

De isthac sum iudex captus. D. iudex? iam scio.

Nunc tu in consilium istam aduocasti tibi.

LI. Imò sequestro mihi data est.

Res autem mobilis quæ apud seque-
strem nō ponebatur, solet in æde, siue in
fano custodiri. Et certè antiquissima
fuit, diligentissimæque olim obseruata
rerum pecuniarumque in fanis depo-
nendarum ratio. De qua sic Cicero scri-
bit lib. 5. epist. famil. Nam de Luceio, in-
quit, est ita actum, vt auctore Cn. Pom-
peio ista pecunia in fano poneretur:

C A P. V I I.

De litis additione.

QUAM Gellius libr. 16. cap. 2. alle-
gat legem Decemviralem, cam
vtpote vitiosissimam sic esse restituen-
dam probabiliibus aliquot coniecturis
demonstrabo: **A N T E M E R I D I E M**
C A V S S A M G N O S C I T O, Q V V M
P E R O R A N T A M B O P R A E S E N T E S.

H

P O S T

DE LITIS ADDICTIONE.

POST MERIDIEM LITEM ADDI-
CITO, SI AMBO PRAESENTES.
SOLE OCCASO, DIEI SUPREMA
TEMPESTAS ESTO. Et constat qui-
dem hæc verba, *causam conscito*, non ad
litigatores, sed ad ipsum iudicem esse
referenda, propter hæc verba, *quum per-
orant ambo praesentes*. Ergo quod causæ
coniectio, vt satis ex Asconio & Marcel-
lo constat, non ad iudicem, sed ad litiga-
tores referatur, certissimum est loco
conscito, reponi nō posse *conicito*. Ea enim
legis videtur esse sententia, vt iudex an-
te meridiem, quum actor & reus pero-
rassent, id est, causam dixissent, de causâ
cognosceret. Veteres autem dixisse cau-
sam conscito, pro cognoscito non memi-
ni me legisse. Illud quidem dubium non
est, pro cognitu auctore Festo gnotu di-
xisse veteres. Si gnotu, ergo & gnosco:
nam vnde gnotu, nisi à gnosco? Certè
veteres gnosco dixisse, non Festus so-
lūm, sed etiam libro secundo testatus est
Priscianus. Quid igitur obstat, quomi-
nus pro *causam conscito*, legamus *causam
gnoscito*, aut certè *causam cnoscito*. Si non
ob aliud, certè quod Latini plerumq;

G lit-

G litteram ita formarint, vt Græci suum gamma, quod facilè in C Latinum potuit transformari. Imò Festus libr. 13. contendit, C pro G frequēter antiquos posuisse. Idq; etiam ex antiquissimis quibusdam numis deprehendi, in quib. pro Gulo, Gurges, Galba, Glicia, Gellius, Ogulnius Gallus, expressè legitur Culo, Curges, Calba, Clicia, Cellius, Oculnius Callus. Sic pro pago, aliquando est in duodecim paco; & quem Caium vulgares, eum Florentinæ Pandectæ Gaium appellatum continent. Et ita quidem ex gnoscito, interdum ab antiquis cnoscito, indéque vnus litterulæ transpositione, ex cnoscito factû ab imperitis videri potest conscito. Quod autem subijcitur de litis additione: his verbis: *Post meridiem præsentem litem addicito.* profectò, nisi me vehementer coniectura fallit, id etiam vitiosum est. Videamus quid sit litem addicere: an secundum præsentem litem dare? Sic magis plerisque visum est. Itane verò? Quænam igitur obsecro huiusce legis est æquitas, si secundum præsentem, fortè petitorem iniustum, iudex debuerit iudica-

dicare? Constat certè eos, qui cum frustrationis causa latitarent, tribus edictis euocati praesentiam sui facere continebant, litem idcirco non perdidisse: verum si post edictum peremptorium, quum dies eius superuenisset, citati non respondissent, actam fuisse causam: non utique secundum praesentem, sed interdum absentem, si bonam causam haberet, vicisse, cap. 73. de iudic. Eum igitur qui ante meridiem perorauit, post meridiem propter absentiam olim lite fuisse multatum audebimus existimare? Qua auctoritate? An quæso Decemuirali? Tam stupidos fuisse Decemuiros, & imprudentes, quis est qui sibi persuadeat? Ego itaque didici litem addicere, aliud nihil esse in hac lege, quam litigandi potestatem facere. Quam potestatem quia iudex non solet facere, nisi actore cum reo praesente, nisi audita & cognita causa, hac ratione impulsus secundam Decemuiralis huius legis partem sic ausus sum restituere: *Post meridiem litem addicito, si ambo praesentes.* Tertiam legis partem sic etiam emendo: *Sole occaso, diei suprema tempestas esto.*

Scribit

Scribit enim expressè Gellius, non Sol
 occasus, sed Sole occaso Decemuiros in
 legibus posuisse. Et sic apud Varronem
 libr. 6. de lingua Latina, legendum pu-
 to, Sole occaso, diei *suprema tempestas* esto:
 non, *Solis occasu*. vt passim legitur. Quo
 modo. etiam apud Censorinum in libro
 de die natali, & Macrobius Saturn. lib.
 1. cap. 3. hæc eadem legis pars est resu-
 tuenda. Sanè Solem occasum, pro Solis
 occasu, auctores priscos quadam vetu-
 state non insuaui dixisse, non Gellius so-
 lum, sed etiam Plautus in Menæch. te-
 statur, his verbis:

*Namq; si absq; te essem hodie, nunquam ad
 Solem occasum viuerem.*

Supremam autem tempestatem idem
 Varro lib. 4. de ling. Lat. sic interpreta-
 tur: Suprema, inquit, summum diei, id
 à supremo: hoc tempus duodecim ta-
 bulæ dicunt occasum esse Solis. Sed
 postea lex Prætoria id quoque tempus
 iubet esse supremum, quo Prætor in co-
 mitio supremam pronunciauit populo.
 Et libros augurum pro tempore tem-
 pestatem dicere, idem Varro est auctor
 lib. 6. de ling. Lat. Festus etiam pro tem-

pore tempestatem antiquos posuisse, adnotatum reliquit. Totius igitur legis sensus est: Iudicem ante meridiem causam vtrinque cognoscere oportere: post meridiem, litem postulanti addicere, aut denegare, hoc est, si ita videretur, litigandi potestatem facere, sin minus, eam denegare: tempusque pomeridianum ad occasum usque Solis extendi. Illud certè constat, & aliquando à nobis tractatum est, de præiudicijs libro primo, eum qui ius suum persequi volebat, Prætorem olim adiisse, causamque præsentem aduersario in iure dixisse: & tandem audita cognitâque causâ, vel dedisse Prætorem, vel eam quæ petebatur, actionem denegasse. Ceterum antequam Prætor esset, antequam Cn. Flavius actiones promulgasset, eas à Pontificibus peti consuevisse, neminem puto tam impertium, qui id ignoret. Siquidem is, qui ex Pontificibus ut præset anno priuatis erat constitutus, iisdem ferè anni spacio in reddendo iure partibusungebatur, quibus postea Prætores functi sunt. Porro ante huiusmodi Pontificiam iuris reddendi potestatem,

quum

quum Decemuiri ius dicebant, tunc etiā in vſu actionum fuiſſe impetrationem, & hac eadem, quam nunc interpretor, lege primò introductam utique mihi perſuadeo. Ut ita quidem actionum impetratio lege duodecim tabularum poſſit introducta videri, primumq; apud Decemuiros in vſu fuiſſe, & deinde à Decemuiris ad Pontifices, & à Pontificibus tandem ad Prætores tranſuiſſe.

C A P. I I X.

De nexis.

G E L L I V S libro vigefimo cap. I. auctor eſt, ſic in duodecim ſcriptum fuiſſe: *Aeris confeſſi, rebuſque iure iudicatis triginta dies iuſti ſunto. Poſt deinde manus iniectio eſto, in ius ducito, ni iudicatum facit: aut qui pſeudo eo in iure vim dicit, ſecum ducito. Vincito, aut neruo, aut compedibus quindecim pondo, ne minore, aut ſi volet maiore vincito. Si volet, ſuo viuito: ni ſuo viuit, qui cum vincitum habebit, libras farris in dies dato. Si volet plus, dato.* Hic legis ſententiam interrumpens Gellius, quid deinde fieri de nexis voluerint De-

cemui, excepta postrema legis parte,
 verbis proprijs declarat: reliqua legis
 verba, magno studiosorum incommo-
 do, antiquitatis fraude maxima suppri-
 mens. Erat, inquit, ius interea paciscen-
 di, ac nisi pacti forent, habebantur in
 vinculis dies. 60. Inter eos dies, trinis
 nundinis continuis ad Prætorem in co-
 mitium producebantur, quantæq; pe-
 cuniæ iudicati essent, prædicabatur.
 Tertijs autem nundinis capite pœnas
 dabant, aut trans Tyberim peregre ve-
 num ibant. Et paulò post: Si plures fo-
 rent, quibus reus esset iudicatus, secari
 si vellent, atque partiri corpus addicti
 sibi hominis, permiserunt. Et quidem
 verba ipsa legis dicam, ne existimes in-
 uidiâ me istam fortè formidare; *Ter-
 tîjs nundinis partes secanto: si plus minùsve se-
 cuerunt, sine fraude esto.* Hactenus Sextus
 Cæcilius apud Gellium. Quia autem
 legem hanc mendosissimam esse, vel me
 tacente nemo est qui non animaduer-
 rat, idcirco non eius duntaxat partem
 illam quæ verbis Decemuirorum hîc a-
 pud Gellium mendosè legitur, sed vni-
 versam argumentis aliquot, & conie-
 cturis

Auris verisimilibus sic esse restituen-
dam demonstrabo: AERIS CONFES-
SI, AERISQUE DEBITI IUDICA-
TIS, TRIGINTA DIES IVSTI SVN-
TO. POST DEIN, MANVS INIE-
CTIO ESTO: IN IVS DVCITO. NI
IUDICATVM FAXIT, NEMVT
QVIPS ENDO EO IN IVRE VIN-
DEX ESIT, SECVM DVCITO. VIN-
CITO AVT NERVO, AVT COMPE-
DIBVS QVINDECIM PONDO, NE
MINORE, AVT SI VOLET MAIORE
VINCITO. SI VOLET SVO VIVI-
TO. NI SVO VIVIT, QVIEM VIN-
CTVM HABEBIT, LIBRAM FARRIS
ENDO DIE DATO, SI VOLET
PLVS, DATO. NI CVM EO PACIT,
SEXAGINTA DIES IN VINCVLIS
RETINETO. TRINIS NVNDINIS
CONTINVIS IN COMITIVM PRO-
CITATO, AERISQUE AESTIMIAM
IUDICATI PRAEDICATO. TERTIIS
NVNDINIS CAPITE POENAS LVI-

TO, AVT TRANS TYBERIM PERE-
 GRE VENVM ITO. AST SI PLV-
 SES ESUNT REI, TERTIIS NVN-
 DINIS PARTEIS SECANTO: SI
 PLVS MINVSVE SECVESVNT, NE-
 SI FRAVDE ESTO. Nunc videamus
 quæ fuerint huius restitutionis rationes.
 præcipuæ, quibus impulsæ lectionem ve-
 terem sic immutauimus. Pro Rebusq; iu-
 dicatis, reposuimus, Aerisq; debiti iudicatis.
 Certè quia in hac lege non de confessi
 tantum, sed etiam de æris debiti iudica-
 tis tractatur. Confessi igitur æris, in-
 quit Gellius, ac debiti iudicatis. 30.
 dies sunt dati. Et quod apud eun-
 dem Gellium sic nullo sensu legitur,
*ni iudicatum facit, aut qui pseudo eo in iure vindic-
 dicit: illud sic emendauimus: ni iudicatum
 faxit, nemut quips endo eo in iure vindex esit.*
 Festus auctor est, veteres pro fecerit fa-
 xit, & pro egerit axit dixisse: eosque
 pro nisi etiam, unico verbo nemut, vsos
 esse. Iacob. Cuiacius, in antiquo exem-
 plari, & valde fideli, pro quispiam, te-
 statur legi quips. Cuiacij emendatio-
 nem mirum in modum confirmat vul-
 garis.

garis lectio. Dubium enim non est, quin apud Gellium hæc verba, *qui pseudo eo*, ex his verbis, *quips endo eo*, librariorum imperitia deprauata sint. Qui legis verba non percipientes, dictionē *quips*, diuiserunt, & eius postremas litteras duas *ps*, sequenti dictioni *endo*, adiecerunt: & ita pro *quips endo*, *qui pseudo*, reposuerunt. Pro *vim dicit*, in eodem exemplari, *vindicat* legi, refert idem Cuiacius. An veteres *vindicat* ea forma qua lauit, sonit, dixerint, subsisto. Quod autem sonit & lauit veteres dixerunt, hoc inde est quod iidem etiam lauere, & sonere dicerent, vt testatur Nonius Marcellus. Vindicere pro vindicare eosdem dixisse, non obseruaui. Illud profectò certissimum est, vindicem ab eo appellatum esse, si Festo credimus, quod vindicat, quominus is qui prensus est, ab aliquo teneatur. Quid igitur obstat, quominus pro *vim dicit*, legamus, *vindex est*? Maximè quod hanc emendationem antiqua per vindicem asserendi ratio videatur confirmare, quam eleganter descripsit Linius lib. 6. Centurionē, inquit, nobilem militarib. factis,

iii-

iudicatum pecuniæ quum duci vidisset
M.Manlius, medio foro cum cæterua
sua accurrit, & manum iniecit, vocife-
ratusque de superbia patrum, & crude-
litate fœneratorum, miserijs plebis, vir-
tutibusque eius viri, fortunæque: tum
verò, Ego, inquit, nequicquam hac
dextra capitolium, arcemque seruauero,
si ciuem commilitonemque meum
à Gallis victoribus captum, in seruitu-
tem, ac vincula duci videam. Inde rem
creditori palam populo soluit, libræque
& ære liberatum emittit, Deos atque
homines obtestantem, vt M. Manlio li-
beratori suo, parenti plebis Romanæ,
gratias referant. Indèque vindicem li-
bertatis appellatum M. Manlium testa-
tur paulò post idem Liuius. Aiunt De-
cemuiri, *secum ducito*. Quò? In neruum,
in vincula, in carcerem priuatum. Liuius
libr. 6. An placeret (sunt verba C. Licinij
Stolonis, in legis de ære alieno rogatio-
ne) fœnore circumuentam plebem ni
potius quam sortem, creditum soluat,
corpus in neruum ac supplicia dare? &
gregatim quotidie de foro addictos
duci? & repleri vinctis nobiles domos?
& vbi

& vbiunque patricius habitet, ibi carcerem priuatum esse? Quòd autem pro *libras farris*, repositum *libram farris*, certa legis sententia hanc nobis emendationem suadere videbatur: ea siquidem legis est sententia, vt si illa, quam lex constituit, farris quantitate nexus non sit contentus, velit plus dari. Quis ergo tam erit imperitus, vt non intelligat, certam farris quantitatem legem expressisse? Si itaque legeris, *libras farris*, qui quæso fieri potest, vt plus petatur? Ideoque certam visi sunt Decemuires farris quantitatem expressisse, nimirum *libram vnā*, qua si contentus non esset nexus, voluerunt plus dari. Voluerunt igitur Decemuires nexos, ni suo viuerent, à creditoribus ali. Eoque respexisse visus est Terentianus ille Phormio, his versibus:

Alijs aliud est periculum, vnde aliquid abradipoteest:

Mibi sciunt nil esse. dicēs, ducent damnatum domum:

Alere nolunt hominem edacem.

Huc quoque pertinet illud Plauti in *Menæch.*

Nim

*Nam ego ad Menæchmum nunc eo, quod
iam diu*

Sum iudicatus: vltro eo ut me vinciat.

*Nam illic homo, homines non alit, verum e-
ducatur,*

Recreatq;: nullus melius medicinam facit.

Sunt qui pro in dies, endo dies legunt. Ego contendo endodie, ea forma, & ratione legendum esse, qua apud Festum endoprocinctu vnica dictione legimus. Endoprocinctu, in procinctu: endoplorato, implorato: sic endodie, quotidie. Et hæc quidem ad illam legis partem, quæ apud Gellium ipsis Decemviro- rum verbis mendosè legitur, sufficiant. Eam verò, quam proprijs verbis idem Gellius declarat, verbis prout potui- mus Decemviralibus, hoc est, antiquis, & quæ Decemviro- rum temporibus Romæ in vsu fuisse existimamus, summo studio restituere conati sumus. Itaque hæc Gellij verba: Erat autem interea ius paciscendi, ac nisi pacti forent, ha- bebantur in vinculis dies sexaginta: sic restituimus: *Ni cum eo pacit, sexaginta dies in vinculis retineto.* Sic locuti sunt etiam a- lio loco Decemviri: *Si membrum rupit, ni cum*

cum eo pacit, talio esto. Item hæc Gellij ver-
 ba: Inter eos dies trinis nundinis con-
 tinuis ad Prætorem in comitium pro-
 ducebantur, quantæq; pecuniæ iudica-
 ti essent, prædicabatur: sic in legis for-
 mam redeimus: *Trinis nundinis continuis*
in comitium procitato, ærisq; æstimationi iudica-
ti prædicato. Procitare vetères dixisse
 pro vocitare, & producere, scribit Fe-
 stus: qui eisdem pro æstimatione æsti-
 miam dixisse etiam adnotatum reli-
 quit. Denique quod idem Gellius ne-
 xos tertijs nundinis capitis pœnas de-
 disse, aut trans Tyberim peregrè venum
 ijsse scribit, hoc etiam in legem ita
 transtulimus: *Tertijs nundinis capite pœnas*
luito, aut trans Tyberim peregrè venum ito.
 Ceterum postrema huius legis pars,
 quæ etiam vitiosa passim circumfer-
 tur, sic est à nobis restituta: *Aut si plures*
esunt rei, tertijs nundinis partes secanto: si
plus minusve secue sunt, nesi fraude esto. Vere-
 res pro plures & plurima, pluses dixis-
 se, & plusina, est à nobis alio loco de-
 monstratum. Dicebant etiam se vel
 nesi, pro fine: & reorum nomine, acto-
 rem & reum promiscuè accipiebant, &

tradit

tradit Festus. Illud autem hîc quæri potest, cur Decemuii noluerint addictos neruo aut vinculis quindecim pondo minoribus vinciri? Respondeo: id ita non sine certa, & aperta ratione Decemuiros prohibuisse. Scribit libro quinto Festus, fuisse quædam sacrificia, in quibus ita clamitabat lictor: *Hostis, vinctus, mulier, virgo exesto* scilicet interesse prohibebantur. Ex quo loco vinctos, siue nexos, sacris olim interesse solitos colligo. Et idcirco compedes quindecim pondo maiores, quia essent grauiiores, quam vt ijs cum sacris interfunt, sese vincti possent subducere, aut fugere, expressè videntur requirere Decemuiros: ne si minores essent, aut nexis custos perpetuò adesset in sacris, aut sine custode aliquod fugæ periculum subirent creditores. Et eò fortè spectat illa legis Decemuiralis particula, quæ apud Festum libro duodecimo Antonij Augustini diligentia sic emendata legitur: *AST EI CUSTOS NEC ESIT.* quum antea: *Atque custodes nec sint.* peruersissimo sensu legeretur. Compedes quoque quindecim pondo grauiiores, ideo per-

mi-

miserunt, ne si fortè robustiores essent debitores, quàm vt compedibus quindecim pondo securè possent à fuga retineri, aliqua securitas creditoribus adimeretur. Voluerunt ergo Decemviri addictos compedibus indui quindecim pondo maioribus, non autem minoribus. Non quòd creditores si velent, prohiberentur eos minoribus induere, sed quòd inuiti minoribus induere non cogerentur. Ceterùm ante 12. tabulas, non solùm in vincula, in neruum, aut aliò, quò creditoribus erat lùbitum, addicti ducebantur, iuxta Plauti illud in Bacch. *Ducito nos quocumque lubet, tanquam vobis addictus quidem* : sed etiam verberibus cædi, fame enecari, alijsq; grauissimis, & inhumanis cruciatibus affici solebant. Refert enim Liuius, anno ab vrbe condita 259. Appio Claudio, & P. Seruilio Co s s. ciuitatem secum ipsam discordem, intestino inter patres plebémque flagrasse odio, maxime propter nexos ob æs alienum. Magno, inquit Liuius, natu quidam, cum omnium maiorum suorum insignibus se in forum proiecit. Obsita erat squallo-

te vestis, fœdior corporis habitus, pal-
 lore ac macie perempti. Ad hoc pro-
 missa barba, & capilli efferauerant spe-
 ciem oris. Noscitabatur tamen in tan-
 ta deformitate, & ordines duxisse aie-
 bant, aliaq; militiæ decora vulgò mise-
 rantes eum iactabant: ipse testes hone-
 starum aliquot locis pugnarum, cica-
 trices aduerso pectore ostentabat. Sci-
 scitantibus vnde ille habitus, vnde de-
 formitas, cum circumfusa turba esset,
 propè in concionis modum: Sabino bel-
 lo, ait, se militantem, quia propter po-
 pulationes agri, non fructu modò ca-
 ruerit, sed villa incensa fuerit, direpta
 omnia, pecora abacta, tributum iniquo
 suo tempore imperatum, æs alienum
 fecisse, id cumulatū vsuris, primò se a-
 gro paterno, auitoq; se exuisse, deinde
 fortunis alijs, postremò velut tabē per-
 uenisse ad corpus: ductum se ab credi-
 tore, non in seruitium, sed in ergastulū,
 & carnificinam esse. Inde ostentare ter-
 gum fœdum recentibus vestigijs verbe-
 rum. Ad hæc visa auditæque clamor in-
 gens oritur: non iam foro se tumultus
 continet, sed passim totam urbem per-
 uadit.

tradit. Nexu vincti, solutiq; se vndiq; in publicum proripiunt, implorant Quiritium fidem: nullo loco deest voluntarius seditionis comes. Et idcirco idem Liuius Seruiliū edixisse refert, ne quis ciuem Romanum vinctum, aut clauum teneret, quominus ei nominis edendi apud Consules potestas fieret, nequis militis, donec in castris esset, bona possideret, liberos nepotēve eius moraretur. Vnde satis apparet, ante duodecim tabulas hanc legem Decemviralem in vsu Romæ non fuisse. Tunc enim nexu vincti, verberibus cædi, perpetuisque vinculis indui, & in priuatum carcerem, velut in carnificinam conijci tam diu a creditoribus solebant, donec illi vel creditorum miseratione, vel boni vindicis indulgentia, & liberalitate nexu soluerentur. Decemuiři verò hanc nimiam crudelitatem alio verum nescio an mitiore addictos territandi, excruciantiq; medio pensarunt. Quum enim illi antea in neruo ac vinculis sic detinebantur, vt nisi ijs liberarentur, totam in vinculis ætatem consumerent, satius esse existimauerūt Decemuiři, certo tēpore

eos vinciri, deinde peregrè venū mitti.
 Consultius siquidem esse iudicarunt,
 eos sexaginta duntaxat dies in vinculis
 esse, deinde venum peregrè mitti, quàm
 domi perpetuis vinculis contineri, ac
 seditiosis hominibus perpetuam cru-
 delitate, immanique creditorum sæui-
 tia, populi illacrymatione, odio pa-
 trum, plebisque inconstantia, bellis in-
 testinis, ac seditionibus fenestram ape-
 rire. Fuit autem hæc decemuiralis lex
 non desuetudine, sed expressa Consula-
 ri lege abrogata anno ab vrbe condita
 630. L. Papirio Mugellano, qui etiam
 Cursor dicitur, C. Pœtelio. II. Co s s. &
 tunc quidem sectionem, pœnâque ca-
 pitis in bonorum proscriptionem con-
 uersam fuisse, rectè ex Tertulliano Con-
 tius obseruauit. Sanè si bona iudicato
 non sufficerent, adhuc vincula, & addi-
 ctio in usu fuisse videntur, auctore Gel-
 lio: sed ita, vt nec venū amplius peregrè
 debitores mitterentur, nec sectioni ca-
 pitisve pœnæ subiecti forent, sed ad hoc
 tantum in vinculis essent, vt operas in
 seruitute pro iudicato præstarent cre-
 ditoribus, donec illis satis abundè fa-
 ctum

Etum esset. Idq; confirmat illud Senecæ
 libr.7.cap. 10. de benefic. O miserum,
 inquit Seneca, si quem delectat sui pa-
 trimonij liber magnus, & vasta spacia
 terrarum colenda per vinctos, & im-
 mensi greges pecorum per prouincias,
 ac regna pascendi. Et quamuis Sulla
 Dictatore nexi omnes qui bonam co-
 piam iurassent, fuerint dissoluti, aucto-
 re Varrone lib.6. de ling. Lat. idcirco ta-
 men post Sullæ tempora addici, ne-
 que debitores non desierunt. Conces-
 sisse quidem illud Sullam C. Popilio ro-
 ganti Varro scribit, fortè non vt eo iu-
 re ciues Romani perpetuò vterentur.
 Dico Varronem sic intelligi posse, si-
 quidem in re tam perplexa definire ni-
 hil certi ausus sum.

C A P. I X.

De vindicibus.

CAPITE censi dicebātur, qui nullo,
 aut perquā paruo ære censeban-
 tur: proletarij à munere, officiòq; pro-
 lis edendæ appellati sunt, quòd cum re
 familiari parua minùs possent Remp.

inuare, sobolis tamen gignendæ copia
 ciuitatem frequentarent: assiduus au-
 tem & pro locuplete ponitur, & pro fa-
 cile munus faciente: dictus ab assibus,
 id est, ære dando, quum id tempora
 Reipub. postularent: aut à muneris pro
 familiari copia faciendi assiduitate, au-
 ctore Gellio noct. Attic. libr. 16. cap. 10.
 Eoque sensu proletarium & capite cen-
 sum accepisse visus est etiam Arnobius,
 aduersus gentes, lib. 2. Desinite, inquit,
 hominem, proletarium cum sit, classibus,
 & capite censeatur, adscribere ordini-
 bus primis: cum sit inops, pauper la-
 re, & tugurij pauperis, nec patriciæ cla-
 ritatis vnquam meritis nuncupari. Sed
 quorsum hæc? Nimirum vt intelliga-
 mus, quid illud sit quod in duodecim
 tabulis idem Gellius ita scriptum fuisse
 ait: ASSIDVO VINDEX ASSIDVVS
 ESTO, PROLETARIO CIVI QVI-
 VIS VOLET VINDEX ESTO. Di-
 ximus superiore capite, vindicem, au-
 ctore Festo, veteres cum appellasse qui
 vindicabat, quominus is qui prensus e-
 rat, ab aliquo teneretur: hoc est, qui
 prensus, nexum, siue addictum libera-
 bat.

bat. Ea forma, & ratione, qua vindicem
 æris alieni, libertatisq; , pro redemptore
 in epistolis ad Atticum, alijsq; in locis
 accepisse videtur Cicero. Eoque sensu
 accepisse etiam visus est, vindicem liber-
 tatis, Liuius lib. 6. Id verò, inquit, ita ac-
 cendit animos, vt per omne fas ac nefas
 secuturi vindicem libertatis videren-
 tur. Sic Brutum idem Liuius vindicem
 appellat libertatis, lib. 2. Brutus, inquit,
 prior cōcedente collega, fasces habuit,
 quòd non acrior vindex libertatis fue-
 rat, quàm deinde custos fuit. Imò pro
 assertore antiquos vindicem interdum
 posuisse, in libro de testimonio animæ
 liquidò demonstrat Tertullianus: Cur,
 inquit, alibi seruit, alibi vindicem con-
 uenit? Proinde errare mihi plurimum
 videntur, tam hi qui per vindicem in
 hac lege procuratorem, quàm illi qui fi-
 deiussorem intelligunt. Alio enim respe-
 xisse videntur Decemviri. Eò nimirum,
 vt noluerint à proletarijs ciuibus, ciues
 assiduos creditoribus addictos vindi-
 cari. Certè ne proletarij cùm sint te-
 nuioris fortunæ, quàm vt asses possint
 dare, quibus assiduos è vinculis exi-

merent, ipsi pro assiduis & se, suosque liberos, familiamque totam in discrimen adducant : neve corpus liberum immunéque, assidui hominis liberandi gratia, seruituti capitisque poenæ, aut sectioni subijceretur : quod quàm iniquum sit, nemo est qui non intelligat. Et ita quidem in effectu aliud nihil visi sunt voluisse Decemuii, quàm assiduos non seruitijs cuiusquam, aut deditionibus, sed assibus vindicandos. Nam cum assiduo lex assiduum esse vindicem iubet, locupletem iubet locupleti, inquit Cicero in Topicis. Locuples enim assiduus, vt ait Aelius, appellatus est ab ære dando. Esse quidem perquàm iniquum, alterum pro altero pignorari, etiam Theodoricus Italiae Gothorumq; Rex, apud Cassiodorum libr. 4. variar. intellexit : tam inquam, quàm Romani, quàm Decemuii. Ideo autem proletario quemuis vindicem esse permiserunt Decemuii, quia eorum debita non solent esse grandiora, quàm quæ ære exiguo lui potuerint. Et ita mihi videtur.

De testibus.

NON solum in testamentis, quæ per æs & libram fiebant, sed etiam in alijs omnibus mancipationibus, is qui testis libripensve fuerat, si fidem perhibiti testimonij non approbaret, improbus erat, & intestabilis. Idq; expressa quadam lege Decemviriæ esse definitum, Gellius auctor est, libr. 15. cap. 13. quam hunc in modum puto restituentam esse: **QVI SE SEIERIT TESTARIER, LIBRIPENSVE FVERIT, NI TESTIMONIUM FARIATUR, IMPROBVS INTESTABILISQ; ESTO.** In omnibus antiquissimis exemplaribus impressis & manuscriptis, non *in testimonium feriatur*, sed *in testimonium fariatur*, expressè legitur. Vnde statim coniecturam duxi, ita legendum esse, *ni testimonium fariatur*: & verbum fariari prisceum esse, eoque pro fari veteres esse vsos. Huiusmodi siquidem antiquis fuisse morem testatur Diomedes, ut in dictionibus quibusdam sermonem ex ab-

I 5 undanti

undanti adderent, nihilque adiecta syllaba dictionibus conferret. Quo modo aggredi, pro aggredi: item mori, pro mori, veteres dixisse sapius animaduerti. Plautus in Trucul.

—Nullam rem oportet dolose aggredi.
Idem in Rudent.

—Certum est mori, quàm hunc pati:

Lenonem in me grassari.

Et ita fariari etiam antiquos dixisse, pro fari, non dubito. Igitur, Qui se seierit testari, hoc est, qui se vocari in testem passus est, libripensve fuit: *ni testimonium fariatur*, hoc est, si de perhibito testimonio rogatus, illud fari, eiusque approbare fidem non voluerit, improbus intestabilisque esto. Sic nimirum ut non tantum, sicut Theophilus videtur interpretari, ex alieno testamento quicquam capere, aut iure testamenta condere, aut in testamento testis esse prohiberetur: verum etiam ut ab omnibus, nexus & emancipationum solennibus sic arceretur, ut nunquam vel eius recipi, vel ei testimonium dici posset cap. 26. de testament. Eoque sensu intestabilem Plautus etiam videtur accepisse in milite glorioso:

Quid:

*Quid si id non faxis ? p. ut viuam semper
instabilis.*

Nunc de illo videndum, qui falsum perhibuit testimonium. Et sanè hunc è Tarpeia rupe præcipitari Decemviri voluerunt, idq; apertè testatus est Sextus Cecilius apud Gelium libr. 20. cap. 1. Qua de re ab alijs accuratè satis plurima sunt in hanc legem adnotata.

C A P. X I.

*De eius cui testimonium defuit ob-
vagulatione.*

PORTVM, inquit Festus, in duodecim, pro domo positum, omnes ferè consentiunt: CUI TESTIMONIUM DEFVERIT, IS TERTIIS DIEBUS OB PORTVM OBVAGVLATVM ITO. Idem alio loco vagulationem in hac Decemvirali lege, quæstionem interpretatur cum conuitio. Et ob, præpositione, antiquos vsos esse pro ad, testis est Ennius, cum ait libr. quartodecimo:

Omnes occisi, obcensiq; in nocte serena.

Id est, accensi. Hæc cum ita sint, nunc quid sibi Decemviri voluerint videamus.

Cui

DE OBVAGVLATIONE.

Cui testimonium deest, hoc est, qui suam intentionem nullo potest testimonio confirmare, is die tertio ad ædes aduersarij obuagulatum ibat, hoc est, aduersario iustum testibus adhibitis conuicium faciebat. Veluti si quid esse in tuis ædibus contenderem, quod quū verè ad me pertineret, tamen apud te esse nullo testimonio poteram demonstrare, illudque mihi restituere vno & altero die rogatus omnino recusares, mihi permisisse videntur Decemviri, quandoquidem deficiente testimonio inutiliter iure, aut lege ageretur, tertio die ad ædes venire, ibique ante tuas ædes rem meam repetere cum conuicio; siue, vt vtar Plauti verbis, te pipulo ante ædes tuas differre. Et hanc quidem interpretationem nostram, ita aperte visus est Plautus confirmare, vt verisimiliorem non posse, attentius paululum loco Plautino quem subiiciam perpensò, legis huius declarationem excogitari, nemo non continuò fateatur. Plautus in Aulularia cuiusdam Congrionis meminit, qui cū à Megadoro ad nuptialem cœnam coquendam (erat enim

toquus) conductus esset, & idcirco vasa in ædes Euclionis intulisset, ædibus vi eiectus vasa sibi ab Euclione petijt restitui: cùmq; ea reddere Euclio negaret, quia Cōgrioni defuit testimonium, quo docere posset, sua vasa esse in Euclionis ædib., certè repetere ea iudicio nequirit. Quid igitur fecit? Quid? Pipulo ante ædes Euclionem, ni vasa redderet, differre voluit, hoc est, vt Decemviri loquuntur, ob portum Euclionis obuagulatum ire. Plauti verba sunt hæc.

*Ita me bene amet Lauerna, tu iam nisi reddi
Mibi vasa iubes, pipulo hîc differam te ante
ædes.*

Pipulum idem esse quod conuicium Varro scribit lib. 6. de lingua Latina. In Aulularia, inquit, pipulo te differam ante ædes, id est, conuitio, declinatum à pipatu pullorum. Quia igitur obuagulationo etiam nihil est aliud quàm conuictium, quis dubitabit, quin eadem planè sint, ob portum obuagulare, & pipulo aliquem ante ædes differre? Quòd igitur Euclionem ante ædes differre pipulo volebat Congrio, id omni legis huius Decemviralis auctoritate facere voluisse

se visus est. Ceterum effectus obuagulationis is olim fuisse videtur, vt tertio die, iusto praesentibus superstitibus conuittio solenniter ob portum facto, licuerit conuittiatori eius qui conuittium passus erat aedes cum iisdem testib. ingredi: & liberam res suas quaerendi in suis aedibus potestatem facere is cui conuittium factum erat suo conuittiatori congebatur. Indeque Festum obuagulationem definiuisse quaestionem, hoc est, inquisitionem cum conuittio; est verisimile. Ea nimirum ratione, qua furtorum quaestiones cum lance & licio illarum furtorum inquisitiones veteribus dicuntur, quae cum lance & licio fieri solebant.

C A P. X I I .

De tutelis.

LEGE duodecim tabularum, inquit Caius, permissum est parentibus liberis suis, siue foeminini, siue masculini sexus, si modo in potestate sint, tutores testamento dare. cap. i. de testam. tuto. Legisque haec fuisse verba: PATERFAMILIAS VTI LEGASSIT SVPER

PECUNIA TUTELAVE SUAE REI;
 ITA IUS ESTO. in fragmentis testa-
 tus est Vlpianus tit. I I. & auctor ad He-
 rennium lib. I. Quam legem deinde in-
 terpretans Pomponius, his verbis, *Vti*
legasset super pecunia tutelave suae rei, ita ius e-
sto, (sic enim restituendus est hic Pom-
 ponij locus, qui in Pandectis etiam Flo-
 rentinis mutilus hunc in modum legi-
 tur: *Vti legasset suae rei, &c.*) latissimam pu-
 tat potestatem tributam videri, & hæ-
 redis instituendi, & legata & libertates
 dandi, tutelas quoque constituendi: sed
 id interpretatione coangustatum esse,
 vel legum, vel auctoritate iura consti-
 tuentium, cap. 120. de verb. sign. Cete-
 rum quibus testamento tutor datus nō
 erat, his agnati legitimi tutores fuerūt.
 Legitimæ tutelæ, inquit Vlpianus, legē
 12. tabularum agnatis delatæ sunt; &
 consanguineis. c. 1. de legit. tut. Decem-
 uiri cōsanguineorum nomen non agno-
 scunt: liberos enim appellant suos hæ-
 rēdes, consanguineos verò omnesque
 qui ex latere familiam attingunt per se-
 xum virilem, communi nomine agnatos
 vocant, vt alio loco demonstraui-
 mus.

Legi-

Legitimi tutores sunt, inquit Vlpianus, qui ex lege aliqua descendunt: per eminentiam autem, qui ex lege 12. tabularum introducuntur. Introducuntur quidem vel propalam, hoc est, specialiter, siue nominatim, quales sunt agnati, vel per consequentiam, quales sunt patroni. Non enim expressa lege aliqua Decemviri libenteris liberti patrono deferretur tutela, sed quia patronis hereditates libertorum lege duodecim tabularum ab intestato conceduntur, & quia natura æquum est, ad eum onus tutelæ pertinere, ad quem commodum spectat successionis, ideo per consequentiam manumissor impuberis manumissus tutor efficitur: non tam verbis quam legis sententia, ideoque etiam legitimus appellatur, cap. 2. de legit. tutor. Non enim id tantum quod nominatim lege cautum erat, legitimum dicebatur, verum etiam quod perinde accipiebatur per interpretationem, atque si legis verbis expressè introductum fuisset. Ea fortassis ratione, qua multorum matrimoniorum experientiam legitimæ cuiusdam intemperantiæ signum appellat

appellat Valerius libr. 2. cap. 1. Non enim verbis expressis alicuius legis huiusmodi matronis imperata fuit intemperantia, sed legis illius quæ contra creberrimum aliquando lata fuit, vera sententia, intemperantiam huiusmodi suadere omnino videbatur, eaque etiam idcirco legitima videtur à Valerio appellata fuisse. Et hæc hætenus de tutelis, quibus illud etiam addendum videtur: nimirum suspecti tutoris crimen, ex lege. 12. tabularum descendere, tutoremque propter admissam administrationem, in duplum eadem lege teneri. cap. 1. de suspect. tuto. cap. 55. de administrat. & peric. tut. quod qua ratione accipiendum sit, alij docuerunt.

C A P. XIII.

De Curatoribus furiosi, vel prodigi.

VOLVERUNT Decemviri, furiosos in tutela agnatorum esse, gentiliūque. Cicero legem his fuisse conceptam verbis testatur, lib. 2. de inuentione: SI FURIOSVS ESSE INCIPIT, AGNATORVM GENTILIVM-

QVE EIVS, POTESTAS ESTO. Paulus admonuit, hæc verba *agnatorum gentiliūq;*, pro separatis accipienda esse, c. 53. de verb. signif. Quod quidem verissimum est: Decemviroꝝ enim huiusmodi videtur esse sententia, vt voluerint agnatis deficientibus, ad eos gentiles qui agnati non sunt onus huiusmodi tutelæ deuolui. Gentilis, inquit Festus, dicitur, & ex eodem genere ortus, & is qui simili nomine appellatur: vt ait Cincius, gentiles mihi sunt, qui meo nomine appellantur. Ergo gentiles, non eos tantum veteres appellasse videntur, qui ex eodem genere essent orti: sed illos etiam, qui licet non generis eiusdem, eiusdem tamen nominis erant: eoque sensu gentiles etiam serui appellabantur, vt Marcipor, id est, Marci puer, auctore Plinio: sic etiam ab alijs adnotatum est, Ciceronem Regem Tullium gentilem suum appellasse, cum interim ab eo genus Cicero nequaquam traheret. Sed de istis gentilibus Decemviri hic non loquuntur. Illi siquidem de huiusmodi gentilibus sentiunt, quales definiuit, Sceuolam secutus, in topicis

Cice-

Cicero, hunc in modum : Gentiles sunt qui inter se eiusdem nominis sunt, qui ab ingenuis oriundi sunt, quorum maiorum nemo seruitutem seruiuit, qui capite non sunt diminuti. Elegans definitio: in qua maiores appellari patrem & auum, docuit rectissimè Connanus. Idem Connanus gentem familiarum multitudinem denotare, acutè (vt est lepidus & totus acutus) adnotatum reliquit. Gentilis igitur appellari non potest is, cuius maiores, hoc est, auus & pater seruitutem seruierunt. Certè quia in seruis gentilitia natura non suberat in vsu, in nostris nominibus, qui sumus in Latio, & liberi, necessaria, inquit Varro, libro octauo, de lingua Latina. Quia igitur qui ex seruis maioribus est ortus, nullum ex aliqua familia genus trahit, idcirco fieri non potuit, vt is aut esse, aut appellari gentilis aliqua ratione posset. Verùm eius nepotes, abnepotes, trinepotes, & ita deinceps, eorumque filij: rursus patruus, eiusque filij, nepotes, eorumque filij, & nepotes, vsq; in infinitum, rectè gentiles inter se & erant & appellabantur: quamuis ille,

à quo hi omnes genus primò duxerunt,
 seruitutem aliquando seruiuisset. Desi-
 nuntq; gentiles appellari, si capite fue-
 rint diminuti. Vt enim agnationis, ita
 gentilitatis iura capitis diminutione
 extinguuntur. Et hanc esse puto sen-
 tentiam verissimam, illius gentilium
 definitionis, quam ex Cicerone hic ad-
 notauimus. Nunc illud addendum est;
 agnatos à gentilibus in hoc differre, vt
 agnati omnes gentiles sint, sed non con-
 tra omnes gentiles agnati. Gentem e-
 nim quamlibet habuisse olim stirpes
 varias, hoc est, domos, siue familias, Va-
 riorum libro quinto à nobis est adno-
 tatum. Quot igitur gentis vnus erant
 familiae, totidem diuersae eiusdem gen-
 tis fuisse videntur agnationes. Agnatos
 enim Iureconsulti appellant auctore
 Vlpiano, cognatos virilis sexus ab eo-
 dem ortos. cap. 2. de suis & legit. Veluti
 patruus eiusque filij & nepotes, mihi
 sunt agnati, quia ab eodem orti sunt, à
 quo meus pater. Verum patruus ma-
 gnus, eiusque liberi, mihi non agnati,
 sed gentiles duntaxat sunt. Quae cum ita
 sint, iam facile intelligimus, in hac lege

Decem-

Decemuiros aliud nihil voluisse, quàm ad agnatos tutelam furiosorum omnino pertinere, & si nullus existeret agnatus, ad gentilem post agnatos proximum. Nec quidem furiosus duntaxat, verumetiam prodigus ad agnatos, gentilesque deduci solet. Lege enim duodecim tabularum prodigo interdictam bonorum suorum administrationem fuisse, antiqua iuris cuiusdam moribus introducti prærogatiua, testatus est Vlpianus cap. i. de curat. furios. Quo iure Caium quendam Licinium cognomine Hoplomachum à Prætore postulasse refert libro octauo, Valerius, ut patri suo bonis, tanquam ea dissipanti interdiceretur. Solent enim, inquit Vlpianus, Prætores si talem hominem inuenerint, qui neque tempus, neque finem expensarum habet, sed bona sua dissipando, & dilacerando profudit, curatorem ei dare exemplo furiosi d.c. i.

C A P. XIV.

De seruitutibus itineris, actus & via.

K

3

ACTVS.

ACTVS, vt Varro & Festus scribunt,
 in latitudinem pedes habebat
 quattuor, fortassis quod ea quadrupes
 ageretur. Viæ latitudo, auctore Caio, ex
 lege duodecim tabularum in porre-
 ctum octo pedes continebat: in anfra-
 ctum, id est, vbi flexum erat, sedecim. c.
 8. de seruitu. præd. rust. Idq; sic etiam
 Varro tradidit de ling. Lat. lib. 6. Anfra-
 ctum, inquit, est, ab origine flexum du-
 plici: dictum ab ambitu & frangendo:
 ab eo leges iubent viam in directo pe-
 dum octo esse, in anfracto sexdecim, hoc
 est, in flexu. Iter autem duorum habe-
 bat vel trium pedum latitudinem. Et
 proinde qui iter habet, actum non ha-
 bet: sed contrà, qui actum habet, is
 iter habet. cap. 1. de seruit. præd. rust.
 Ceterum via, actum, iter, & se continet:
 hoc est, qui viam habet, ius habet itine-
 ris, quod videlicet ex duorum, aut trium
 pedum latitudine constat: ius habet et-
 iam actus, hoc est, non trium solum, sed
 etiam ius quattuor pedum: qui simul se-
 ptem pedes conficiunt. Iam si addideris
 octauum pedem, non iter, non actum
 duntaxat, sed etiam se via continebit,
 hoc

hoc est, ius octo pedum. Errant profecto qui sic putant Vlpianum scripsisse: *Nam & iter, & actum in se via continet. d. c. i.* Rectè enim pro *in se*, legimus *& se*, in Pande& Flor. Nec quidem dubium est, quin ad vulgarem actus & itineris, legitimamque viæ latitudinem eo in loco respexerit Vlpianus. Ad quam semper esse respiciendum docet Iabolenus, cum alia, aut latior, aut angustior octo pedibus, non est inter contrahentes viæ seruitus expressa. cap. 13. §. 2. d. tit. Voluerunt itaque Decemviri, legitimam viæ latitudinem octo pedum spacio comprehendere. Idem si via esset immunita, cui viæ seruitus debebatur, ei qua vellet agere iumentum permiserunt: quemadmodum pro Cæcinnâ M. Cicero testatus est. Adderem nonnulla de parietum ambitu, quem esse sestertium pedem Decemviri voluerunt, nisi ea de re Brissonius in suis elegantissimis antiquitatum commentarijs luculenter scripsisset. Sanè Varro scribit de ling. Lat. libr. 4. duodecim tabularum interpretes ambitum parietis circumitum interpretatos esse.

De sumtibus funerum, & iure sepulchrorum.

CICERO libr. 2. de legibus refert, in duodecim tabulis scriptum fuisse: HOMINEM MORTVVM IN VRBE NE SEPELITO, NEVE VRITO. cuiusq; causam fuisse ignis periculū: vel, vt Paullus lib. 1. senten. scribit, ne funestentur sacra ciuitatis. Porro, Decemui-ali isto iure Romani vsi non sunt perpetuū. Ipse enim Cicero auctor est, nonnullos in hoc solutos legibus consecutos esse, vt in vrbe & vri, & sepeliri possent. Idem Cicero. libr. 14. ad Atticum scribit, Caium Casarem in foro combustum laudatūque miserabiliter fuisse. Meministi ne, inquit, te clamare causam perijisse, si funere elatus esset? At ille etiam in foro combustus, laudatusque miserabiliter, seruique & egentes in recta nostra cum facibus immissi. Nec quidem mortuum hominem in vrbe duntaxat sepeliri, aut vri prohibuerunt Decemui-ri, verumetiam nec asciari, nec poliri rogam permisserunt.

Scribit

Scribit enim in eodem lib. 2. de legibus Cicero, minutos fuisse sumtus, lamentationesque funebres Solonis & duodecim tabularum legibus : & hoc plus lege Decemuirali contineri, nè rogus ascia fieret, nève poliretur. Sic enim apud Ciceronem legitur : *Iam cetera in duodecim : Minuendi sunt sumtus lamentationesque funeris : translata de Solonis ferè legibus : hoc plus inquit, Ne facito rogi ascia, ne polito.* Hæc Cicero. Sensus est, quæ de minuendis sumtibus lamentationibusque funerum Decemuiro scripserunt, ea ferè omnia de Solonis legibus translata sunt : sed hoc plus lex. 12. tabularum inquit : hoc est, lex. 12. tabul. illud plus continet legibus à Solone latis, *Ne facito rogi ascia, ne polito.* Sunt enim hæc verba, *hoc plus*, non Decemuirorum ; sed Ciceronis, quibus lex illa Decemuiralis denotatur, quæ à Solone repetita non est. Quod qui nō animaduverterunt, fuisse hanc legem his verbis conceptam existimarunt : *Hoc plus ne facito, rogi ascia ne polito.* Sic igitur legendum est, **NE FACITO ROGVM ASCIA, NE POLITO.** ut ita affabre

construui rogam, aut de dolatis aliqui-
 bus lignis expoliri, videantur Decem-
 uiri prohibuisse: sed potius ex incom-
 positis impolitisque lignis, sine arte si-
 mul congestis, pyram fieri voluisse. A-
 scia enim instrumenti genus erat, non
 solum poliendis lignis, sed etiam con-
 struendis, connectendisq; aptum: quo in
 calcis maceratione, veteres etiam vsos
 esse, testatur Vitruuius de architect. lib.
 7. cap. 2. Igitur Decemuii ascia, siue ar-
 te aliqua fabrica, fieri vel expoliri ro-
 gam noluerunt. Ceterum sumtu tribus
 ricinijs, & vinculis purpuræ, & decem
 tjbicinibus extenuato, sustulerunt et-
 iam lamentationem Decemuii, vt eo-
 dem in loco scribit Cicero. Ricinium
 esse, refert Festus, omne vestimentum
 quadratum: cósque qui duodecim in-
 terpretati sunt, ricinium appellasse viri-
 lem togam, qua mulieres utebantur,
 prætextam clauo purpureo. Quia igitur
 vnumquodque ricinium clauum ha-
 bebat purpureum, utique obscurum
 non est, quid híc per tria purpuræ vin-
 cula intellexerit M. Cicero. Ait enim
 sumtum funebrem tribus ricinijs, & vin-
 culis

culis purpuræ extenuatum fuisse : haud dubiè per tria ricinia, & vincula purpuræ, tres viriles togas, tribus clauis purpureis prætextas intelligens. Sic ni fallor, vt in funere tres duntaxat fœminas tribus ricinijs indutas esse Decemuii voluerint, non autem vt vna fœmina tria ricinia indueret. Et cum nœnias ad tibias canere in funeribus more quodam inueterato etiam receptum esset, cum morem non sustulerunt : sed quia infinito quodā tibicinum numero funera grauabatur, Decemuii plures in funere tibicines esse quàm decem prohibuerunt. Qui quidem tibicines idcirco adhibebantur, vt ad funebres eorum tibias (quas Flamini audire nefas erat) nœniæ mortui hominis laudandi causa canerentur, auctore Festo. Fuisse etiam præficas idcirco olim conductas, vt ante domum mortui laudes eius canerent, Varro testatus est, citans illud Næuij : Hæc quidem herclè opinor præfica est, nam mortuos conlaudat. Eoq; spectat Plauti illud in Truculento :

*Sine virtute argutum ciuem, mihi babeam præ-
præfica.*

Qua

Quæ alios conlaudare absentes, sese verò non potest.

Cicero scribit, legem quoque Decemviralem his verbis lamentationem sustulisse: MULIERES GENAS NE RADVNTO, NEVE LESSVM FVNERIS ERGO HABENTO. Plinius lib. II. cap. 37. Infra oculos, inquit, malæ homini tantum, quas prisci genas vocabant, duodecim tabularum interdicto radi a fœminis eas vetante. Pudoris hæc sedes, ibi maxime ostenditur rubor. Radere veteribus idem erat quod vnguib. cruentare, digitisve conterere: indeque fidicines, a radendis siue conterendis fidibus veteres appellasse raso- res, testatur Festus. Voluerunt igitur in effectu Decemviri, lacrymis cadere permittendum, non imperandum. Quid autem per lessum Decemviri intellexerint, veteres interpretes Sextus Aelius, Lucius Aelius, non satis se intelligere dixerunt, inquit Cicero, sed suspicari vestimenti aliquod genus funebris esse. Lælius lessum interpretatur, quasi lugubrem eiulationem, ut vox ipsa significat.

ficat. Illudque eò magis verum Cicero-
ni videtur, quòd lex Solonis idipsum
vetet: eoque sensu Plautus leſsum vide-
tur accepisse, cum sic in Truc. scriberet:

— Stultus es,

*Qui facta infecta facere verbis postules: The-
tis quoq; etiam,*

Lamentando leſsum facit filio.

Quasi dicat Plautus, lamentis gemitu-
que & fœmineo ululatu, vt utar Poëtæ
verbis, filium defleuit Thetis, & tamen
suis illa lacrymis quod factum erat in-
fectum reddere non potuit. Et sic qui-
dem hunc Plauti locum accipiendum
esse, euidenter in libro de anima docet
Tertullianus: Planè, inquit, stygiæ palu-
des Poëta tradidit mortem diluentes.
Sed & Thetis filium planxit. His adden-
da est alia quoque lex, quam in eodem
libr. 2. de legibus ex duodecim tabulis
Cicero his verbis refert: H O M I N I
M O R T V O N E O S S A L E G I T O, Q V O
P O S T F V N V S F A C I A S. & ait excipi
bellicam peregrinamq; mortem. Quid
autem in hac lege sibi voluerint Decem-
viri, Cicero non exposuit. Et certè, vt
quid

quid mihi videatur paucis exponam, multum interesse putō, inter ossa legere homini mortuo, & inter hominis mortui ossa legere. nam ossa hominis quæ dispersa sunt, & non cohærent, cum simul colliguntur, tunc hominis ossa legi dicuntur. Seneca libr. 2. de ira: Dignus fuit cui permetteret à conuiuio ad ossa filij legenda discedere. Apuleius libro tertio florid. Rectà de auditorio ad exequias, eundem, legenda eius esse ossa, mox carmina. Ceterum homini mortuo leguntur ossa, cum eius cadaueri aliqua ossa adimantur. Eoque sensu viuus ossa legere dixit idem Seneca in libr. de Consolat. Adijce, inquit, incendia, ruinas, naufragia, lacerationes Medicorum ossa viuus legentium, & totas in viscera manus dimittentium. Legere siquidem pro adimere, & auferre veteres dixisse, non est obscurum, si consideremus eum dicendum esse sacrilegum, qui adimit, qui aufert res Deo ritè consecratas. Horatius serm. lib. 1. sat. 3.

*Nunc vincet ratio hoc, tantundem vt peccet,
idemq;*

Qui teneros caules alieni fregerit horti,

Et qui

Et qui nocturnus Diuini sacra legerit.

Membrum abscindi mortuo dicebatur, inquit Festus, quum digitus eius decedebatur, ad quod seruatum iusta fierent reliquo corpore combusto. Et idcirco Decemuiros cum vetant homini mortuo ossa legi, per ossa membrum aliquod ex ossibus duobus aut tribus constans, vt est digitus, existimaui intellexisse: illudque homini mortuo adimi vetuisse, ni is aut pereгри, aut in bello mortuus esset. Quum enim alicui digitus legitur, certè eidem adimuntur, siue leguntur ossa, quò post funus fiat, hoc est, vt Festus interpretatur, membrum adimitur ad quod seruatum iusta fiant reliquo corpore combusto. Credo quia molestum esset, ad eum locum amicos exequiarum causa euocare, vbi quis bello occubisset, vel vbi ciuis Romanus inter peregrinos mortem obijisset. Ideoque homini huiusmodi mortuo permiserunt Decemuiros ossa legi, quò post funus fiat, hoc est, membrum aliquod adimi, ad quod seruatum iusta Romæ fierent, reliquo corpore apud peregrinos combusto. Hæc præterea sunt in duodecim de
vinctu-

vnctura: SERVILIS VNCTURA
TOLLITOR, OMNISQUE CIR-
CUMPTOTATIO. Audio legem hanc
sic exponi, quasi pollinctores ne sint
Decemviri prohibuerint. Profectò hi
non rectè mihi intellexisse visi sunt, qua-
les olim dicerentur haberenturq; pol-
linctores. Pollinctores dicebantur, non
qui cadauera vngebant duntaxat, sed
etiam libitinariorum, quibus cadauera
elucenda, commundanda, exornandâq;
locabantur, serui. cap. 5. §. 1. de inst. act.
Eoque sensu pollinctores Plautus acce-
pisse visus est in Pœnulo :

*Carthaginenses fratres patruelès duo
Fuerè, summo genere, & summis diuitijs,
Eorum alter viuit, alter est emortuus.
Propterea apud vos dico confidentius,
Quia mihi pollinctor dixit qui cum pollin-
xerat.*

Proinde sic hanc legem intelligo, quasi
per illam vngi seruorum corpora De-
cemviri prohibuerint. Solitas etenim
alioqui in funus mortui serui impensas
fieri, testatur Vlpianus cap. 13. §. 19. de
act. empt. Sustulerunt etiam omnem cir-
cumpotationem seruilem. Nam liberi
ho-

homines quominus coronati parentantes. quam supra tumulum dapes posuissent, circumpotare potuerint, nulla lege mihi prohibitum fuisse videtur. His adde sumptuosam resperfusionem, longasque coronas, & acerras etiam Decemuiros sustulisse. Sumptuosam resperfusionem, murratam potionem Festus appellare visus est. Murrata, inquit, potione vfos antiquos indicio est, quod etiam nunc Aediles per supplicationes Dijs addunt ad puluinaria, & quod 12. tabulis cauetur, ne mortuo indatur, ut ait Varro in antiquitatum lib. 1. Scribit etiam Plinius lib. 14. cap. 12. Numam legem huiusmodi tulisse: VINO ROGVM NE RESPERGITO. Sed quia illud Numam sanxisse propter rei inopiam non dubitauit Plinius, existimo vino duntaxat murrato rogi respergi vetuisse Decemuiros, eosque hanc Numæ legem in suas tabulas non retulisse. Murrinam Festus esse contendit genus potionis, quod Græcè nectar dicitur: hanc mulieres vocabant murriolam, quidam murratum vinum, quidam id dici putant ex vux genere murrinæ nomine.

mine. Plinius verò eodem libr. cap. 13, non inter vina modò, sed etiam inter dulcia vina, odore miro, preciosisq; aromatibus condita murrinam refert: & ait Sceuolam quoque, & Lælium, & Ateium Capitonem (legem fortè Decemuiralē de murrata potione interpretantes) in eadem sententia fuisse: quoniam in Plauti Pseud. sit:

Quòd si opus est vt dulce promat

Indidem, ecquid habet? rogas?

Murrinam, passum, defrutum, mellinam.

Permiserunt igitur Decemviri, excepto murrato, rogum omni vino respergi, quem Numa Pompilius rei inopia exptessē prohibuerat aliquo vino respergi. Docet Apuleius in apologia prima, quales olim funeri odores parari soleant: Nec tamen, inquit, idcirco omnia ad nequiores suspicionem trahuntur, etsi thus, & casiam, & myrrham, ceterosque id genus odores funeri tantum emptos arbitreris, quum & medicamento parentur, & sacrificio. Dēq; huiusmodi odoribus sentire omnino visus est Festus, qui acerram interpretatur aram, quæ ante mortuum poni solebat,

In qua odores incendebantur. Ceterum de longis coronis interpretes hinc nihil adnotant, puto quia non satis, quales illæ fuerint, intellexerunt. Quidam ut audio, per coronas longas lemniscos intelligit: sed errat. tam enim rotundæ esse lemniscatæ possunt, quam coronæ longæ. Obseruauimus longis coronis busta, sepulcra, sellas curules, theatra, & currus triumphales exornari consueuisse: rotundis homines vsos esse. Obseruabunt id mecum viri omnes literati, ex illo præclaro, quem GOLTZIUS tuus Marce Laurine propediem est editurus, C. Iulio Cæsare, siue Historiæ Imperatorum Cæsarumq; Romanorum, ex antiquis numismatibus restitutæ, libro primo. De longis coronis illud accipiendum puto, quod hunc in modum scripsit in Octauio M. Minucius Felix: Sic reformidatis Deos, quos negatis, non floribus caput necitis, non corpus odoribus honestatis, reseruatis vnguenta funeribus, coronas etiâ sepulcris denegatis, pallidi, trepidi, misericordia digni, sed nostrorum Deorum. Nunc exponemus, vnde laudis ornamenta ad mortuos

pertinere Cicero manifestum fecerit. Iam illa, inquit, significatio est, laudis ornamenta ad mortuos pertinere, quòd coronam virtute partam, & ei qui peperisset, & eius parenti sine fraude esse lex impositam iubet. Idq; etiam adnotans iisdem ferè verbis Plinius, lib. 21. cap. 3. fuisse & aliam quoque legem testatus est, qua is arguebatur, cuiusque pecunia, qui non virtute, sed pactione coronam acquisiuerat. Quam legem vtpote vitiosissimam, & locum Plinij, qui etiam mendosus est, sic restituo: *Semper tamen auctoritas vel ludicro quaesitarum fuit. Namque ad certamina in circum per ludos & ipsi descendebant, & seruos suos quoq; mittebant. Inde illa duodecim tabularum lex: QVI CORONAM PACIT, IPSE PECVNIAQVE EIVS VIRTVTIS ERGO ARGVITOR.* Quam serui, equive meruissent, pecunia partam lege dici nemo dubitauit. Quis ergo honos? Vt ipsi mortuo, parentibusque eius, dum intus positus esset, forisve ferretur, sine fraude esset imposita. Hæc Plinius. Vnde intelligi perspicuè potest, duas de Circensibus coronis in duodecim tabulis leges fuisse: vnâ, qua pecunia eas acquiri prohibue-

hibuerunt Decemviri: alteram, qua coronæ virtute, non pecunia acquisita, commoditates honoresque describuntur. Et proinde in hac lege rectè pro *Qui coronam parit*, mihi reposuisse videor, *Qui coronam pācit*: præsertim quòd hanc emendationem mirum in modum verba subsequētia confirment. Quibus nimirum significatur, si coronam, quam serui equivē meruissent, præcones Aedilium iussu domino vt victori imponerent, eam lege dici pecunia partam neminem dubitasse. Et ita legem de corona, quæ non virtute, sed pecunia est acquisita, loqui, testatur expressè Plinius. Aut igitur pro *parit*, legendum est *pācit*, aut certè *pecunia parit*: vt sit sensus, qui non virtute, sed pecunia coronam acquisivit, quia virtuti fraudem fecit, virtutis ergò, & ipsum, & eius pecuniam arguendam esse. Id quod Imperat. Alexander etiam observasse visus est, cū tribuū ciuiliū munerum athletis ijs vacationem non permisit, qui æmulis corruptis, ac redemptis coronati dicebantur. cap. vnico. C. de athletis. Eoque omnino spectare videntur hi versus Plauti,

quos pronunciare in Amph. prologo
Mercurius fingitur:

Hoc quoq; etiam mihi in mandatis dedit.

Vt conquisitores fierent histrionibus:

Qui sibi mandassent delegati vt plauderent,

Quive, quò placeret alter, fecisset, minus :

Eius ornamenta, & corium vti conciderent.

Et hæc quidem mihi sufficere videntur
ad emendationem, interpretationem-
que legis illius Decemviralis, qua, qui
pactione coronam acquisiuit, arguitur.
Altera porro lex, qua homini mortuo
eiusque parentibus imponi coronæ ho-
noris gratia permittuntur, non multum
difficultatis continet, si consideremus
moris apud antiquos fuisse, vt cadauera
per dies 7. domi seruarentur, octauo
die darentur rogo, & nono sepeliren-
tur, auctore in Virgil. Seruio. Quod quū
ita sit, quis est qui non intelligat quid si-
bi Plin. voluerit, coronā sine fraude ho-
mini mortuo, cum intus positus esset, &
quum foris ferretur, eiusq; parentibus
fuisse impositam scribens? Erat & alia
lex in duodecim, qua, quod erat olim
factitatum, vt vni plura funera fierent,
lectiq; plures sternerentur, id quoq; ne
sic-

ficeret sancitum est: & fuisse in ea lege,
 NEVE AVRVM ADDITO, testis est
 M. Cicero. Meminit etiam idem Cicero
 legis cuiusdam Decemviralis, qua cum
 dentibus auro vinctis sine fraude mor-
 tuos vri & sepeliri fuit liberum. Quæ
 quidem lex sic mihi restituenda videtur:
 QVOI AVRO DENTES VINCTI ES-
 SVNT, AST IM CVM OLLO SEPE-
 LIRIER, NESI FRAVDE ESTO. Duæ
 sunt præterea in 12. leges, inquit Cice-
 ro, de sepulcris, quarum altera priuato-
 rum ædificijs, altera ipsis sepulcris ca-
 uet. Nam quòd rogum, bustumve nouū
 vetat propius sexaginta pedes adijci æ-
 des alienas inuito domino, incendium
 veretur acerbum: quòd autem forum,
 id est, vestibulum sepulcri, bustumve v-
 suciari vetat, tuetur ius sepulcrorum.
 Hæc Cicero libro secundo de legibus.

C A P. X V I.

De mancipationibus.

MANCIPIVM pro dominio in iu-
 re ciuili positum omnes consen-
 tiunt. Indèque res omnes aut manci-

pi esse, aut nec Mancipi dicuntur. Mancipi res sunt, auctore Boëtio, quæ à nostro ad alterius dominium per nexus quandam solennitatem transire possunt: nec Mancipi verò res illæ dicuntur, partim quidem quæ sui iuris & liberæ sunt, partim verò quæ dominio semper non sunt subiectæ: & si res illas addideris quæ Mancipio dari, aut accipi Mancipio nequeunt, perfecta erit rerum nec Mancipi definitio. Res Mancipi solæ Mancipari possunt: res nec Mancipi, aut nuda traditione, aut si tradi non possint, cessione acquiruntur. Inter res Mancipi prædia in Italico solo tam urbana quam rustica, eorumque iura, item serui & quadrupedes, quæ collo dorsove domantur, velut boues, muli, equi, asini, ab Vlpiano in fragmentis referuntur: reliquæ autem res nec Mancipi sunt. Et quamuis elephanti & camelis dorso colloque domari possint, eos tamen idcirco idem Vlpianus inter res Mancipi negavit numerari, quòd essent bestiarum numero. Opinor quia veteres Mancipi res appellabant, res alterius dominio semper subiectas. Nam
serui

serui, equi, asini, nulli vnquam fuere qui proprium dominum non haberent: & proinde etiam si fugissent, si surrepti essent, aut abacti, semper alicuius erant in dominio. Verum cameli & elephanti, quia sui iuris sunt, idcirco statim occupantis iure Quiritium fiunt, sine aliqua aut mancipationis, aut in iure cessionis, vel usucapionis auctoritate; siquid alienati fuerint, nuda traditione eorum dominia acquiruntur. Sed quia eorumque duntaxat occupantis esse intelliguntur, donec eius custodia coercentur, hinc factum etiam deinde videtur, ut cameli & elephanti, licet collo dorsove domati essent, inter res tamen Mancipi non referrentur. Non enim satis erat, Mancipium quid fuisse, ut posset rerum Mancipi numero comprehendere, verum etiam Mancipium esse perpetuo debebat. Sanè seruus quam diu seruus est, Mancipium est: elephas verò Mancipium diutius esse non potest, quam custoditur. Nam semel ubi custodiam euasit, & in pristinam libertatem sese recepit, Mancipium esse desinit. §. feræ. Instit. de rer. diuis. Prædia in Italico solo Mancipi

esse tradidit Vlpianus. Nec quidem in solo prouinciali prædia omnia nec m̄cipi fuerunt. Ciues enim Romanos in prouincijs tam prædia possedisse, & emancipasse, quàm in Italico solo, scripsit Nepoti suo Plinius libr. 6. epist. de candidatis differens, quos prædia in solo Italico comparare princeps cogebat. Eosdem, inquit Plinius, patrimonij tertiam partem cōferre iussit, in ea quæ solo continerentur: deforme arbitratum, ut erat, honorem petituros, urbem, Italiàmque, non pro patria, sed pro hospitio, aut stabulo quasi peregrinantes habere. Concurfant ergo candidati, certatim quicquid venale audiunt, emptitant, ut sint quoque plura venalia, efficiunt. Proinde si pœnitet te Italicorum prædiorum, hoc vendendi tempus, tam herculè, quàm in prouincijs comparandi, dum idem candidati illic vendunt, ut hîc emant. Hæc Plinius. Modestinus etiam scribit, eum qui officij causam in prouincia agit, vel militat, prædia comparare in eadem prouincia non potuisse, præter quàm si paterna eius à fisco distraherentur. cap. 62. de contrah. empt.

Ex quibus locis verissimum apparet, non in Italico duntaxat solo, sed & in prouincijs quoque iure Mancipij ciues Romanos prædia possedisse. Nec id quidem coniecturis tantum verisimilibus, sed expressis etiam M. Tullij verbis confirmari potest, qui de quibusdam Apolonidensibus Pergamenisque prædijs hunc in modum pro L. Flacco disserit: Illud quæro, sintne ista prædia censui censendo, habeant ius ciuile, sint necne sint Mancipi? Et certè ea fuisse videtur, quantum ex Siculo Flacco possum colligere, agrorum prouincialium differentia, vt vel diuisi & assignati, vel quæstorij, vel occupatorij, aut vectigales, id est, stipendiarij, vel deniq; tributarij dicerentur. Vt enim Romani omnium gentium potiti sunt, quos agros ex hoste captos in victorem populum partiti non sunt, eos limitibus actis, aut per quæstores populo Romano vendiderunt, aut ciuitatibus, certo vectigali imposito, quod stipendiarium dicitur, reddiderunt. Quod quum ita sit, non est igitur dubium, quin ager ille, quem à Romano ciue ciuis Romanus emebat in
pro-

prouincijs, rerum Mancipi numero sic
 contineretur, vt eius dominium, non
 traditione nuda, sed per Mancipatio-
 nem, aut in iure cessionem duntaxat
 transferretur. Ceterum agri vectigales,
 & stipendiarij, item tributarij, ideo iu-
 ris nec Mancipi sunt, quia vectigales
 populi Romani, tributarij principis
 sunt proprietate, vsu verò & fructu pro-
 uincialium, auctore Theophilo: & idcir-
 co à possessoribus dari Mancipio ne-
 queunt. Et eò quidem visus est omnino
 Iabolenus respexisse, possessionem ab
 agro iuris proprietate sic distinguens,
 vt quicquid apprehendimus, cuius pro-
 prietas ad nos non pertinet, nec perti-
 nere potest, id appellari possessio de-
 beat. cap. 115. de verbor. signific. Quo
 sensu possessiones etiam Festus agros
 definiuit latè patentes, qui non Man-
 cipio sed vsu tenebantur, quos vt quisque
 occupauerat, colebat. Est autem Man-
 cipatio, auctore Vlpiano, propria spe-
 cies alienationis rerum Mancipi, eaque
 fit certis verbis, libripende & quinque re-
 stibus praesentibus, hunc videlicet in mo-
 dum: Is qui rem Mancipio accipit, æs te-
 nens:

nens ita dicit: Hunc ego hominē ex iure Quiritiū meum esse aio, isq; mihi emptus est hoc ære, æneaq; libra. deinde ære percutit libram. Fuisse enim in veteribus mācupijs scriptum, Raudusculo libram ferito, Varro testatur lib. 4. & 5. de ling. Lat. Illudque in mancipando etiam dici solitum, Festus obseruauit. Quum autem libra raudusculo esset percussa, tunc is qui rem mancipio capiebat, æs ei dabat, à quo rem accipiebat mancipio, auctore Boëtio: qui etiam mancipationem hanc lege 12. tabularum, sic esse introductam contendit, vt mancipi res aliquas eadem lege abalienari potuisse, nisi per hanc solennitatem expressè negauerit. Proinde si à Romano ciue ciuis Romanus seruum emisset, isq; traditus esset, neque tamen mancipatus, nec in iure cessus, aut anno possessus, seruum quidem in bonis emptoris esse, ex iure Quiritium verò eundem remanere venditoris, testatur Vlpianus in fragmentis titulo primo. Sic nimirum vt vsu & fructu seruus emptoris esset, mancipio verò & nexu venditoris. Quò respectu visus est etiam M. Cicero, quum ita lib.

lib.7.epist.famil.scriberet: Cuius quando proprium te esse scribis mancupio & nexu, meum autem usu & fructu, contentus isto sum. Huc quoque spectat illud Arnobij aduersus gentes libr.2.Usu & illis est vita, non mancupio tradita. quamuis aliter quidam inferant. Esse enim duplex dominium Theophilus ait, vnum naturale, alterum legitimum: & is qui naturale duntaxat dominium habebat, rem in bonis habere, qui verò legitimus, iure Quiritium dominus esse dicebatur. Et eò quidem spectare Decemviri videntur, quum venditas res, & traditas aliter emptori nō acquiri, in duodecim tabulis scripserunt, quā si is venditori precium soluisset, aut ei satis alio modo fecisset. §. venditæ. Instit. de rer. diuis. Quia enim ex his quæ de mancipatione hic adnotata sunt, liquido constat, statim vbi res emptam mancupio data esset, emptorem eius legitimum dominium iure Quiritium adeptum fuisse, etiam si precium non verè, sed dicis duntaxat gratia interuenisset, ideo si non Iustinianum, saltem legem quam, allegat Decemviralem, eiusque

que interpretes sic esse intelligendos
puto, vt contenderint rem venditam a-
liter emptoris facere venditorem non
cogendum, quàm si ab emptore vendi-
tori satis esset abundè factum. c. 19. de
contrah. empt. cap. 5. §. 8. de tribut. act.
Tunc enim nō erat satis emptori à ven-
ditore rem tradi, sed etiam emptoris
eam facere, hoc est, rem emptori
mancipio dare, aut ea in iure cedere
venditor lege. 12. tab. cogeatur. Quia
enim, vt est expositum, qui rem vendi-
derat, & tradiderat, neq; mancipio de-
derat, nec ea in iure emptori cesserat, e-
ius iure Quiritium dominus manebat,
eadem interim in bonis emptoris vsu
& fructu existente: idcirco emptor rem
emptam poscere solebat mancipio: hoc
est, rem non solum tradi, verum etiam
suam legitimè fieri postulare: siquidem
nuda traditione ante Iustiniani consti-
tutionem rerum Mancipi dominia non
transferebantur. Huc spectat Plauti il-
lud in Mostel. *Iube ades mancipio poscier.*
Quamuis interim Mancipi res ita etiam
potuerit alienari, vt eam Mancipio dare,
aut in iure cedere venditor non cogere-
turi

DE MANCIPATIONIB.
tur: nimirum cum sic inter contrahen-
tes actum esset. Plaut. in Pers.

*Prius dico hanc mancupio nemo tibi dabit:
iam scis? D. scio.*

Et tunc quidem plerunque solet, aut
dupla, aut simpla promitti, si Varroni
credimus lib. 2. de re rust. Solet, inquit
Varro, si mancupio non datur, dupla
promitti, aut, si ita pacti, simpla. Hinc
fortè simplaria veditio, de qua suo loco
latius. Illud etiam tunc obseruabatur, vt
eiusdem rei venditor & emptor in so-
lidum essent domini: sed hic quidem
bonitarius, ille verò quiritarius. Eoque
spectare videntur, titulus, & Imp. Iust.
constitutio, *De nudo iure Quiritium tollen-*
do. Qui quidem Iustinianus, cum etiam
rerum mancipi, & nec mancipi diffe-
rentiam aboleuisset, mancupationem
visus est omnem ita sustulisse, vt amplius
rem emptoris facere, hoc est, rem man-
cupio dare venditor, non cogeretur, sed
tam nuda traditione legitima rerum
mancipi dominia, quam rerum nec
mancipi acquirerentur. Qua sola ratio-
ne factum deinde videtur, vt nulla hu-
iusce Quiritium iuris, veterisque rerum
man-

mancipi & nec Mancipi differentia, in nostris Pandectis supersint vestigia. Et ubicunque nexu tradere, aut Mancupio dare legebatur, ibi dare, tradere, aut præstare visus est Tribonianus reposuisse: ne videlicet animi iuuenum, qui ad primam legum veniunt audientiam, iuris Quiritium Mancipijq; verbis perterriti, inutiles, si Dijs placet, legis antiquæ, hoc est, Decemviralis dispositiones accipiant, auctore Iustiniano cap. vnic. de nudo iur. Quirit. toll. Et ita quidem Mancipatione dominia rerum acquirebantur. Ceterum in iure cessio, communis erat alienatio, inquit Vlpianus, & rerum Mancipi & nec Mancipi, quæ fiebat per tres personas, in iure cedentis, vindicantis, addicentis. In iure cedebat dominus, vindicabat is cui cedebatur, addicebat Prætor. Nec sanè cessione duntaxat, sed etiam nuda traditione res nec Mancipi acquirebantur, auctore eodem Vlpiano: traditione quidem res mobiles, cuius generis sunt apri, ursi, leones, cervi, & alia id genus animalia, quæ bestiarum numero sunt: cessione verò res immobiles,

M

qua-

quales sunt possessiones prædiorum ve-
 stigalium, aut tributariorum. Quia e-
 nim huiusmodi prædia in bonis dunta-
 xat sunt possessorum, proprietate verò
 populi Romani, aut Principis: & quia
 nihil aliud mancipium est, quàm pro-
 prietas, siue dominium legitimum, cer-
 tè nulla mancipatione à possessoribus
 potuerunt alienari. Sed quandoquidem
 usu & fructu eadem prædia possessorum
 essent, usum & fructum non mancipa-
 tione, sed cessione rectè alienabant: sic
 nimirum, ut illo eodem iure, quo in hu-
 iusmodi prædijs utebantur, alteri rectè
 apud prouinciæ Præsidentem in prouincijs
 possessores cederent: proprietate inte-
 rim manente penes populum aut Prin-
 cipem semper salua. Quod autem Varro
 scribit libro secundo de re rustica, ces-
 sionem legitimū dominium in emptio-
 nibus perficere, si quis ei in iure cessit,
 cui cedere potuit, & id ubi oportuit, sa-
 ne eleganter illud explicat Boëtius in
 Top. Cicer. Fiebat, inquit, cessio tali mo-
 do: Apud magistratum populi Romani,
 vel apud Prætorem, vel apud Præsidentem
 prouinciæ, is cui in iure re aliqua cede-
 batur,

batur, rem tenens ita vindicabat, Hunc ego hominem ex iure Quiritium meum esse aio. Deinde postquã hic vindicasset, Prator eum interrogabat qui cedebat, an contra vindicaret: quo negante, aut tacente, tunc ei qui vindicauerat, eam rem addicebat, idq; legis actio dicebatur. Unde illud imprimis observatione non indignum videtur, legis videlicet actionem veteres tam ad imaginariam, quam ad veram rei vindicationem retulisse. Nam qui lege in rem aliquam agebat, is hac vti eadem formula solet. Et idcirco magistratum, apud quem legis actio est, cuius Modestinus & Ulpianus meminerunt. cap. 4. de adopt. cap. 3. de offic. Procons. cap. 1. de offic. Iurid. eum rectè interpretabimur, apud quem non solum legitimis actionibus liberum cuius erat experiri, filium emancipare, aut adoptare, sed vindicanti etiam suo iure cedere. Nunc videndum est, quid à nexu mancipatio differat. Nexum, inquit Festus, est quodcumque per as & libram geritur, idq; necti dicitur: quo in genere sunt testamenti factio, nexi datio, nexi liberatio. Manilius autem, te-

ste Varrone libro sexto de lingua Latina, nexum esse etiam scribit, omne quod per libram & æs geritur, sed ita ut in eo sint res Mancipi. Denique Mutius Scevola, ut ait idem Varro nexus appellatione existimavit contineri, quæ per æs & libram fiunt ut obligentur, præterquam quæ Mancipio dantur. Igitur ex Scevolæ sententia differre à Mancipatione in hoc videtur nexus, quod res Mancipi nexu obligentur, non autem Mancipio dentur: hoc est, Mancipatione non alienentur. Et hoc quidem tunc verum esse non dubito, quum ut species nexus accipitur. Testis est enim Aelius Gallus, omne quod per æs & libram geritur, genere quodam nexum appellari. Et idcirco si illud in suas species distribuere exemplo adoptionis, recte dices nexum, hoc est, omne quod per æs & libram geritur, in quendam nexum specialem, & in Mancipationem discendere. Itaque genere quodam omnis Mancipatio nexus est. Quo sensu rem illam quæ Mancupio datur, nexu tradi, dixit in Topicis Cicero. Ab alienatio, inquit, est eius rei quæ Mancipi est, aut traditio

alte-

alteri nexu, aut in iure cessio, inter quos ea iure civili fieri possunt. Rursus, specialiter, mancipatio nexus non est, auctore Scevola: cum enim nexum ut speciem sumimus, tunc omne quod per æs & libram geritur, præterquam quod mancipio datur, nexus appellatione continetur. Testamenta per æs & libram nexu fiunt, non mancipatione. Pignora dicuntur necti, non mancipari. cap. 22. §. 1. de iur. fisci. Quod igitur per æs & libram alienatur, mancipari, & quod eodem modo obligatur, necti propriè & specialiter dicitur. cap. fin. C. Si aliena res pig. Ceterum effectus mancipationis is fuisse videtur, ut ubi res mancipi mancupio data esset, iure Quiritium eius qui cum mancupio acceperat, ita efficeretur, ut ille vero domino rem suam vindicanti, non restituere, sed laudare duntaxat auctorem suum cogeretur. Idq; pro Murena expressè testatus est Cicero. Quò spectat Plauti illud in Mercat.

Non ego illam mancupio accepi, sed ille illam accepit. D. sine.

CH. Non potes tu lege vendere illam.

DE MANCIPATIONIB.

Loquitur adolescēs Charinus de puella,
quam cū matri se emisse Demiphoni
patri adolescens persuasisset, eam pater
alienare simulauit se velle: id ne fieret,
fingit adolescens non se, sed amicum
quēdam eam mancipio accepisse, pro-
indēq; nec sibi, nec patri integrum esse,
eam alienare. Quibus addenda sunt
quæ in Curcul. sic idem Plautus scribit:

Memento promississe te, si quisquam hanc li-
berali

Causa manu adfereret, mihi omne argentum
reditum iri:

Triginta minas. C. A. meminera, de isthoc
quietus esto.

Eb numo idem dico. L. Y. & commeminiſſe
hec ego volam te.

C. A. Memini, & mancipio tibi dabo.

C. V. R. Egon' v' ab lenone quicquam

Mancipio accipiam: quibus suum nihil est, nisi
vna lingua:

Qui abiurant si quid creditum est? alienos
mancupatis,

Alienos manumittitis, alienisq; imperatis:

Nec vobis auctor ullus est, nec vos nict estis
vlli.

Et hæc quidem sic olim obseruabantur,

si res

si res quæ erat mancipata eius esset conditionis, vt dari mancipio posset, & ab eo daretur, à quo dari mancipio poterat. Nam si id datū mancipio esset, quod dari non poterat, aut is rem aliquam mancipio dedisset, qui mancipio dare iure ciuili non potuit, nulla erat ipso iure huiusmodi mancipatio. Testis est enim libr. 2. de re rust. M. Varro, tunc de iurum mancipationem in emptionibus dominium perficere legitimum, cum quis vt debuit rem mancipio ab eo accepit, à quo iure ciuili accipere potuit, cumque, vt ait in Topic. Cicero, res ea mancipio datur, quæ dari mancipio potest. Finge, inquit Cicero, mancipio aliquem dedisse id, quod mancipio dari non potest, num idcirco id eius factum est, qui accepit? aut num is qui mancipio dedit, ob eam rem se vlla re obligauit? Quem locum Boëtius sic interpretari videtur, vt contendat Ciceronem de rebus nec mancipi mancipatis loqui, & ideo huiusmodi mancipationem esse inualidam, quia omne quod non iure contractum est, nihil retinet firmitatis. Nunc his ita de mancipationibus, de

nexu, deque rebus Mancipi, & nec Mancipi obiter expositis, videndum est quid sibi voluerint Decemviri cum ita scriberent: *QVI NEXVM FACIET*

MANCIPIVMQUE VTI LINGVA
NUNCVPASSIT, ITA IVS ESTO:

VTI NOMINASSIT LOCVTVSVE
ESIT, ITA IVS ESTO. Sic legem

hanc apud Festum lib. 12, de verb. sign.

restituo. Etenim nuncupasso, nominasso, eso, & alia id genus verba, veteribus

admodum familiaria sunt, quemadmodum ex Plauto, Festo, & Varrone qui-

nis potest animadvertere. Testatur Cicero de Orat. libro primo, in duodecim

tabulis expresse scriptum fuisse, *vti lingua nuncupasset.* Et quia idem Cicero lib.

3. Offic. duodecim tabulis cauere etiam scribit, vt ea præstentur quæ lingua

nuncupata sunt, idcirco non dubitavi, quin ex duodecim tabulis lex ista de-

sumpta fuerit. Qua quidē lege nihil aliud visi sunt Decemviri voluisse, quam ea

duntaxat quæ in nexu aut Mancipatione expressa sunt, præstari: ea verò quæ

lingua nuncupata non sunt, non præsta-

ri. Videntur etiam hæc verba, *nexum
mancipiūque*, licet coniuncta sint, pro
disiunctis tamen Decemuiri posuisse;
sicut illa, *agnatorum gentiliūque*, siqui-
dem vt est declaratum, nexus & manci-
patio, nonnihil inter se differunt. De-
cemuiri ea præstari quæ lingua essent
in mancipando nuncupata duntaxat
voluerunt: Iurisconsulti etiam reticen-
tiæ pœnam introduxerunt, vt auctor est
eodem in loco Cicero. Nam cum, in-
quit, ex duodecim tabulis satis esset ea
præstari, quæ essent lingua nuncupata,
quæ qui inficiatus esset, dupli pœnam
subiret, à Iurisconsultis etiam reticen-
tiæ pœna est constituta: quicquid enim
inest prædio vitij, id statuerunt, si
venditor sciret, nisi nominatim dictum
esset, præstari oportere. Nec id absur-
dum adeo, si verum est quod Pompo-
nius scribit, perlatis nimirum legibus
Decemviralibus, quia naturaliter eue-
niebat, vt earum interpretatio deside-
raret prudentum auctoritatem, neces-
sariam fuisse fori disputationem, qua ius
quoddam à prudentibus componeba-
tur, quod communi nomine appellatur

ius ciuile. cap. 2. §. His legibus latis de orig. iur. Et in hoc quidem iure componendo hanc mihi prudentes rationem secuti videntur, vt partim leges interpretarentur, partim quæ legibus deesse videbantur, ea supplerent. Interpretabantur, si quid obseruari non legum verba, sed earum sententia omnino suaderet: vt contingit in legitima patronorum tutela. Suppleuissent etiam ea Iurisconsultos, quæ duodecim tabulis deesse videbantur, obscurum non est, si consideremus, ius quod ab ijs compositum fuit, appellari ius non scriptum consueuissè, hoc est, ius duodecim tabul. non comprehensum. Omne enim ius, aut scriptum, hoc est, inclusum duodecim tabulis, aut non scriptum, hoc est, ijsdem tabulis prudentum auctoritate adiectum tunc appellabatur, cum legibus perlatis Decemviralibus esse necessaria fori disputatio cœpisset. Quo tempore iuris non scripti fuisse videntur, vsucapio seruitutum, vsucapio libertatis, vsucapio hæreditatis, tutela sceminarum, tutela fiduciaria, prohibita inter virum & uxorem donationes,

pro-

prohibitæ mulierum intercessionibus, reticentiæ pœnæ, & id genus alia, de quibus in libro singulari De auctoritate prudentum, fauente Deo, differemus. Et ita quidem scripto iure, quæ lingua fuerant nuncupata in mancipando, eaduntaxat præstabantur: iure verò non scripto, etiam reticentiæ pœnæ sunt constitutæ. Hæc hæctenus de mancipationibus. De conuentionibus autem legitimis nihil hîc tractabitur, certè quia de ijs Variorum libro quarto accuratè differuimus, legem illam Decemuiralem interpretantes, cuius auctor ad Herennium libr. 2. meminit. Nunc de vsucapionibus videamus.

C A P. X V I I.

De vsucapionibus.

QVI possidet, vel à domino possidet, vel à non domino. Qui à domino possidet, iure gentium & ciuili dominus esse potest: potest etiam iure gentium dominus esse, & non ciuili: rursus iure ciuili, & non iure gentium. Qui rem mancipi mancipio accepit, is tam

is tam ciuili quàm gentium iure dominus est: qui re in bonis habet, iure gentium, non ciuili: qui dominus rei quiritarius est, iure ciuili non gentium rem possidet. Qui autem à non domino possidet, nec iure gentium dominus est, nec iure ciuili: sed vsum rei, siue possessionem illius nudam habet ad certum tempus sine dominio: quo tempore finito, nudæ possessioni dominium adjicitur. Et ita qui nec gentium, nec ciuili iure dominus erat, tempore legisque beneficio tam rei possessæ dominus efficitur, quàm si mancipio, aut cessione eam acquisuisset. Quòd cum ita sit, nunc intelligimus quid sibi voluerit pro Cecinna Cicero, quum ita scriberet: *Lex vsum, auctoritatem fundi iubet esse biennium.* Et in Topic. *Quoniam vsus, auctoritas fundi biennium est, sit etiam ædium.* Sensus enim est: Lex voluit vsum esse fundi auctoritatem: quamdiu? biennium: hoc est, fundi auctoritatem non diutius biennio ex nudo vsu & sola possessione constare: siquidem finito biennio, eadem lex possessioni voluit adjici dominium. Certum autem est, qui quid mihi

vendit, eum auctorem meum dici. cap. 14. in fi. de Public. in rem act. cap. 4. §. 1. cap. 6. §. 4. cap. 52. §. 3. de act. empr. & ob id, ins quod idem venditor in me transfert auctoritatis nomine etiam contineri. cap. fi. de pignor. act. Et quia plus iuris in emptorem transferre, quam ipse habet, venditor non potest, idcirco fieri etiam potuit, ut interdum auctoritas fundi, ex nudo soloque usu constaret: quod tunc accidere solet, cum a non domino res emitur. Igitur ne quarundam rerum diu, & fere semper incerta dominia essent, voluerunt Decemviri certo quodam tempore usum esse earum auctoritatem: hoc est, earum auctoritatem ex nuda possessione certo quodam tempore constare, eoq; finito auctoritati ex nudo usu constanti dominium adijci. Proinde recte mihi Modestinus visus est, usucapionem, non ademptionem cum Vlpiano, sed adiectionem dominij definiuisse. cap. 3. de usurpat. Est enim usucapio modus legitimus, quo per continuationem possessionis, possessioni nudæ dominium adijcitur: adiectioque dominio, qui auctoritas

ritas vsuaria beneficio legis habetur
rata, idcirco non amplius auctoritas
duntaxat, sed rata auctoritas vsus ap-
pellatur. Quamobré errare mihi pluri-
mū vili sunt, tam qui apud Ciceronem,
pro biennium, biennij, quàm qui bien-
nis legunt, loco biennij. Voluerunt igitur
Decemviri vsum esse auctoritatem,
fundi quidem biennium, rerum verò
mobiliū, annum, aduersus hostem &
rerum furtiuarum æternam. De lege A-
tinia hic nihil dicam. De quinque pe-
dum vsucapione, scribemus alio loco.

C A P . X L I X .

De testamentis.

DECEMVIRALIS lex testamen-
taria nullam habet obscuram sen-
tentiam: siquidem eius hæc verba sunt:
PATERFAMILIAS VTI LEGASSIT
SVPER PECVNIA, TVTELAVE REI
SVAE, ITA IVS ESTO: auctore Ci-
cerone de inuent. lib. 2. Cornificio Rhe-
toric. libr. 1. & Vlpiano in fragmentis,
tit. 11. Permiserunt enim Decemviri pa-
tri-

trifamiliâs, hoc est, Romano ciui qui in potestate non est, liberam testandi facultatem. Legare autem Decemuiris idem esse, quod Iureconsultis testari, alio loco diximus. Porro latissimam hanc testandi potestatem interpretatione coangustatam esse vel legum, vel auctoritate iura constituentium, auctor est Pomponius cap. 120. de verborum significat. Hinc originem habent leges tot testamētariæ, Falcidia, Furia, Volumnia, Velleia, Cornelia, Caninia, Sentia, Papia, Glicia. Hinc regula Catoniana, hinc Aquiliana formula. Adderem varia testamentorum genera, sed quæ ab alijs rectè tractata sunt, hic repetere non est necesse. Vt interim non omittamus, actionem familiæ erciscundæ ex duodecim tabulis descendere. cap. 1. famil.ercisc. Et nomina ipso iure in portiones hæreditarias ex eadem duodecim tabul. lege esse diuisa, Gordianus Imperator rescripsit. c. 6. C. famil.ercisc. quod quidem rescriptum qua ratione accipiendum sit, commodiore loco demonstrabimus.

De successione ab intestato.

EVNDEM secuti in successionebus
 Decemviri & Prætores ordinem
 sunt. Quemadmodum enim illi antè de
 iudicijs testantium, deinde verò de suc-
 cessione ab intestato tractarunt: sic hi
 postea quàm de bonorum possessione
 eius qui testatus est, edixissent, transi-
 rum ad intestatos fecerunt. c. 1. Si tab.
 test. Et sunt quidem intestati gradus
 partim legitimi, partim honorarij, sic
 nimirum, ut primum vocentur sui hæ-
 redes, secundo legitimi, tertio cognati,
 quarto vir & vxor. cap. 1. Quis ord. in
 bon. possess. Sui hæredes vocantur lege
 12. tabul. sola: legitimi verò etiam alijs
 legibus, & Senatusconsultis: cognati
 deniq;, sicut etiam vir & vxor, sine legis
 cuiusquã subsidio, ad possessionem bo-
 norum iure honorario admittuntur.
 Hinc titulos huiusmodi, *vnde liberi, vnde*
legitimi, vnde cognati, vnde vir & vxor, ita in-
 pretari soleo, quasi per eos propona-
 tur, si nullæ exstent testamenti tabulæ,
vnde liberi, vnde legitimi, vnde cognati,
 ti, vn-

ti, vnde vir & vxor ad bonorum possessionem admittantur. Nunc de successione quæ ex lege duodecim tabularum ab intestato competunt, hîc tractabimus, de alijs suo loco disputaturi. Et quidem mortuo patrefamiliâs intestato, suos hæredes ad successionem vocant Decemuiri ijsq; non exstantibus agnatos, his verbis: SI INTESTATVS MORITVR, CVI SVVS HÆRES NEC EXTABIT AGNATVS PROXIMVS FAMILIAM HABETO. auctore in fragmentis Vlpiano, tit. 26. Decemuiri intestatum appellant, aut qui nullum, aut qui non iure testamentum condidit: Iureconsulti verò etiam eum cuius ex testamento hæreditas adita non est. cap. 64. de verbor. signific. Et hoc inde potissimum, quòd hæredes, quos suos dicebant, eosdem Decemuiri necessarios esse voluerint: siquidem illi siue vellent, siue nollent, tam ab intestato, quàm ex testamento hæredes lege. 12. tabul. fiebant. §. necessarij. Instit. de hæred. qual. & diff. Passi quoque non sunt Decemuiri, foeminini sexus necessitudinem ad intestati successionem ad-

N

mitti;

mitti: adeò vt ne quidem inter matrem
& filium filiàmve vltro citròque hære-
ditatis capiendæ ius darent. §. 1. Instit.
de s. c. Tertull. Sed hæ iuris angustia
postea emendatæ sunt. Porro Iulianus
legem 12. tabul. etiam eum vocare ad
hæreditatem auctor est, qui moriente
eo de cuius bonis quæritur, in rerum
natura fuit. cap. 6. de suis & legit. Quod
sanè verissimum mihi videtur, si non ob
aliud, certè quia lex suos ad intestati hæ-
reditatem primo gradu vocans, quinam
sui dicerentur non exposuit. Et idcirco
suos deinde sic interpretati videntur
Iureconsulti, vt eorum nomine tam po-
stumos legem intellexisse, quàm filios-
familiās contenderint. Nam postumos
prudentes iuris, alios quidem suos ap-
pellasse, alios verò alienos, manifestius
est, quàm vt probationibus opus ha-
beat. Nec quidem satis erat, quem suum
dici, ad hoc vt posset ad intestati hære-
ditatem admitti, verùm necessum et-
iam fuit, vt eo nullus gradu esset proxi-
mior. Quemadmodum enim suis defi-
cientibus ad agnatos proximiores, ita
ijs exstantibus ad suos proximiores hæ-
redi-

reditas pertinet. cap. i. §. 5. & 6. de suis & legit. Igitur mortuo filio, proximum gradum obtinet nepos, nepote mortuo, pronepos, & ita deinceps. Cæterum si proponamus ex defuncto, qui duos filios habuerat, superesse filium, & ex altero filio nepotes item duos pluresve, videamus an pariter nepotes cum patruo ad auitam hæreditatem admitti debeant. Et debere quidem Caius, Vlpianus, Iustinianusque testantur, negantq; patrum, qui gradu proximior est, vltiores, quales hi nepotes sunt, excludere. Et idcirco conueniens esse aiunt, non in capita, sed in stirpes hæreditatem sic diuidi, vt filius partem dimidiam hæreditatis habeat, & ex altero filio duo pluresve nepotes alteram dimidiam. §. cum filius. Instit. de hæred. quæ ab intest. def. libr. poster. Instit. Caij tit. 9. & apud Vlpian. in frag. tit. 26. Idq; etiam lege 12. tabul. euidenter caueri, Impp. Diocletianus & Maximianus auctores sunt. c. 3. C. de suis & legit. Atque huius quidem iuris non est obscura aut admodum absurda ratio, si consideremus patrefamiliās mortuo in stirpes

siue diuersas familias eius domum discedere. Adeò quidem, vt quot filij fuerant familiâs, totidem cōfestim patresfamiliâs efficiantur, qui singuli singulas & separatas familias, siue stirpes constituunt. Si igitur patrefamiliâs mortuo tres superfuerint filij, in stirpes tres familia paterna diuidetur: & quia non plura quàm tria capita sunt, idcirco non in stirpes solum, sed & in capita exercisci familia dicitur. Verùm si duo supersint duntaxat filijfamiliâs, & ex tertio nepotes duo pluresve, hîc non in capita, sed in stirpes ideo fieri diuisio debet, quia plura sunt capita quàm stirpes: & in plurâ capita quàm sunt stirpes familiam huiusmodi discedere, ne natura quidem æquum est. Et quamuis filij nepotibus in paterna successione proximiores esse natura videantur, tamen consideratione quadam stirpium ciuili proximiores non sunt, & ideo nepotibus non præferuntur. Si non ob aliud, certè q̃ mortuus non esse tertius ille filiusfamiliâs præsumatur, cuius supersunt filij: qui omnes eandem, stirpis consideratione, quam pater sustinuerat, simul

simul induisse personam in auita successionem finguntur. Et hæc quidem hæc-
 nus de primo legitimorum hæredum
 ordine. De altero, eorum nempe qui ag-
 gnati dicuntur, illud dicendum restat,
 videlicet agnatorum appellatione con-
 sanguineos quoque in hac lege conti-
 neri. Admonuimus enim aliquando, ab
 agnatis consanguineos separasse Iure-
 consultos, quos Decemviri agnatorum
 nomine complexi sunt. Quinam autem
 agnati sui dicerentur, & quis filius dica-
 tur agnatus patri, in eo capite exposui-
 mus, quod de veris agnationum cognat-
 ionumq; differentiis libro quinto Va-
 riorum inseruimus. Itaque si nemo suus
 esset hæres, lege Decemuirali ad agna-
 tum proximum hæreditas intestati de-
 uoluebatur, auctore Iustiniano, & in
 frag. Vlpian. titu. 26. hoc est, ad consan-
 guineum, is enim agnatis reliquis gradu
 proximior est: siq; consanguineus non
 exstaret, ad agnatum post consangu-
 ineos proximum. Et tunc quidem si plu-
 res essent agnati proximiores, non in
 stirpes, sed in capita hæreditas diuidi
 solet. Veluti, si sit fratris filius, & alte-

rius fratris duo pluresve liberi, quot-
 quot sunt ab vtraq; parte personæ tot
 sunt portiones, vt singuli singulas ca-
 piant. d. tit. 26. Ideo in capita hæreditas
 hic diuiditur, quia quot sunt capita, tot
 sunt agnati diuersi: & quot sunt agnati
 proximi, tot fieri in huiusmodi hæredita-
 tibus portiones solent. Ideo non in stir-
 pes, quia fratris filij in patruī successio-
 ne patris sui personam non induunt, q̃
 in auita successione nepotes faciunt,
 cū hæreditas in stirpes scinditur. Tunc
 enim quot filij familiæ, hoc est, quot di-
 uersæ stirpes sint quæritur, quemadmo-
 dum in agnatorum hæreditatibus, quot
 agnati proximi, id est, quot capita. De
 libertis autem ecquid in duodecim fue-
 rit, Vlpian. exposuit tit. 27. Ita demum,
 inquit, lex duodecim tabularum ad hæ-
 reditatē liberti vocat patronum, si inte-
 llatus mortuus esse libertus, hærede suo
 nullo relicto. Idq; etiā alio loco idem Vlpianus testatus est. c. 3. de suis & legit.
 Deniq; ad liberos patronorum hæredi-
 tas defuncti liberti ita pertinebat, vt in
 capita, non in stirpes ea diuideretur, au-
 ctore eodem Vlpian. d. tit. 27.

C A P. X X.

De connubio patrum.

IN duodecim tabulis scriptum fuisse, ne patricijs cum plebeijs connubium esset, non Dionysius solum libr. 11. sed Liuius etiam testatus est libr. 4. Auctor est idem Liuius, anno ab vrbe condita 309. M. Genutio & P. Curiatio, vel (vt alij malunt) C. Curtio Co s s. de connubio patrum & plebis C. Canuleium Tribunum plebis rogationem promulgasse, qua contaminari sanguinem suum patres, confundique iura gentium rebantur. Et refert quidem in eadem oratione Canuleius, ne connubium patribus cum plebe esset, hoc ipsum Decemuiros tulisse, pessimo exemplo publico, cum summa iniuria plebis, nullamque esse maiorem, aut insigniorem contumeliam posse, quam partem ciuitatis velut contaminatam, indignam connubio haberi, idq; nihil esse aliud quam exilium intra eadem moenia, quam relegationem pati. Sanè idem Liuius ideo Decemuiros huiusmodi connubium nō permisisse ait, ne incerta

N 4 prole

prole auspicia, quæ nemo plebeius habere poterat, turbaretur. Et quia plebs ad id maximè indignatione exarsit, quòd auspicari, tanquam iniusta Dijs immortalibus, negaretur posse, certè non antè finis contentionum fuit, quàm vi-
 ti tandem patres, vt de connubio ferretur concessissent. Et tunc quidem lex ista Decemuiralis repudiata sublataque fuit rogatione Tribunitia.

C A P. X X I.

De diuortijs.

CUM res Romana, regnante Romulo, adeò esset valida, vt ea cuilibet ciuitatum finitimarum par esse videretur, sed penuria mulierum hominis duntaxat ætatem duratura: tunc ex consilio patrum Romulus legatos circa vicinas gentes, misit, qui societatem connubiumque nouo populo peterent. Et cum nusquam benignè legatio audita esset, ad vim spectare res cœpit: cui tempus locūq; aptum vt daret Romulus, ægritudinem animi dissimulans, ludos ex industria parat Neptuno equestri
 solen-

solennes : Consualia vocat. Indici deinde finitimis spectaculum iubet. Vbi spectaculi tempus venit, tum ex composito orta vis : signóq; dato iuuentus Romana ad rapiendas iure matrimonij virgines discurrit. Idq; testatus est non Linius solum, sed etiam Tertullianus in libr. aduersus Valentinianos. Tunc, inquit, illi Sabinas raptas iure matrimonij plaudent. Et quia feliciter raptus Sabinarum Romulo successerat, ideo ab eodem Rege fuisse arbitror institutum, vt non vero, sed simulato quodam raptu omnis legitimi connubij ritus perageretur. Quo quidem tempore ea fuisse videtur matrimonij contrahendi ratio, vt vsu quisq; virginem ex gremio matris, aut ex proxima necessitudine vi simulata raptam, non aliter suam faceret, quam Romana pubes Sabinas olim virgines suas vsu fecerunt. Idq; omnino mihi visus est voluisse Festus, cum ita scriberet : Rapi simulatur virgo ex gremio matris, aut si ea non est ex proxima necessitudine, cum ad virum trahitur, quòd videlicet ea res feliciter Romulo celsit. Rapiundæ autem vi simulata vir-

stum, & licitum, ne dixerim penes Deum. Hæc ille. Ecquid autem hæc verba: *Et nunc quoque apud ipsos Romanos iustum, & licitum*, aliud significant quæso, quam in locum veri raptus apud Romanos simulatum quendam raptum in nuptijs surrogatum fuisse? Proinde usu olim uxorem in hunc modum acquiri solitam, eamque antiquissimam fuisse connubij legitimi rationem, dubium non est. Fuit etiam alia contrahendi matrimonij ratio, quæ ut in Topicis scribit Boëtius, confarreatio dicebatur, & solis Pontificibus conveniebat, hoc est, ut ego interpretor, per solos Pontifices peragebatur. Qualis autem confarreatio huiusmodi fuerit, euidenter in fragmentis exposuit Vlpianus titul. 9. Farre, inquit, convenitur in manum certis verbis, & testibus decem præsentibus, & solenni sacrificio facto, in quo panis quoque farreus adhibetur. Et quia Deos fruge colere, molâq; salsa supplicare, & far torrere, Numa primus apud Romanos instituit, auctore Plinio libr. 18. c. 2. ideo certissimum est, hanc confarreationem à Romulo institutam non esse.

esse. Quid igitur si Numam eius esse auctorem dicamus ? Subsisto, nec quicquam definitio, quamvis Dionysius libr. 2. referat, Romanos priscos sacras nuptias confarreationem appellasse. Illud interim certissimum est, ante coemptionem in usu confarreationem fuisse. Idq; obscure fatis Cicero demonstrat, in ea quam pro Murena scripsit oratione, Iurisconsultos stomachosius, quam virum constantem deceat exagitans. Ait enim sacra interire maiores noluisse: lurreconsultorum ingenio senes ad coemptiones faciendas, interimendorum sacrorum causa repertos esse. Quo in loco dubium non est, quin per sacra confarreationem Cicero intellexerit, quam introducta coemptione in desuetudinem sensim abiisse, cum Tacito contendit. Nam quod eo in loco de coemptione illa senserit, quæ in manum solet conveniri, argumento sunt hæc eiusdem Ciceronis verba subsequencia : *Vt quia in alicuius libris exempli causa id nomen inveniunt, putarunt omnes mulieres quæ coemptionem facerent, Gaius vocari.* Nam si, quod Festus Pompeius libr. 7. scribit, Tanaquil

vxor

vxor Tarquinij Prisci, vt Romam venit
 Gaia Cæcilia fuerit appellata, tantâq;
 probitatis habita, vt id nomen boni o-
 minis caussa frequētarent nubentes, vi-
 delicet vt Plutarchus ait, hunc in mo-
 dum: *Vbi tu Gaius ego Gaia*: certè quod
 Cicero de Gaia dixit, id à Gaia Cæci-
 lia originem trahere, & per consequens
 ad coëmptionem illam, qua in manum
 conuenitur, pertinere, dubium non
 est. Cùm igitur sacra dixisset Cicero
 maiores interire noluisse, haud dubiè
 per sacra, confarreationis vinculum,
 quo nihil in omnibus sacris quicquam,
 auctore Plinio, fuit religiosius, intelle-
 xit. Non enim puto, quenquam tam sto-
 lido hebetique ingenio esse, vt existimet
 Ciceronem contendisse, Iurisconsulto-
 rum ingenio omnia sacra esse interem-
 pta. Quod autem idem Cicero, senes
 repertos esse ad coëmptiones facien-
 das ait, illud eò referri debere, vt in
 coëmptionibus non ijs solùm quibus in
 manum conuenitur, sed omnibus etiam
 quibus venale quid proscribitur, senes
 adhibiti fuisse videātur, apertè demon-
 strat M. Curius, Ciceroni hunc in mo-
 dum

dum scribens : Ergo fructus est tuus,
 mancipium illius : quod quidem si in-
 ter senes cõemptionales venale proscri-
 pserit, egerit non multum. Exstat hæc e-
 pistola apud Ciceronẽ lib. 7. epist. famil.
 Proinde rectissimẽ in Ciceronis Topicis
 adnotasse mihi videtur Boëtius, tribus
 modis vxorem haberi, usu, farre, coẽm-
 ptione. Idq; etiam aduersus gentes lib.
 4. testatus est Arnobius : Vxores, in-
 quit, Dij habent, atque in coniugalia
 fœdera cõditionibus veniunt antè quæ-
 sitis : usu, farre, coẽmptione genialis le-
 ctuli sacramenta conducunt : habent
 speratas, habent pactas, habent inter-
 positis stipulationibus sponfas. Et quia
 raptus ille simulatus, de quo ex Apu-
 leio, Tertulliano, & Festo, disseruimus,
 nec confarreationi, neque coemptioni
 conuenit, idcirco illum rectissimẽ ad
 eam vxorum speciem retulisse mihi vi-
 deor, quæ usu habebantur. Vt igitur usu
 vxor solennitatibus certis capiebatur,
 sic confarreatio, & coemptio, suas etiam
 solennitates habuerunt. Coemptio ita
 peragebatur, inquit Boëtius, vt in coẽ-
 mendo se inuicem interrogarent: Vir i-

ta: An sibi mulier materfamiliâs esse
vellet. illa respondebat, Velle. Item mu-
lier interrogabat: An vir sibi paterfa-
miliâs esse vellet. ille respondebat, Vel-
le. Eratq; mulier materfamiliâs viro, lo-
co filia. Et fuit sanè tanta coemptionis
istiusmodi apud veteres auctoritas, vt
per coemptionem facto matrimonio,
vir & vxor sibi inuicem succederēt. Idq;
in illud Virgilij, *Externusq; in regnum que-
ritur heres*, Seruium Honoratum adno-
tasse Contius obseruauit. Vlpiani etiam
testimonio id ipsum confirmatur, qui in
frag. tit. 2. ita scribit: Sui autem hære-
des sunt liberi quos in potestate habe-
mus, tam naturales quàm adoptiui: item
vxor quæ in manu est, & nurus, quæ in
manu est filij, quem in potestate habe-
mus. Sed id quidem verum erat, dili-
gentérque obseruabatur, si omnium tu-
torum consensu, mulier coemptione in
mariti manum conuenerat. Nam si vel
tutoris vnus in coemptione deesset
auctoritas, ius successionis huiusmodi
cessabat. Idque euidentissimè pro L.
Flacco docuit M. Cicero. Quum enim
eo nomine L. Flaccus esset accusatus,
quod

quòd eius sorore Valeria intestatò mortua, sic eam rem Flaccus egerat, quasi ad ipsum hæreditas pertineret, quum contrà certum esset eam iure coëmptionis ad Andronem Sestilium Valeriæ maritum, omnino deuolutam esse: alia quidem ratione nulla Flaccum excusauit Cicero, quàm quòd esset sine Flacci, qui tutor erat, consensu peracta coëmptio. Verba Ciceronis hæc sunt: At enim Androni Sestilio grauis iniuria facta est, & non ferenda, quòd quum esset vxor Valeria intestata mortua, sic egit eam rem Flaccus, quasi ad ipsum hæreditas pertineret. In quo quid reprehendas scire cupio: quòd falsum intenderit. quí docēs? Ingenua, inquit, fuit. O peritum iuris hominem. Quid? ab ingenuis mulieribus hæreditates lege non veniunt? In manum, inquit, conuenerat. Nunc audio: sed quæro, vtrum vsu, an coëmptione? vsu non potuit: nihil enim potest de tutela legitima sine omnium tutorum auctoritate diminui. Coëmptione? omnibus ergo auctoribus: in quibus certè Flaccum fuisse non dices. Hæc Cicero. Diximus quibus olim

lim modis contrahi, nunc videndum quibus dissolui connubium soleat. Et quidem usu vxor, vsurpatione vxor esse definit: confarreatio, vt diffarreatione, sic coemptio remancipatione dissoluebatur. Quæ usu vxor erat, antequam esset vsucapta, si trinoctium à viro, vsurpandi causa abfuisset, lege duodecim tabularum vsurpata dicebatur. Vsurpationis interruptionem significat, non vi quidem & proprietate verbi, sed per consequentiam. Si enim id quod possideo, necdum tamen vsucepi, ab aliquo solenniter vsurpetur, siue apprehendatur, is si eius rei dominus est, possessionem meam sua vsurpatione interrumpit. Quia igitur mulieres in potestate aut mariti, aut parentum, vel tutorum erant perpetua, idcirco usu vxor nondum vsucapta, ante annum à marito discedens, vsurpabatur, hoc est, à parentibus, aut si illi non essent, à tutoribus solenni quadam ratione apprehendebatur, & mariti potestate liberabatur, si ab eo trinoctium abfuisset. Et hoc inde potissimum, quòd in veri locum, simulatus, ille raptus, quo usu vxores

O

habe-

habebantur, successerat. Quemadmodum igitur Sabinæ virgines, quæ domum raptoribus inscijs fugiebant, usurpabantur, hoc est, ab ijs apprehendebantur, quorum antea in potestate fuerant: sic usu vxor statim quum à viro trinoctium abfuisset, usurpandi gratia, usurpata dicebatur. Ita enim esse accipiendum non dubito, quod ex Q. Murtio de vxore, quæ per trinoctium à viro abfuerat, lege 12. tab. usurpata Gellius lib. 3. cap. 2. & Macrob. lib. 1. cap. 3. tradiderunt. Idq; non intellexisse visus est, quisquis ille fuerit, qui Gellium suis proprijs, & satis interdum friuolis, singulorum capitum argumentis illustrare conatus est. Porro confarreatione matrimonium contractum diffarreatione dissolui solitum Festus observauit, qui diffarreationem genus fuisse ait sacrificij, quo inter virum & mulierem fiebat dissolutio: idcirco sic appellatam, quia fiebat farreo libo adhibito. Et ita quæ farreo libo, hoc est, confarreatione facta erat in manus conuentio, eadem farreo libo, id est, diffarreatione dirimebatur. Et quia nihil tam naturale est, quàm
vnum-

Unumquodque eo modo dissolui, quo ligatum est, ideo etiam non usus vsurpatione tantum, non confarreatio diffarreatione duntaxat, sed & coemptio dissolui remanicipatione solet. Testis est enim idem Festus, remancipatam Gallum Aelium eam definiuisse, quæ mancipata sit ab eo, cui in manum conuenerat. In coemptione autem quandam quasi in manus traditionem interuenire solitam, testatur expressè Symmachus, hunc in modum de Fukuio quodam scribens libr. 2. epistol. Sororem Pompeiam olim viro maturam, te auspice in manus optat accipere, nec genere minor, & re fortassis vberior. Huc spectat quoque Terentij illud in Andria:

Hanc mihi in manum dat, mors continuo ipsam occupat.

Igitur quæ coemptione in contrahendo matrimonio mulier mariti in manum tradebatur, eadem illa in dissoluendo remancipabatur, hoc est, manu ab eo reddebatur, in cuius manum conuenerat. His ita expositis, videamus ecquid de diuortijs amplius in duodecim fuerit. Cuiacius se primum ait obseruasse,

O 2 diuor-

D E T I G N O I V N C T O .

diuortia fieri ex duodecim tabul. Auctoréſque laudat Caium cap. penult. Ad L. Iul. de adult. & Ciceronem in 2. Philip. Mimam illā, inquit Cicero, ſuam reſ ſuas ſibi habere iuſſit, ex duodecim tab. clauē ademit, exegit. Sanè conſuetudinem fuiſſe ſcribit Feſtus, mulieribus donare clauim ob ſignificandam partus facilitatem. Igitur mulieri quæ data fuerat in contrahendo clauis, eam adimi in diſſoluendo matrimonio, Decemuiri voluiſſe viſi ſunt.

C A P. X X I I.

De tigno iuncto.

L E G E M de tigno iuncto Decemuiralem, hiſ conceptam verbis fuiſſe, vir ille eruditiffimus obſeruauit, qui primus Feſtum temporis iniuria deprauatiſſimum, integritati ſumma diligentia conatus eſt reſtituere: **T I G N V M I V N C T V M A E D I B V S, V I N E A I Q V E, E T C A P V L O N E S O L V I T O.** De qua lege ſic ſcribit Vlpianus: Lex duodecim tabulis, neque ſoluere permittit tignum furtiuū ædibus
iun-

iunctum, neque vindicare. Quod providenter lex effecit, ne vel ædificia sub hoc prætextu diruantur, vel vinearum cultura turbetur: sed in eum qui est convictus iunxisse, in duplum dat actionem. cap. 1. de tigno iuncto. Lex igitur duodecim tabularum non permittit ad hoc soluere furtivum tignum ædibus iunctum, ut possit solutum vindicari. Sic enim hæc Vlpiani verba esse accipienda Paullus me docuit, qui de tigno ædib. iuncto, ad exhibendum ideo agi non posse contendit, quia lex 12. tab. illud solui vetat, cap. 6. Ad exhib. Ei siquidem qui vindicare non potest, utique nec ad exhibendum agere permittitur, hoc est, ut Vlpianus sentire videtur, ad soluendum tignum ædibus iunctum experiri: non est enim alius huiusmodi ad exhibendum actionis effectus. Rursus, idem, Paullus tignum ædibus iunctum posse vindicari, idq; Decemviros etiam non ignorasse alio loco testatus est, cap. 98. in fin. de solut. Et hoc tunc etiam verum esse idem Paullus ait, cum aduersus eum est actio, qui sciens alienum ædibus suis tignum iunxit, cap.

18. §. tignum. de rei vind. Igitur ad exhibendum agitur de tigno iuncto interdum inutiliter : agi quoque interdum potest vtiliter. Inutiliter quidem, quum aduersus eum experimur, qui ignorans, alienum iunxit. Ideo enim inutilis est hæc actio, quia id quod iunctum est, aliter vindicari non potest, quam si solum fuerit. Qui igitur ad exhibendum aduersus eum experitur, qui ignorans, iunxit, utique hoc videtur intendere, ut quod iunctum est, dissoluatur, & dissolutum exhibeatur. Lex autem vetat dissolui: igitur inutilis est hoc casu ad exhibendum actio. d. cap. 6. & cap. 7. §. cum in suo. de acq. rer. domin. Aliud autem est, si aduersus eum sit actio, qui sciens alienum iunxit. Tunc enim recte ad exhibendum agitur, d. §. tignum. Non ita quidem, ut quod iunctum est dissoluatur: id enim fieri non potest, quia id fieri lex vetuit: verum ita, ut eum qui iunxit, sic conveniamus, quasi dolo malo fecerit, quò minus possideat, auctore Vlpiano cap. 1. de tig. iuncto. Igitur quæ ipso iure ad exhibendum actio propter Decemviralem hanc legem inutilis est, eadem

eadem illavtillis ex scientia, eiúsque qui iunxit mala fide, efficitur replicationis auxilio. Itaque si tignum meum petam exhiberi, quod ædibus tuis iunxisti, & tu dixeris illud te non possidere, nimirum propter mutatum habitum, iam si bona fide iunxeris, evanescit ipso iure proposita ad exhibendum actio: sin vero scientiam tuam culpam, teque non possidere quidem, sed dolo malo fecisse, quò minus possideres contendam, utilis efficitur huiusmodi replicationis auxilio, quæ antea ipso iure nulla erat, ad exhibendum actio: qua quanti intersit mea tignum iunctum non fuisse fortasse consequar. cap. 3. §. sciendum est autem. & §. ibidem. versic. de quibusdam. Ad exhib. cap. 18. in prin. de dol. mal. Et ita conciliandos esse illos prudentes iuris non dubito, qui de tigno iuncto nonnullas scripsisse antinomias existimantur. Ceterum vindicari tignum aliter non potuit, quàm si solutum esset. Quæ enim iuncta sunt ædibus, separata duntaxat dominum vindicare posse Ulpianus testatur. cap. 7. de except. rei iud. Idq; Decemuiros non

ignorasse etiam Paullus admonuit, quāvis interim illa solui, ijdem Decemviri prohiberent. cap. 98. in fin. de solut. Eōque mihi etiam visus est Vlpianus respexisse, quum ita scriberet: Sed si proponamus tigni furtivi nomine ædibus iuncti actum, deliberari poterit an extrinsecus sit rei vindicatio: & esse non dubitoc.. 2. de tign. iuncto. Sensus enim est, si tigni iuncti nomine sit actum, legis de tigno iuncto actione, an & eadem quoque actione possit tignum quod iunctum non est peti, an verò separatim debeat vindicari? Et extrinsecus quidem vindicationem esse definit Vlpianus. Ea autem extrinsecus vindicantur, quæ ædibus non inhærent. Idq; Ciceronis auctoritate confirmatur, qui sic de Orat. scribit: Extrinsecus autem assumuntur, cum ea quæ sunt foris, neque inhærent, in rei natura colliguntur. Huic adde illud eiusdem de Finib. Et nunc quidem quod vitem tuetur, est id extrinsecus, id est, nō in ipsa vite. Ex quibus locis perspicuum satis est, quæ tigna ædibus non inhærent, siue soluta, siue nondum iuncta fuerint, ea rectè dici extrinsec-

trinsecus vindicari. d. cap. 2. Tignum igitur aliud quàm quod solutum, aut necdum iunctum est, vindicari nulum potest. Legis autem actio de tigno iuncto, in duplum competit. Videamus quid appellatione tigni in hac lege contineatur. Quidam vir eruditus, tigni appellatione in hac lege, ea duntaxat tigna contineri sustinet, quibus ædes ruinosæ fulciuntur. Id si verum est, stupiditatis, igitur legis huius interpretes Caius, Paullus, & Vlpianus insimulantur, qui non tigni solum, sed etiam huius tigni, cuius in hac lege mentio fit, appellatione, omnem materiam significari tradiderunt, ex qua ædificia fiunt, ædificia constant, non autem fulciuntur. d. cap. 62. d. c. 7. & cap. 7. §. appellatione. de acq. rer. donii. Quid? anne tigni vocabulo in hac lege tegulam, lapidem, testam, immo calcem & arenam, ceteraque si qua ædificijs sunt utilia, contineri scripsit Vlpianus? cap. 1. de tigno iuncto. Profectò puerilis est error, & non ferendus, si quis hæc omnia duntaxat fulciendis ædibus ruinosis dixerit accommodari. Quòd si me rogites,

eur Decemuii contrarium ius in ædi-
 bus & in nauibus statuerint, negabo
 quicquam de nauibus Decemuiros iu-
 ris constituisse, sed de tigno duntaxat æ-
 dibus, vineis, & capulis iuncto. Quod ius
 si Decemuii non scripsissent, fortè du-
 bium non esset, quin quod in nauibus
 æquum prudentibus visum est, idem in
 ædibus quoque, in vineis, & in capulis
 obseruaretur. Cur autem passi non sint
 Decemuii, tignum ædibus, vineis, &
 capulis iunctum dissolui, hæc ab Vlpia-
 no prodita est ratio, ne videlicet sub
 hoc prætextu ædificia diruantur, vel vi-
 nearum cultura turbetur. d. c. i. Et quia
 capulum illud esse scribit Festus, quo
 mortui efferuntur, profectò mirum non
 est, capulum ex alieno tigno factum dis-
 solui non magis potuisse, quàm tignum
 ædibus, aut vineæ iunctum: fortassis ne
 funus impediatur, quod excusationem
 in ius vocato iustam & idoneam tribuit:
 neue iusta hominis mortui turbentur.
 Animaduerti mortuorum cadauera,
 aut vincto trahi, aut efferri capulo con-
 sueuisse. Et eorum quidem quibus iusta
 fieri poterant cadauera, solenni pompa
 capulo

capulo ad rogam efferebantur: aliorum
verò quibus lege iusta fieri erat prohi-
bitum, quòd improbi ac nefarii iudica-
rentur, vncò trahebantur: quìq; trahe-
bant, Hamotrahones dicebantur, au-
ctore Festo. Quò spectat illud Senecæ,
epist. libr. 14. epistola. 93. Non conteret,
inquit, me nec vncus, nec proiecti ad
contumeliam cadaueris laceratio, fœ-
da visuris. Eòque etiam respexisse visus
est idem Seneca, de Ira libr. 3. vbi sic
de ira eiusque apparatu loquitur: O-
stendenda est rabies eius effrenata &
attonita, apparatusque illi reddendus
est suus, eculeus, & fidiculæ, & ergastula,
& cruces, & circumdati defossis corpo-
ribus ignes, & cadauera quoq; trahens
vncus, varia vinculorum genera, lacerationes
membrorum, inscriptiones fron-
tis, & bestiarum immanium cauernæ.
Nec aliò quidem referendum videtur,
quòd nulla homini fulminibus occiso
fieri iusta potuisse testatus est libr. 13.
Pompeius Festus: Homo, inquit, si fulmi-
ne occisus est, ei iusta nulla fieri oportet.
& ait, Homine fulminibus occisum
supra genua tolli vetuisse his verbis Nu-
mam

mam Pompilium: SI HOMINEM FVL-
 MINIBVS OCCISIT, NE SVpra
 GENVA TOLLITO. Credebantur e-
 nim huiusmodi homines ira quadam
 vindictâque diuina è medio tolli, & id-
 circo nulla parentatione digni. Igitur
 homo fulmine occisus supra genua tol-
 li, idcirco non potuisse videtur, quia ei
 iusta fieri nulla poterant. Opinor quòd
 hi duntaxat supra genua tollerentur,
 quibus iusta fieri poterant: reliqui ve-
 rò supra genua non tollerentur. Et hoc
 inde potissimum, quòd qui capulo ef-
 ferebantur, non capulo humeris, vt a-
 pud nos moris est, imposito efferri so-
 leant, sed in eam ni fallor altitudinem
 a terra capulo leuabantur, vt supra ge-
 nua duntaxat tollerentur. Quia igitur
 occiso fulminibus homini iusta fieri
 nulla poterant, certissimum est, ideò et-
 iam noluisse eum supra genua tolli
 Pompilium; siquidem qui supra genua
 tollebantur, capulo efferebantur. Et
 quia hi solùm capulo efferri poterant,
 quibus fieri iusta permissum erat, rectè
 hinc ratiocinabimur, capulo propterea
 homines fulminibus occisos non ela-
 tos,

tos, nec per consequens supra genua
sublatos, sed vnco velut sceleratos ho-
mines & impios tractos fuisse. Quid au-
tem, si per capulum, non id solum quo
mortui efferuntur, sed etiam ipsum se-
pulchrum intellexerimus? Nihil esse
quod reprehendi possit, existimo. Anti-
quos enim sarcophagum etiam capu-
lum appellasse, præter Nonium Mar-
cellum testatur Apuleius libro decimo
de asino aureo: Ecce, inquit, pater suus,
ipse manibus cooperculo capuli remo-
to commodum discussio mortifero so-
pore, surgentem postliminio mortis de-
prehendit filium. Eoque sensu capulum
accepisse visus est etiam Tertullianus in
libro de carnis resurrect. Deus verò, in-
quit, animæ suæ vmbra, Spiritus sui
auram, oris sui operam, vilissimo ali-
cui commiserit capulo? Aut igitur per
capulum, id quo mortui efferuntur,
cum Felto intelliges, aut certè cum
Nonio Marcello ipsum sepul-
chrum ex alieno tigno
factum.

CAP. XXIII.

De frugum excantationibus.

IN hoc Decemuiros reprehendit Seneca, libr. 4. naturalium quaestionum, cap. 7. quod illi cantibus attrahi imbres, & repelli crediderint. At Cleonæ, inquit, iudicia reddebant, in illos, quibus delegata erat cura providendæ tempestatis, quod negligētia eorum vineæ vapulassent, aut segetes procidissent. Et apud nos in duodecim tabulis canetur, ne quis alienos fructus excantassit. Rudis adhuc antiquitas credebatur & attrahi imbres cantibus, & repelli: quorum nihil posse fieri tam palam est, ut huius rei causa nullius Philosophi schola intranda sit. haec Seneca. Esse autem in duodecim tabulis legem, qua fruges vetantur excantari, non Seneca duntaxat, sed & Plinius quoque libr. 28. cap. 7. his verbis expresse testatus est: quin etiam & legum ipsarum in duodecim tabul. verba sunt, *QVI FRUGES EXCANTASSIT.* & alibi, *QVI MALVM CARMEN INCANTASSIT.* Atque huius quidem legis in prima apologia me-

meminit etiam Apul. & qua ratione fruges soleant excantari eleganter hunc in modum docet: Magia ista res est delegata legibus iam inde antiquis duodecim tabulis, propter incredulas frugum illecebras interdicta. Igitur & occulta, non minus quam tetra, & horribilis, plerunque noctibus vigilata, & tenebris obstrusa, & arbitris solitaria, & carminibus murmurata, cui non modo servorum, verum etiam liberorum pauci adhibentur. Prohibuerunt igitur Decemuiri fruges excantari, eumque qui fruges excantasset, Cereri sacrum esse, eosdem Decemuiros voluisse, auctor est in Virg. Servius.

C A P. XXIV.

De damno dato.

VIDE TUR in duodecim tabulis scriptum fuisse, SI RUPITIAS, SARCITO. Rupitias enim in duodecim damnum dederis, & sarcito damnum soluito, significare, ex Servio Sulpitio annotavit Festus. Igitur Decemuiri damnum non iniuria, sed negligentia datum sarciti, hoc est, solui, siue praestari duntaxat,
sine

sine castigatione aliqua voluerunt. cap. 9. de incend. ruina, naufrag. Ceterum qui ædes acervumve frumenti iuxta domum positum sciens prudens combussit, is vincetus, verberatus, igni necari lege Decemvirali iubetur. d. cap. 9. quem postea, si humiliore loco esset, bestiis obiectum; sin verò in aliquo gradu, capite punitum, aut in insulam deportatum fuisse, Vlpianus testatur, cap. ult. d. tit. Incendium autem nullum sine culpa fieri posse, hoc est, sine negligentia, Alphenus notat, cap. 11. de per. & com. rei vend. Et ob id ex incendio culpa facto, si quidem ea latior esset, de damno iniuria dato, ex lege Aquilia; sin leuior, ex duodecim tabulis agi solet, cap. 1. Ad 1. Aquil. His adde, si quadrupes pauperiem fecerit, etiam ex lege duodecim tabularum actionem sic descendere, vt eadem lege aut dari id quod nocuit, id est, animal q̃ noxiam commisit, aut æstimationem noxiæ offerri necessum fuerit, cap. 1. Si quadr. paup. feciss. dic. Fuisse denique in duodecim tabulis de seruorum noxijs aliquid cantum, indicat Iustinianus, in §.

Sunt

Sunt autem. Instit. de noxal. act. Scribit etiam Vlpianus, si seruus sciente domino furtum fecit, vel aliam noxam commisit, serui nomine ex duodecim tabulis actionem esse noxalem, nec dominum suo nomine teneri. cap. 2. de noxal. act.

C A P. X X V.

De iniurijs, & famosis libellis.

CELLIVS auctor est: libr. 20. cap. 1. In duodecim de iniuria punienda sic scriptum fuisse: SI INIVRIAM ALTERI FAXIT, VIGINTIQUINQUE AERIS POENAE SUNTO. Quam legem Sextus Cecilius, & Sextus Pompeius Festus sic interpretati sunt, ut per viginti quinque aeris poenas intellexerint viginti quinque asses. Scribit idem Gellius, Lucium quendam Neratium hominem egregie improbum, & immani vecordia, pro delectamento habuisse, os hominis liberi manus suae palma verberare, & quemcunque depalmauerat, ei statim numerari secundum duodecim tabulas quinque & viginti asses iussisse. Propterea, inquit, Praetores poenam hanc obsolescere, & relinqui

linqui censuerunt, iniurijsq; æstimandis recuperatores se daturos edixerunt. Ceterum de membro rupto sic Decemuiros scripsisse, apud eundem Gellium legimus : *Si membrum rupit meum, è pacto talio esto.* Sed caput istud mendosum esse, quis est qui non videat? Illud iam pridem Iacobus Cuiacius obseruauit sic esse restituendum : *SI MEMBRVM RVPIT, NI CVM EO PACIT, TALIO ESTO.* Elegans restitutio. Quis enim non videat, ex his duabus dictionibus *ni cum*, conflatum fuisse illud *meum*, quod in vulgari editione passim extat? Talionis, inquit Festus nouissimè restitutus, mentionem fieri in duodecim ait Verrius, hoc modo : *Si membrum rupit, ni cum eo pacit, talio esto.* neque id quid significet indicat, puto quia notum est : permittit enim lex parem vindictam. Huc spectat illud Senecæ de Ira libro 2. cap. 32. Inhumanum verbum est, & quidem pro iusto receptum, ultio & talio, non multum differt nisi ordine. Porro propter os fractum, non talionis, sed nummarias pœnas fuisse in duodecim constitutas, Gellius & Iustinianus

con-

consentiunt. Nunc antequam ad legem de famosis libellis Decemviralem veniam, exponendum est, ecquid de arboribus furtim cæsis statuerint Decemviri. Plinius libr. 17. cap. 1. cautum fuisse duodecim tabulis ait, ut qui iniuria cecidisset alienas arbores, lueret in singulas pœnas æris vigintiquinque. Sic enim legendum est apud Plinium, non ut passim legitur, *Luceret in singulas æris vigintiquinque.* Sed quemadmodum in alijs iniurijs, ita & hîc à Prætoribus alia pœna statuta fuit, ad quam pœnalis in duplum actio arborum furtim cæsarum est introducta. capit. 8. Arbor. furt. cæsar. His addendum est, quod de frugibus aratro quæsitis, hunc in modum idem Plinius scribit, libro 18. capit. 3. Frugem, inquit, aratro quæsitam, nocte pavisse & secuisse, puberi duodecim tabulis capitale erat, suspensumque Cereri necari iuebant, gravius quàm in homicidio conuictum: impuberem Prætoris arbitratu verberari, noxiàmve duplionemve decerni. Quo in loco pro *noxiàmve duplionemve decerni*, legendum mihi videtur, *noxiàmve duplione*

decerni. Nam cum sola noxia decernitur, nihil de pœna statuitur, cum duplio noxia præstari iubetur, & simul pœna decernitur. Balduinus noster antiquitatum illustrator vigilantissimus, de famosis libellis tam scripsit accuratè, ut non magnoperè hîc esse mihi laborandum putem. Ait Ciceronem libr. 4. de Repub. sic scripsisse: Nostræ contrâ duodecim tabulæ cum per paucas res capite sanxissent, in his hanc quoq; sancientiam putauerunt: si quis occentauisset, ætitauisset, siue carmen condidisset, quod infamiam faceret, flagitiûmque alteri precaretur. Ex quo loco dubium non est, quin libelli famosi pœna capitalis fuerit, hoc est, supremi supplicij. Nam quòd quidam ait, capitis pœnam non mortem tantum, verumetiam statum & dignitatem respicere, id certè ad rem non pertinet. Decemuirorum siquidem temporibus nulla erat relegatio, nulla proscriptio, nulla deportatio, & idcirco qui capitis damnabatur, ad mortem condonari debebat. Igitur hanc infamiam summo supplicio vindicasse videntur Decemuiri. Nec moueor

auctoritate Vlpiani, quem audio cap. 5. de iniurijs tradidisse, eos qui famosum carmen, libellósve famosos scribunt, ex lege intestabiles esse. Illud enim non ad Decemviralem legem, sed ad quoddam Senatusconsultum spectat, cuius idem Vlpianus alio loco meminit: Si quis, inquit, ob carmen famosum damnetur, Senatusconsulto expressum est, ut intestabilis sit. cap. 18. de test. Et eò quidem referendum videtur, quod hunc in modum Arnobius scribit aduersus gentes libro quarto: Carmen malum conscribere, quo fama alterius coinquinetur & vita, Decemviralibus scitis euadere nolulistis impune: ac ne vestras aures conuitio aliquis petulantiore pulsaret, de atrocibus formulas constituistis iniurijs. Verba legis 12 tabul. de famosis libellis, sic esse restituenta obseruari: SI QVIS OCCENTASSIT, ACTITASSIT, SIVE CARMEN CONDIDISSIT, QVOD INFAMIAM FACERET, FLAGITIVMVE ALTERI PRECARETVR, CAPITE POENAS LVITO. Occentassint antiqui dicebant,

cebant, inquit Festus, quod nunc con-
uicium fecerint, dicimus: quod id cla-
rè & quodam canore fit, vt procul ex-
audiri possit: quod turpe habetur, quia
non sine causâ fieri putatur. Et hæc mi-
hi sufficere videntur, ad interpretatio-
nem legum Decemviralium quæ de in-
iurijs latæ sunt.

C A P. XXVI.

De furtis.

DECENVIRI tres furtorum spe-
cies constituunt, manifestum, nec
manifestum, conceptum: addidère
Prætores quartam, eamque oblatum
nominant. Decemviri furem qui ma-
nifesto furto prehensus esset, occidi
tunc permiserunt, si quum faceret fur-
tum, nox esset, aut interdum se telo cum
prehenderetur, defenderet. Ex ceteris
autem manifestis furibus, liberos ver-
berari, addicique iusserunt ei, cui factum
furtum esset, si modò id luci fecissent,
neque se telo defendissent: seruos item
furti manifesti prehensos, verberibus
affici, & è saxo præcipitari: sed pueros
impu-

impuberes Prætoris arbitrato verberari voluerunt, noxamque ab his factam sarciri. Alijs deinde furtis omnibus, quæ nec manifesta appellantur, pœnam imposuerunt dupli. Hæc differit eleganter Gellius noctium Atticarum lib. 11. cap. 18. Et Macrobius libr. 1. Saturn. hanc legis Decemviralis referens particulam, SI NOX FURTVM FAXIT, ET IM ALIQUIPS OCCISIT, IVRE CAESVS ESTO, notandum esse ait, Decemuiros nox pro noctu, & im pro eum posuisse. Furtum autem conceptum, ac si manifestum foret, Decemuiros etiam vindicasse, idem Gellius auctor est. Ea quoq; furta, inquit, quæ per lancem liciumque concepta essent, perinde ac si manifesta forent, vindica-uerunt. Quo quidem in loco nihil esse aliud furtum per lancem & licium conceptum suspicor, quàm illud furtum, quod conceptum simpliciter à prudentibus iuris est appellatum. Lance, inquit Festus, & licio, apud antiquos dicebatur, quia qui furtum ibat quærere in domo aliena, licio cinctus intrabat, lancemq; ante oculos tenebat, propter matrum

familiæ aut virginum præsentiam. Vnde
 manifestum satis est, lancem liciūque
 nihil aut adiecisse, aut substantiæ con-
 cepti furti detraxisse, sed nudam dunta-
 xat furti inuestigandi rationem deno-
 tasse. Moris enim Decemviro-
 rum fuisse videtur, vt si quis in ali-
 cuius ædibus furtum vellet quærere, il-
 lud faceret nudus, licio cinctus, & lan-
 cem ante oculos tenens, iuratusq; Deos
 legum custodes, sese reperiendi spe fur-
 tum quærere. Et tunc quidem alter ille
 apud quem furtum quærebatur, do-
 mum suam ei qui furtum quærebat a-
 perire, & in obſignatis, & non obſigna-
 tis locis liberam furti inquirendi pote-
 statem facere cogebatur. Quem mo-
 rem primum à Græcis vsurpatum, dein-
 de in Romanam Rempubl. olim inue-
 ctum fuisse, si quis fortè satis sibi non
 persuaferit, inueniet Platonis de legi-
 bus librum duodecimum: in quo id ita
 perspicuè traditur, vt omnem auctor
 diuinus cum Festo, Gellio, alijsq; Latinis
 auctoribus collatus, dubitationis mihi
 scrupulum penitus exemerit. Igitur si
 conceptum furtum aliud nullum dici
 pos-

possit, quàm furtum quæsitum & inuentum, auctore Paulo, Sententiarum libr. 2. titul. 31. & Iustiniano, in §. conceptum. Iust. de obligat. quæ ex del. nasc. consequi rectè videtur, aliud quoque nullum dici posse furtum per lancem & licium conceptum, quàm furtum per lancem & licium quæsitum & inuentum. Et quia nulla temporibus Decemuirorum furta quæri sine lance & licio in domo aliena poterant, ideo quoque nulla fuisse iisdem temporibus videntur concepta furta, quæ non per lancem & licium concepta dicerentur. At postea quàm furtorum quæstiones, hoc est, inquisitiones cum lance & licio euaniissent, ut est apud Gellium libr. 16. cap. 10. tunc furta, quæ per lancem & licium concepta dicebantur, appellari concepta simpliciter cœperunt. Et ita quidem amplius nihil in effectu furti nomine per lancem & licium concepti Decemuii sunt complexi, quàm Prætores & Iureconsulti per furtum conceptum intellexerunt. Idq; mirum in modum confirmat idem Gellius. Cum enim à lege Decemuirali discessum esse, & ex

P 5 mani-

manifesto furto actionem in quadruplum competere demonstrasset, hæc verba subiecit : *Furti concepti, item oblati, tripli pœna est.* Quibus haud dubiè aliud nihil voluisse visus est, quàm sicut manifesti furti in quadruplum, sic furti concepti pœnam Decemviralem in triplum conuersam à Prætoribus fuisse. An autem in duodecim, de eo cuius ope, consilio, furtum factum esset, quicquam fuerit definitum, nihil certi existimo affirmari posse. Nam quod Festus, docens nec pro non veteres dixisse, in duodecim scriptum esse ait, *Si aderit furto quod nec manifestum erit* : illud mendosum esse indicant veteres libri, quibus in Festo restituendo Antonius Augustinus usus est. In ijs enim pro *aderit*, fuisse videtur scriptum *adorat*. Et quia adorare pro agere, interdum antiquos posuisse Festus testatur libro primo, idcirco sic hanc legis apud eundem Festum particulam esse restituendam existimaui : **SI ADORAT FURTVM QVOD NEC MANIFESTVM ESIT, DVPLIONEM LVITO** : & sic intelligendam, vt qui furtum nec manifestum fecit

fecisset, duplo multaretur. Vfus in eadem significatione verbo adorare videtur in Octauio Minutius Felix: At enim, inquit, nos exequias adoramus, eadem tranquillitate qua viuimus: hoc est, exequias facimus, celebramus, eadem qua viuimus tranquillitate. Et hæc de furtis, de quibus pacisci Decemuiros etiam permisisse, passim traditum est.

C A P. X X V I I.

De publicis iudicijs & capitalibus.

ESSE in duodecim tabulis de capite Romani ciuis ita scriptum, DE CAPITATE CIVIS NISI PER MAXIMUM COMITIATVM NE FERVNTO, Cicero libr. 3. de legibus, auctor est. Qua quidem lege ante Decemuiro- rum tempora vixdum in prouocatione vsi videntur Romani. Tunc enim horridi criminis legem in vsu fuisse huiusmodi Liuius testatur lib. primo: DVVMVIRI PERDVELLIONEM IVDICENT. SI

A DVVM-

A DVVMVIRIS PROVOCARI T,
 PROVOCATIONE CERTATO. SI
 VINCENT, CAPVT OBNOBITO,
 INFELICI RES TE SVSPENDITO,
 VERBERATO VEL INTRA POMOE-
 RIVM VEL EXTRA POMOE-
 RIVM. Secundum quam legem, ait idem Li-
 vius, Tullum Hostilium Duumuiros, qui
 Horatio perduellionem indicarent, fe-
 cisse: & alterum ex Duumuiris in con-
 demnando hac formula vsum esse: *Pu-
 bli Horati tibi perduellionem iudico: Licetor col-
 liga manus.* Cùmque Horatius prouocas-
 set, de prouocatione statim certatum
 ad populum fuisse. Quid autem sit per-
 duellionem alicui iudicare, quid item
 perduellionis reum fieri, quia id igno-
 rari video, paucis hîc exponam. Et ani-
 maduerti quidem à viro quodam, vt
 mea opinio fert, nostrorum Iuriscôn-
 sultorum longè ingeniosissimo, atque
 exercitatisimo, Liuium esse reprehen-
 sum in hoc, quòd ille nefarium illud Pu-
 blii Horatij, qui propriam sororem in-
 teremerat, scelus perduellionem appel-
 lauerit. Sed quia aliud est, perduellio-
 nem

nem alicui iudicare, aliud perduellionis accusare: sic Liuium esse defendendum puto, vt dixerit expresse, Duumuiros non perduellionis Horatium reū fecisse, aut condēnasse, sed Publio Horatio perduellionem iudicasse. Sanè ad legem duodecim tab. libro secundo scribit Caius, quos hostes nos dicimus, eos veteres perduelles appellasse, per eam adiectionem indicantes cum quibus bellum esset. cap. 234. de verbor. signif. Idque etiam Varro de lingua Latina lib. 4. & Festus libr. 8. de verborum significatione testati sunt. Multa verba, inquit Varro, aliud nunc ostendunt, aliud antè significabant: vt hostis. Nam tum eo verbo dicebant peregrinum, qui suis legibus vteretur: nunc dicunt eum, quem tunc dicebant perduellem. Et Festus: Hostis, inquit, apud antiquos peregrinus dicebatur, & qui nunc hostis, perduellis. Ex quibus quidem Varronis & Festi locis rectè colligi potest, non vt olim, sic nunc hostes Romani populi perduelles appellari. Siquidem, vt Vlpianus ait, is duntaxat perduellis nunc dicendus est, qui hostili animo aduersus

nis Rempub. vel Principem suum est animatus. cap. fin. Ad L. Iul. maiest. Igitur qui eo nomine accusatur, is rectè perduellionis reus fieri nunc intelligitur: quemadmodum olim qui hostis iudicabatur, illi perduellio iudicari dicebatur. Proinde sic Liuium esse intelligendum puto, vt contenderit, eis qui horrendum aliquod crimen commiserant, perduellionem eo tempore solere iudicari: quo moris fuisse apud Romanos videtur, vt ciui Romano, de cuius capite iudicium erat, antè perduellio iudicaretur, hoc est, ciuium exemptus numero, patriæ hostis pronunciaretur, quàm capitale sumi de ciue Romano supplicium posset. Et hæc quidem interpretatio eò verisimilior videtur, quòd filium suum Horatium, populi fauore absolutum, Publius Horatius pater, quibusdam sacrificijs piacularibus peractis, transmissio per viam tigillo, capite adoperto, velut sub iugum miserit, auctore eodem Liuius. Quia igitur præter hostes nulli sub iugum mitti cõsueuerant, hinc rectè ratiocinabimur, ideo missum velut sub iugum à suo pa-

tre Horatium fuisse, quia Horatio Duumviri perduellionem iudicauerant, hoc est, quia inter perduelles Romani populi Horatium referendum esse, deinde ut perduellem interimendum pronunciauerant. Et hæc ad legem illam horrendi criminis sufficiunt. Quæ lex Regum temporibus Romæ in usu fuisse, Regibusque exactis, vnâ cum reliquis legibus Regijs exoleuisse lege Tribunicia videtur. Quo quidem tempore, suum semper esse de capite Romani ciuis iudicium, populus Romanus visus est primum voluisse. Et idcirco in huius Regiæ de horrendo crimine legis locum, aliam Decemviri legem surrogarunt, qua de capite ciuis nisi per maximum comitatum ne ferretur, continebatur. Eaque lege usus est Romanus populus semper constantissimè. Adeo quidem, ut contenderit actione quinta in C. Verrem expressè Cicero, facinus esse ab aliquo Prætoris vel Prætoris vinciri ciuem Romanum scelus ver-

omnia Regiam potestatem sibi vindicarent, lege lata factum esse, vt ab eis prouocatio esset, néve possent in caput ciuis Romani iniussu populi animadu-
 uertere. Certè quia de libertatis ciuitatisque iure, non Prætoris, Consulis, aut Præsidis alicuius, sed populi solius iudicium erat. Proficiscar, inquit Cicero in Verrina quarta, eò quò me iampridem vocat populus Romanus: de iure enim libertatis & ciuitatis suum putat esse iudicium, & rectè putat. Nunc videntum est, de eo qui hostem concitauerit, quive ciuem hosti tradiderit, quem capite puniendum Martianus scribit, idq; legem duodecim tabularum iubere. ca. 3. Ad L. Iulian. maiest. Et de eo quoque, qui ob rem dicendam pecuniam accepisse conuictus erat, capite puniendo lege quadam Decemuirali expressè caueri testatur Gellius libr. 20. cap. 1. Quod autem Martianus scribit, lege Iulia repetundarum eum teneri, qui cum aliquam potestatem haberet, pecuniam ob indicandum, vel non iudicandum acceperit, cap. 3. Ad L. Iul. repetund. ex eo probari potest, lege Iulia repetundarum,

harum, legem hanc Decemviralem ab-
rogatam fuisse : etiam ijs temporibus
quibus M. Cicero Verrem accusauit.
Ciceronis enim hæc verba sunt, in A-
ctione prima : Cognoscet ex me popu-
lus Romanus quid sit, quod P. Septimio
Senatore damnato, Q. Hortensio Præ-
tore, de pecunijs repetundis lis æstima-
ta sit in eo nomine, quod ille ob rem
iudicandam pecuniam accepisset. Igi-
tur qui lege Decemvirali capite plecti
debent Iudices corrupti, in eos lege
Iulia repetundarum non capite, sed ex-
silio, vel etiam interdum durius, extra
ordinem animaduersum fuit. cap. 7. §.
hodie. Ad L. Iul. repetund. Et hæc hæc-
tenus, quibus si addideris, passos non esse
Decemuiros, de inaudito & indemnato
supplicium sumi, idq; primùm ex Sal-
uiano [Massiliensi Episcopo Cuiacium
obseruasse, existimabo de legibus pu-
blicorum capitaliumque iudiciorum

Decemuiralibus, hinc satis ab-
unde disputatum

Miscellanea quaedam.

IN hoc capite quædam Decemviralium legum fragmenta visum est adnotare, quæ licet nullam interpretationem accuratam postulent, omitti tamen non potuerunt. Festus auctor est, Sanates dictos esse, qui supra infraque Romam habitauerunt: idque nomen his fuisse, quia cum defecissent à Romanis, breui post redierunt in amicitiam, quasi sanata mente. Itaque inquit, in duodecim cautum est, ut idem iuris esset Sanatibus, quod fortibus, id est, bonis & qui nunquam defecerunt à populo Romano. De vnciario fœnore, cum ab alijs plurima sint adnotata, satis erit hoc loco admonuisse, Decemuiros, ne quis vnciario fœnore amplius exerceret, prohibuisse: idque Cornelium Tacitum libr. 5. annalium scripsisse. De collegijs autem, & corporibus copiosos commentarios ediderunt viri aliquot eruditi, qui præclaris Romanorum antiquitatibus illustrandis sedulam operam nauant: quæ res efficit, ut eorum com-
men-

mentarijs contenti, industriam nostram
in aliud tempus, & locum commodio-
rem reseruemus. Huc accedit, quòd in
vrbe cœtus nocturnos agitari Decem-
uiri etiam prohibuerint: idq; ex Portio
Latrone quidam eruditi duodecim ta-
bularum interpretes diligenter obser-
uarunt. Plinius libr. 16. cap. 13. scribit
cautum fuisse lege duodecim tabul. vt
glandem in alienum fundum prociden-
tem liceret colligere. Interdixit etiam
Prætor de glande legenda. Vlpianus re-
fert, legem duodecim tabularum etiam
voluisse, vt quindecim pedes altiùs rami
circuncidantur: & hoc ideo effectum
esse ait, ne vmbra arboris vicino prædio
noceret, cap. 1. de arb. cæd. Esse quoque
de pastu pecoris ex duodecim tabulis
actionem, non obscure significat idem
Vlpianus, cap. 14. §. vltim. de præscript.
verb. Destatu liberis autem quid in 12.
fuerit, explicat his verbis Vlpianus in
fragmentis tit. 2. Sub hac conditione li-
ber esse iussus, si decem milia hæredi
dederit: & si ab hærede alienatus sit

iubet. Denique de decimo mense, deq;
partu monstroso videndum est, si quid
duodecim tabul. caueatur. Et exstat qui-
dem apud Ciceronem libr. 3. de leg. lo-
cus, qui de monstroso partu Decemui-
ros quicquam scripsisse tam obscure si-
gnificat, vt quidnam illud fuerit diuina-
re nequeamus. Quamuis interim homi-
nem in decem, non in vndecim mensi-
bus gigni, dubium non sit: idq; etiam in
duodecim tabul. Decemuiros scripsisse,
Gellius auctor est, libr. 3. cap. 16. A qua
lege decimum mensem natiuitatem le-
gitimam visus est appellasse Tertullia-
nus in libro de anima: Legitima, inquit,
natiuitas, fermè decimi mensis ingressus
est. Qui numeros ratiocinantur, decu-
rialem numerum, vt exinde reliquorum
parentem colunt, denique perfectorem
natiuitatis humanæ. Et hæc quidem ad
illa duodecim tabularum fragmenta,
quæ expressam aliquam legis senten-
tiam continent, mihi sufficere videntur.
De reliquis verò, nihil est quod hîc dis-
feratur. Siquidē in hoc libello conscri-
bendo nostra fuit intentio, leges aliquot
deprauatas restituere, restitutas, a-
liās-

liásque ab interpretibus non rectè, vt
 nobis videbatur, intellectas, breui qua-
 dam & perspicua interpretatione illu-
 strare: non autem, quæ ab alijs accura-
 tè & eruditè tradita sunt, iterum hîc in-
 culcare, non singula duodecim tabulis
 verba, quæ sine aliqua legis sententia,
 passim apud auctores obuia sunt, ex-
 plicare. Nam id potiùs ab ijs est
 faciendum, qui commen-
 tarios verborum iu-
 ris conscri-
 bunt.

F I N I S





I E N A E

Apud T O B I A M S T E I N -
M A N ,

Impensis L E O N H A R D I V V I P -
P R E C H T S B i b l i o p o l æ I e n e n s i s ,

A N N O

c I O . I O . x i v c .

Ant 5613
13/8613